

**NATIONAL ASSEMBLY OF
SEYCHELLES**

Tuesday 25th October, 2022

The Assembly met at 0901am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisyè Lasanble ki pe asiste nou. E tou nou manm piblik ki pe swiv nou byenveni pou nou travay lasemenn *comme toujours*. Mersi pou zwenn nou.

Bon mon le adres labsans Manm Lopozisyon dan *Sitting* Lasanble le 20 Oktob 2022 pou ladres Prezidan Larepiblik. E met lo rikord mon desizyon lo sa size.

Privilez Prezidan pou adres Lasanble Nasyonal i kler dan Lartik 92(1) Konstitisyon ki dir,

“The President may at any time attend and address the National Assembly”.

Sitting le 20 Oktob 2022 ti ganny mete dan lord biznes Lasanble an reg e tou Manm ti ganny notifie. Prezans bann

Manm ti obligatwar. Alors labsans bann Manm pou sa lokazyon pa ti annord avek regilasyon. Lalwa *National Assembly Members Emoluments Act* i fer provizyon pou en sanksyon kler pou labsans Manm san lotorizasyon Speaker.

An akor avek Lartik 4 (a) (1) sa Lalwa mon pe donn lenstriksyon pou dedwir R1000 lo lapey sak Manm ki ti absan san permisyon. Sa i aplik pou tou Manm Lopozisyon sof enn ki ti lo konze medikal.

Fodre note ki sa Regilasyon i date depi 1993 e i pa neserman reflekte sa ki devre ete ozordi.

Sa labsans i osi montre en mank respe pou Konstitisyon, pou Prezidan e pou Lasanble. Me i napa en sanksyon kler ki preskri pou sa, e mon pa pou antre dan prosedir ki konplike, e ki pou met retar travay Lasanble e ki kapab abouti dan sispann Manm dan Lasanble, akoz mon krwar ki plas bann Manm i dan Lasanble e pa an deor.

Mon osi krwar ki ou pa kapab fors respe avek sanksyon, alors mon fer rapel bann Manm zot lobligasyon pou respe nou Konstitisyon, Prezidan Larepiblik e nou

Lasanble. Sa i mon *ruling*.
Mersi.

Mon pa pe pran okenn deklarasyon oubyen *statement*. Onorab Loze si ou ti annan en pwen pou fer - Onorab Cosgrow parey ou ti'n devret apros mwan avan. Mon *ruling* napa diskisyon lo la, mon *ruling* i final! Mon pa pe donn zot lotorizasyon pou pran laparol la. Mersi silvouple bes lanmen.

(Off-Mic)

MR SPEAKER

Mersi. Bes lanmen.

(Off-Mic)

MR SPEAKER

Non napa, napa *matter arising* lo mon *ruling*, i final!

(Off-Mic)

MR SPEAKER

Onorab Loze mon pe rapel ou ki ou koze ler ou ganny lotorizasyon Speaker. Sinon mon pe dir ou si ou pa dakor avek sa, mon pou bezwen dir ou absan dan Lasanble. Mersi.

Onorab Pillay sa i aplik pou ou osi parey. Madanm Clerk nou ava kontinyen avek Biznes Lasanble e mon ava demann ou prezantasyon dokiman.

MADAM CLERK

Mersi Mr Speaker.

HON SEBASTIEN PILLAY

(Off-Mic)

MR SPEAKER

Mon pa pe pran okenn *matter of privilege* la Onorab Pillay.

MADAM CLERK

Bonzour Mr Speaker, Bonzour tou bann Manm, tou *staff* Sekretarya e tou dimoun ki a lekout. Bann Papye ki pe ganny prezante i: -

S.I. 110 of 2022 Land Registration (Amendment of Second and Third Schedules) Regulation, 2022.

S.I. 111 of 2022 Mortgage and Registrations (Fees) (Miscellaneous) (Amendment) 2022

S.I. 112 of 2022 Public Health (Emergency Use Authorisation of Vaccines and Medical Products (Amendment), 2022.

Mersi Mr Speaker.

MR SPEAKER

Mersi Madanm Clerk. Nou osi annan *First Reading of Public Bill*. Mon ava demann ou pou fer sa.

MADAM CLERK

This Act may be cited as the Appropriation Act, 2023. Mersi Mr Speaker.

MR SPEAKER

Mersi. Nou pou prosede prezan avek biznes *Order Paper* avek *Private Notice Question*. Madanm raporter mon ava demann ou pou apel Vis-Prezidan Silvouple.

Mon apel *Leader* Lopozisyon Onorab Sebastien Pillay pou met son *Private Notice Question*.

HON SEBASTIEN PILLAY

Mersi Mr Speaker zis pou met lo rikord ou pa pe donn mwan en *matter of privilege*?

MR SPEAKER

Pa pou lemoman, non, mersi. Prosede avek ou kestyon.

HON SEBASTIEN PILLAY

Mersi Mr Speaker. Mon'n demann ou, so zis pou fer kler pou sa ki arive apre en? Mersi.

(Off-Mic)

MR SPEAKER

Ki...? *sorry*? Onorab Pillay ki ou'n dir ankor repete?

HON SEBASTIEN PILLAY

Non Mr Speaker.

(Interruption)

MR SPEAKER

Manm, silvouple bann Manm. Permet mwan diriz sa Lasanble. Onorab Pillay repet sa remark.

HON SEBASTIEN PILLAY

Mr Speaker mon remark i se ki vi ki ou pa pe donn mwan en *matter of privilege*, mwan mon annan lentansyon prezan ekrir ou pou *challenge* lefe ki ou pa pe donn mwan en *matter of privilege*.

MR SPEAKER

Ou annan lentansyon ekrir mwan, ou kapab fer li.

HON SEBASTIEN PILLAY

Wi se sa ki mon pe dir ou.

MR SPEAKER

Se sa ki ou ti dir?

HON SEBASTIEN PILLAY

Mon pa konnen akoz zot pe reakte.

MR SPEAKER

Byen, tre byen.

HON SEBASTIEN PILLAY

Mon'n dir sa ki pou arive apre.

MR SPEAKER

Tre byen i lo rikord se sa ki ou'n dir. Mersi, ale ou kestyon prezan.

HON SEBASTIEN PILLAY

Mersi Mr Speaker. Mon pa konnen akoz nou sansib koumsa dan Lasanble.

MR SPEAKER

Ou kestyon.

HON SEBASTIEN PILLAY

Nou kalme nou silvouple, mersi. Mr Speaker, bonzour VP e bonzour tou koleg Onorab e bonzour tou dimoun ki a lekout. Mon kestyon pou Gouvernman i lir koumsa: -

Prenon kont ki sa trwa Ziz etranze ki ti pe konsider sa rapel oubyen sa laplikasyon pou en lapel dan zafer ki konsern en gran lakonpanyen konstriksyon isi Sesel, e en lakonpanyen etranze in fini rann zot zizman, eski Lasanble i kapab ganny en lesplikasyon lo: -

Konbyen an tou sa rapel in kout Gouvernman Sesel?

Dezyenm, konbyen Gouvernman Sesel in depanse lo sa trwa Ziz etranze?

E mon trwazyenm kestyon Mr Speaker, lefe ki sa trwa Ziz in plizoumwent mentenir desizyon ki Lakourdapel ti pran dan sa ka, eski pou annan

okenn lenvestigasyon pou determinen si sa lapel ki ti ganny fer lo sa desizyon Lakourdapel, i zistifyab?

Mersi Mr Speaker.

MR SPEAKER

Mersi Onorab. Vis-Prezidan ou larepons silvouple.

THE VICE-PRESIDENT AHMED AFIF

Meri bokou Mr Speaker. Bonzour Mr Speaker, *Leader* Lopozisyon, *Leader* Zafer Gouvernman, tou bann MNA e tou piblik ki a lekout.

Mr Speaker tou dabor mon bezwen eksplik klerman ki sa Gouvernman pa zanmen enterfer li dan bann zafer Zidisyer. E anefe se pa Gouvernman ki deside si okenn ka pou bezwen Ziz etranze oubyen Ziz ki deza dan pei. Kan ka pou ganny ekoute, ki lozistik ki asosye avek sa bann desizyon e konbyen i pou koute. Sa se Zidisyer ki pran sa bann desizyon koman en brans endepandan dan Gouvernman.

Sa Gouvernman i enn ki respekte prosedir Lalwa. I respekte lendepandans Zidisyer. I pran son responsabilite pou fer sir ki Zidisyer i annan mwayen pou enplimant son travay atraver en Bidze, ki ganny propoze e

aprouve par Lasanble Nasyonal. E ki byensir nou pa pou esey dan okenn fason enfliyans zizman Lakour Siprenm oubyen Lakourdapel.

Mr Speaker rol Gouvernman se pou finans bezwen tou brans Gouvernman atraver Bidze nasyonal, ki ganny pase par Lasanble Nasyonal atraver en *Appropriation Act*. E ki byento an Novanm zot pou ankor enn fwa annan sa rol pou zot pas Bidze Nasyonal.

Dan sa ka spesifik, i osi enportan pou met an konteks lenformasyon lo sa ka, ki dayer i lenformasyon piblik ki *comme swivan*;

I enportan note ki sa ka i date depi 2014. E ki in annan vatevyen devan nou sistenm Zidisyer e osi aletranze. An Mars 2022 Lakourdapel ti rann zizman ki fodre sa ka in ganny re ekoute par Lakourdapel. Sa ti en desizyon Lakourdapel baze lo son prop prosedir.

Kan Lakourdapel ti decide pou remet sa ka de nouvo, sa ki nou ti konpran se ki ti napa okenn Ziz dan Lakour Sesel ki ti endepandaman kapab re ekout sa ka, akoz zot ti enplike deza dan bann diferan staz sa ka swa devan Lakour Siprenm oubyen dan bann rapel deza.

Lakourdapel - e mon repete. Lakourdapel ti alor fer en demann pou fer vin 3 Ziz ki pa'n zanmen enplike dan sa ka, pou ekout rapel de nouvo.

Demann ti ganny fer parey Lalwa i fer provizyon, ki CAA i fer demars pou rod sa 3 Ziz. Fer bann *interview*, fer rekomandasyon ek Prezidan baze lo merit e zot ti ganny aprouve. Bann Ziz ti sermante le 10 Oktob, 2022 e zot ti rann zizman le 21 Oktob, 2022. Byensir ki sa i vin avek son kou, ki enkli peyman zot servis, zot pasaz avyon, zot lotel e byensir transportasyon e lozistik pandan zot sezour isi Sesel.

Mr Speaker i pa fer premye fwa ki en tel prosedir i arive dan nou pei. In annan lenstans dan lepase kot Ziz etranze in ganny anmenn Sesel, dan sityasyon kot Lakour Sesel ti santi ki zot pa kapab pran serten ka.

Sa rapel in kout Gouvernman *comme swivan*; Pasaz avyon R388 mil. Reminerasyon tou le trwa Ziz ansanm R751mil. Akomodasyon R407 mil.

Lo keston, si pou annan okenn lanket lo si desizyon Lakour ti zistifyab? Mon bezwen dir ki mon soke ki Onorab i espekte Gouvernman enterfer dan desizyon Lakourdapel e en

zizman par son bann Ziz, e pou demande si i rezonnab ou zistifyab.

Nou, nou en Gouvernman responsab, ki travay avek respe pou tou lezot lebra Gouvernman. Nou respekte zot lendepandans. Nou rekonnet ki finalman se zot ki arbitre dan tou ka lazistis dan nou pei. Se zot ki annan sa pouwar Zidisyer dan nou pei. Nou pa pou zanmen enterfer dan zot desizyon final. Akoz sa i kont prensip nou Konstitisyon ki Lalwa Siprenm nou pei, ki dayer Onorab ou'n pret serman pou defann.

Me selman mon ti ava kontan dir ek Onorab, ki si i al dan Konstitisyon ki kouver CAA, i ava war ki prosedir i devret swiv si i santi ki sa ki'n arive i pa normal.

Malerezman i annan bokou ka kot Gouvernman in bezwen peye, pou ki demokrasi dan nou pei i kontinyen fonksyonnen. E sa i pou responsabilite nenport ki Gouvernman ozordi oubyen menm a lavenir. Mon espere ki sa in rann larepons tou bann kestyon ki'n ganny poze. Mersi bokou Mr Speaker.

MR SPEAKER

Mersi Vis-Prezidan mon pou annan ziskan 10er pou sa *PNQ*,

mon pou pran kestyon lezot Manm e rezerv en pe letan pou kestyon siplemanter *Leader* Lopoziyon.

Mon rapel bann Manm ki zot kestyon i bezwen reste lo size sa kestyon orizinal. Onorab Lemiel ou kestyon silvouple.

HON SYLVANNE LEMIEL

Mersi Mr Speaker. Bonzour *VP*, tou mon ban koleg Manm Onorab e tou bann dimoun ki pe ekout nou.

Mr Speaker ler vremen sa *case*, nou ti'n aprouv sa Lalwa e sa *case* ti pe komans al pase, en keksoz ki mwan koman en endividi ti pas dan mon nide, e ki pe fer mwan demann *VP* sa kestyon ozordi, mon espere ki *VP* ou ava kapab reponn mwan, i se ki arive ki en nenport ki nou pti endividi pa gro lakonpannyen, en pti endividi i ariv nou serten problenm nou'n ariv ziska Lakourdapel nou, nou santi nou pa'n ganny zistis e nou anvi prosed nou osi ziska pou sa bann Ziz Lakourdapel vini vin regard dan nou ka, en pe parey *Vijay* in ganny sa privez.

Eski Lakour i pou konsidere? E si ti arive ki en Lakourdapel Sesel in pas sa ka, e la nou pe rod lezot Ziz Lakourdapel ki pou vini sorti deor pou re vin ekout sa ka ki

Lakourdapel in ekoute, eski sa pti endividi i pou gannyen sa sans li osi pou pas dan menm tretman parey ki *Vijay* in gannyen? Mersi.

MR SPEAKER

Mersi. *VP* mon envit ou pou donn ou repons.

THE VICE-PRESIDENT AHMED AFIF

Mersi bokou Mr Speaker. Mersi bokou Onorab. Onorab sa prosesis pou ou ka pas devan Lakourdapel i en prosesis legal. Pou mwan sa ki mwan mon konnen, Lalwa ki diriz pei, pa si ou en pti dimoun, pa si ou *Vijay*, pa si ou nenport ki.

Ou fer ou ka baze lo merit, ou prezant li devan Lakour - dan sa ka ou pe koz Lakourdapel, e zot a deside. Se pa mwan ki pou vin dir si Lakour i devret ekout en pti ka, en gro ka e ki merit, ki fakter ki zot devret konsidere, pou zot fer sa bann tel desizyon.

Sa ka ti annan en prosedir ki'n ganny swiv. E le 21 Mars 2022 Lakourdapel, pa Gouvernman, pa nenport ki - me bann Ziz Lakourdapel baze lo merit ka ki ti'n prezant devan zot, ti deside ki sa ka i bezwen ganny re ekoute.

E mon krwar si nenport sitwayen i santi zot annan en ka

ki parey, zot ava fer zot prosedir parey Lalwa i demande, pou zot met zot ka devan Lakourdapel baze lo merit. E desizyon i ava ganny pran. Se pa en desizyon Gouvernman. Se pa mon ki pou reponn sa keston. Se Zidisyer, zot endepandan, nou respekte zot lendepandans. E mon krwar se sa ki nou Konstitisyon i dir. Mersi Mr Speaker.

MR SPEAKER

Mersi Vis-Prezidan. Onorab Cosgrow ou keston.

HON WALLACE COSGROW

Mersi Mr Speaker. Bonzour Mr Speaker. Mr Speaker avek tou respe pou Lasanble Nasyonal, malgre mon'n ganny dir ki poudir serten Manm Lasanble Nasyonal napa respe. Me par kont *weekend* nou tann Prezidan dir Lasanble Nasyonal i fer politik lasos tomat. Eski sa i en respe pou nou Lasanble Nasyonal, tou Manm Lasanble Nasyonal? Mon poz sa la.

Mr Speaker *VP* in dir nou koumsa poudir zot in depans environ R1.5milyon avek bann demars pou sa bann Ziz avek sa *case* li menm. R1.5milyon ki al anver *business class tickets*, ki al anver lapey pou sa bann Ziz, avek akomodasyon e osi lozistik pou sa bann Ziz dan en lespas -

si mon pa tronpe - apepre 3 ou 4 semenn. Par kont ozordi Sesel nou annan dimoun ki pe ganny en logmantasyon R500 menm mwens tanporer.

Nou annan dimoun ganny difikilte pou ganny asiste avek Lazans Proteksyon Sosyal. Nou annan dimoun ki ozordi pe bezwen pey bis R12. Eski Minis VP antan ki Egzekitiv ki donn e kontrol Bidze, eski ou war sa i en depans akseptab pou sa sityasyon?

Eski sa pa en presedans ki nou pe kree, e met en presyon lo Bidze Gouvernman ki dayer Egzekitiv ki ansarz, kot nou ava war bann presedans, ki sa in set en presedans, kot pli tar nou ava war bann lezot sityasyon kot bann Ziz pe bezwen vini e pe met en presyon lo Bidze Gouvernman, dan en pti lespas letan?

So eski VP i kapab donn nou en larepons lo la silvouple? E si i pa krwar - mon stres lo la - si i pa krwar ki sa pou met en presyon lo Bidze Gouvernman *going forward, given* ki nou annan Seselwa deor la ki pe ganny difikilte pou ganny fer de bout zwenn? Mersi.

MR SPEAKER

Mersi pou ou kestyon. Vis-Prezidan.

THE VICE-PRESIDENT AHMED AFIF

Mersi bokou Mr Speaker. Mersi Onorab. Wi definitivman okenn zizman, okenn travay Zidisyer i vin avek en kou. Parey okenn travay Lasanble Nasyonal i vin avek en kou. Malerezman parey mon'n dir dan mon diskour taler, i annan en kou pou ou fer travay e fer fonksyonnen demokrasi.

E se pa nou rol pou kestyon Zidisyer dan lafason i fer son travay. I annan plizyer lenstans kot Zidisyer i fer serten desizyon ki vin avek en kou. Mon ava donn ou zis detrwa legzanp. Ka konpansasyon La Misère ti kout Gouvernman plis ki R100milyon.

Ka Mr St Ange ki pa ti - napa naryen pou fer ek sa Gouvernman, in kout Gouvernman R7 ekek milyon. Me sa se kou ki en Gouvernman i bezwen respekte. Se en desizyon ki en Lakour in pran e nou, nou bezwen swiv nou demokrasi. Demokrasi i vin avek en kou.

Demen si i ariv en eleksyon dan en distrik aköz en Manm in sorti, Prezidan ti dizourd Lasanble en lepok avan son ler, be i vin en kou lo Bidze pou organiz eleksyon. I form parti sa kou pou fer fonksyonnen demokrasi.

Si sa kou i bezwen ganny peye se pa nou pou nou demande si i zistifye ou non. Nou rol se pou finans e fer fonksyonnen bann lebra Gouvernman. Se sa nou rol. E nou pou fer li, se sa rol nenport ki Gouvernman. Nou pa pou demande si i zistifyab ou non. Nou, nou servi en Bidze e finans ki ganny aprouve par sa Lasanble Nasyon, i ganny fer korekteman. Tou bann kou in ganny idantifye, tou bann kou i ganny zistifye e nou peye. Nou pa la pou kestyon Zidisyer. Mersi bokou Mr Speaker.

MR SPEAKER

Mersi. Onorab Cosgrow mon permet ou en pwen klarifikasyon silvouple, pa ladres. Mersi, ale.

HON WALLACE GOSGROW

Mersi Mr Speaker. Zis en pti klarifikasyon baze lo lefe ki VP i dir i annan bann kou ki vin avek serten keksoz demokrasi.

So eski VP i pare pou aksepte ki ozordi i annan bann kou ki vin avek lavi nou sitwayen Seselwa? E eski Gouvernman i pare pou ekout pep Seselwa e adres sa bann kou par egzantp kou lavi e met en pti pe larzan dan pos Seselwa? Mersi bokou.

MR SPEAKER

Mersi. Onorab ou kestyon pa annord avek kestyon orizinal. Mon a demann kestyon Onorab Loze.

HON JOHAN LOZE

Mersi Mr Speaker. Mr Speaker mon santi mon konsernen ki i annan en kiltir leksepsyon ki pe komans antre dan nou pei. Les mwan eksplik mon lekor.

Ou annan ou bann leksepsyon ki pe ganny fer pou bann personalite o plase. Bann personalite ki tourn otour politik. Ki swa sa ka ki devan nou ozordi, ki nou tou nou konnen i annan en politisyen ase o plase *involve* ladan.

Ouswa en lot legzanp se bann ka konpasyon pou ganny akse avek resours Gouvernman, i enn. E pli resaman ou annan ka kot sitwayen li i bezwen soufle lo semen e Minis i soufle dan kasyet. Apre Minis i soufle zero.

Mon kestyon se eski nou pe normaliz sa kiltir leksepsyon pou bann ki o plase e sa pov malere sitwayen li i bezwen soufle dan milye semen? Mersi Mr Speaker.

MR SPEAKER

Mersi. Onorab mon a zis fer remark e sa se pou latansyon

lezot Manm. Ki ou remark lo aksidan ki'n ganny raporte i pa annord e mon krwar i mank, i annan en mank en pe bon konprenezon ladan. Mersi.

Vis-Prezidan i annan en pwen ladan ki ou pou kapab reponn.

THE VICE-PRESIDENT AHMED AFIF

Mersi Mr Speaker. Mon pa tro asire lekel sa pwen ki relevan dan kestyon ki Onorab in dir. Eksepte si i annan leksepsyon. Mon pa war dan sa 3 kestyon ki in demande kote sa leksepsyon i antre. Mon ti dir klerman nou, nou respekte lendepandans Zidisyer e Lakourdapel.

Nou pa la pou nou ziz merit okenn desizyon Lakour Siprenm! Se pa mon rol pou vin met ankoz zot bann desizyon. Ditou, se pa rol Gouvernman. Nou respekte zot desizyon. E i annan en kou ki vin avek sa bann desizyon e nou rol se pou finanse. Mersi bokou Mr Speaker.

MR SPEAKER

Mersi Vis-Prezidan. Kestyon Onorab Audrey Vidot.

HON AUDREY VIDOT

Mersi Mr Speaker. Bonzour tou dimoun. Bonzour Vis-Prezidan. Vis-Prezidan mon ti le zis fer ou

rapel ki dan sa prosis Prezidan ki ti koz lo la dan son *press conference*. Kot li i ti dir ki bann Ziz napa konpetans pou zot dil avek sa bann tel ka. Sa mon le met lo rikord.

Dezyenm Vis-Prezidan, eski ou pe konfirm ek nou ou pe donn nou lasirans, se sa depans ki ou'n mansyonnen ozordi dan nou Lasanble, i sa menm depans e ki nou pa pe, nou pa espekte tann en lot depans parey in le ka avek bann lezot sityasyon kot nou'n bezwen letan nou'n demann kestyon ou Gouvernman? Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi Mr Speaker. Mr Speaker mon pa pou fer referans avek bann komanter ki swadizan Prezidan in fer, ki mwan mon pa - sertenman mon pa'n tann li, mon pa konpran li koumsa.

Zanmen in dir napa konpetans lokal. Sa ki mwan mon'n dir dan mon diskour bomaten, se ki ti napa Ziz lokal ki ti dan en pozisyon pou ekout sa ka, akoz zot in deza enplike swa dan Lakour Siprenm swa dan Lakourdapel. So ti napa Ziz dan Lakourdapel.

Se pou sa rezon ki zot pe rode. Napa okenn kestyon lo konpetans okenn Ziz dan sa ka. Alors vwala Mr Speaker se sa la rezon ki sa i koumsa.

E ou dezyenm konponan kestyon zis *remind* mon Onorab?

HON AUDREY VIDOT

Mon ti pe zis demann ou Minis, eski sa sif ki ou'n donn nou la bomaten i sanmenm sa vre sif ki depans ki zot in fer? Nou pa oule demen nou tann i en lot sif, en lot bor parey in le ka avek sif lezot sityasyon? Mersi.

MR SPEAKER

Mersi.

THE VICE-PRESIDENT AHMED AFIF

Mr Speaker nou, nou pey bann kou ki ganny prezante par Zidisyer selon Bidze ki zot annan. E zot swiv tou prosedir finansyel. Sa bann kou ki mon'n etale i bann kou ki Zidisyer in dir avek nou. Se pa nou ki kontrol zot.

Ler mon'n ganny sa kestyon mon'n demande atraver Minister Finans konbyen ki nou'n peye. Ki *invoice* ki nou'n gannyen ki relye avek sa. E zot in dir nou vwala bann *invoice* ki zot in gannyen. E alor nou swiv

prosedir. Nou pa pou kas Lalwa e nou swiv Bidze ki ganny aprouve par Lasanble Nasyonal. Mersi Mr Speaker.

MR SPEAKER

Mersi Vis-Prezidan. Kestyon Onorab Aglae.

HON EGBERT AGLAE

Mersi Mr Speaker. Bonzour Mr Speaker, tou Manm e VP. VP koman en reprezantan lepep ki ou'n ganny elekte e kot *tax payer's money* pe ganny servi, eski ou pa krwar poudir sa zizman son prosedir in vin koman en faver pou en lakonpanyen baze lo son relasyon ki i annan ek Gouvernman, ki pe *étame* en kantite proze pou Gouvernman an esey pou a lafen re vir sa zizman ki ti ganny donner par Lakourdapel e osi Lakour Enternasyonal?

Eski ou kapab dir ek pep Seselwa ki sa in ganny fer dan en fason zistis, me non pa faver? Mersi.

MR SPEAKER

Mersi. Vis-Prezidan.

THE VICE-PRESIDENT AHMED AFIF

Mr Speaker mon pe repet mon lekor, e mon pa pou fer okenn *statement* pou pas okenn

remark, okenn komanter, okenn zizman lo zizman Zidisyer.

Ou pe demann mwan pas en zizman lo zot zizman, mon refiz-e fer sa. Pa mon rol. Zot in pran en desizyon, sa desizyon in vin avek en kou. Mon'n donn zot detay e i nou rol pou nou fer sir zot fonksyonnen. E lazistis i fonksyonnen selon Lalwa Sesel, Lalwa Siprenm ki nou Konstitisyon. Mersi bokou Mr Speaker.

MR SPEAKER

Mersi. Mon ava pran kestyon siplemanter Onorab *Leader* Lopoziyon.

HON SEBASTIEN PILLAY

Mersi bokou Mr Speaker. E mersi pou bann larepons ki nou'n gannyen ziska la. Mon ti ava kontan zis ki *VP* i klarifye sa *timeline* sityasyon ki'n arive avek sa bann Ziz vini.

Dan enn son *press conference* Prezidan Larepublik ti anonse ki, ti fer en *statement* ki bann Ziz i annan dan serten ka ki zot napa serten konesans dan sa bann domenn, e alors zot pou bezwen anmenn bann Ziz etranze pou vin get sa.

Sa letan nou pa ti ankor ganny en Lalwa ki amann sa konteks. Zournalis ti redemann li, ti pe rod presizyon dan serten

ka, e i ti donn enn bann legzanp. So apre sa Gouvernman *LDS* in anmenn en Lalwa dan Lasanble ki'n ganny amande ki ti ganny vote par mazorite *LDS* dan sa Lasanble, pou zisteman kre en kondisyon pou sa bann Ziz vini.

Pli tar nou'n tann koz lo dan Nouvel ankor e mon pa kapab al dan sa ki ganny dir dan Nouvel aköz sa i kont *Standing Order*. Me eski *VP* - la nou pa pe koz Zidisyer la - eski *VP* pa santi ki dan lizye Lepep Seselwa lefe ki nou'n depans R1.5 milyon pou en pti pe mwens ki 3 semenn, pou nou ziz en ka ki Lakourdapel ti'n fini donn en desizyon kont sa lakonpannyen, eski *VP* pa krwar ki Seselwa la deor pou ganny, pou santi ki i annan serten kolizyon ant Gouvernman, *collusion* oubyen serten lenterferans Gouvernman dan travay Zidisyer? Sa i mon premye kestyon.

Mon dezyenm kestyon i vin lo lendepandans nou bann lenstitisyon. *VP* ou pe argimant ek nou bomaten ki lo mon trwazyenm kestyon - mon konpran byen Konstitisyon - ki prosedir se ki mon al kot *CAA* pou mwan anmenn en pwen konsern vizavi sa *case*. E mon fer mon laplikasyon devan *CAA*

pou sa arive, e pou bann piblik, manm piblik ki pe ekout mwan, sa i dan Konstitisyon.

Bomaten mon'n ekout *ruling* Speaker mon pa pe kestyon son *ruling* lo son desizyon ki in pran koman Speaker. Sa i baze lo mon desizyon pou mon pa vin Lasanble pou ekout Prezidan pou vin fer en *speech* politik ki mon pa kapab reponn.

Mon kestyon pou VP, si nou pe dir ki Gouvernman i annan respe pou bann lenstitisyon. E Onorab Loze in anmenn en legzanp resaman kot in annan en O Zofisye Gouvernman ki'n *involve* dan en aksidan ki pe kre en kantite sa ... piblik.

MR SPEAKER

Reste, reste lo ou kestyon silvouple.

HON SEBASTIEN PILLAY

Mon kestyon pou VP, eski VP...

MR SPEAKER

Yes, ou kestyon Onorab? Onorab Pillay?

HON SEBASTIEN PILLAY

Eski VP i kapab dir nou ki Gouvernman pe fer pou reasir Lepep Seselwa ki anba sistenm lazistis, anba nou bann striktir

Lapolis, tou Seselwa i ganny trete egal?

E mon dernyen kestyon mon ti annan 3 kestyon orizinal - mon dernyen kestyon VP, nou'n pey tiket *business class* pou sa bann Ziz. Nou'n pey lotel deliks. Nou'n donn zot en saler ase o. Sa bann Ziz in retourn menm desizyon dan sa ka ki ti ganny war oparavan.

E sa lakonpanyen pou *still* bezwen peye. Eski akoz Gouvernman LDS ti ganny elekte lo en baz, pou pa fer sa ki Gouvernman dan lepase in fer,

Eski VP ou krwar ki dan sa konteks partikilye apre tou sa proses ki'n pase, tou sa letan sa *case* in al dan Lakour Enternasyonal e kot menm *High Court* Langleter in donn *ruling* lo sa size,

eski ou pa santi poudir dan sa konteks ki la Gouvernman ti'n kapab pa depans sa larzan pou sa *particular case* ki la?

Mon pa pe al lo travay Zidisyer Mr Speaker mon pe konsantre lo Gouvernman. Mersi.

MR SPEAKER

Mon krwar ou'n poz ou kestyon Onorab. VP ou repons.

THE VICE-PRESIDENT AHMED AFIF

Mersi bokou Mr Speaker. Mr Speaker Onorab son premye kestyon i pe redemann mwan en lopinyon. E mon refiz-e pou donn li en lopinyon.

Mon la pou mon reponn kestyon lo bann fe ki devan nou. Mon pa la pou vin pas okenn lopinyon lo sa ki pep Seselwa pou krwar lo desizyon Zidisyer. Se pa mon rol.

CAA wi ou'n ganny demande pou, *well* mwan mon'n propoze avek ou. Ki si ou krwar desizyon i pa normal, i annan en prosedir anba CAA e ou kapab swiv sa prosedir anba CAA, pou ou regarde kote i anmenn ou. E sa i nou Konstitisyon. E byensir i annan en prosedir ki swiv sa. Mon mazine Zidisyer pou enplike ladan ankor. E ou ava swiv sa prosedir.

Eski bann lezot sistenm ki dan pei i permet ki ou pou ganny sa lazistis? Mon mazine wi, parske nou depan lo brans Zidisyer dan tou ka lazistis dan sa pei. E nou pa kapab enterfer ladan.

E eski mon krwar ki Gouvernman ti kapab evite pey sa bann kou aköz Lakour ti'n deza rezet sa ka?

Mr Speaker e Onorab atraver ou, nou, nou pou swiv e nou pou respekte lord Zidisyer. Nou pa la pou nou kestyonn...

Zot in sey detrwa fwa pou trenn mwan dan sa direksyon pou kestyonn desizyon Zidisyer. Mon refiz-e fer sa. Pa mon rol, i mal. E nou, nou pou swiv nou sistenm ki ganny defini anba nou Konstitisyon Lalwa Siprenm nou pei. E si i annan kou ki asosye avek se nou rol atraver Bidze, atraver zot laprouvasyon isi, pou fer sir ki resours i ganny donner pou fonksyonman nou demokrasi ki enkli Zidisyer. Mersi bokou Mr Speaker.

MR SPEAKER

Mersi Vis-Prezidan. Nou ariv a lafen sesyon pou sa *PNQ*. Mon remersye Prezidan e mon envit li fer son depar. Nou ava pran en poz *sanitizing* avan nou apel lot delegasyon pou kestyon. Mersi Vis-Prezidan.

(technical break)

MR SPEAKER

Bonzour e byenveni Minis Marie-Celine Zialor Minis pou Lafanmir, Lazenés e Spor. E avek ou delegasyon Mr Clive Roucou *PS* pou Departman Lafanmir e Mr Ralph Jean-Louis *PS* pou Lazenés e Spor.

Nou pe pran 3 kestyon. Mon annan apepre 15 minit pou sak kestyon. Mon komans

avek kestyon 174 Onorab Philip Arissol.

HON PHILIP ARISSOL

Mersi Mr Speaker. Bonzour Mr Speaker. Bonzour tou dimoun. Bonzour Minis ek ou delegasyon. Mon kestyon i lir koumsa: -

Eski Minis i kapab dir Lasanble:

Ki NSC pe fer pou ankouraz e donn sipor avek bi ogmant lakantite lantrener lokal pou diferan spor dan pei, pou prepar nou atlet pou Zwe De Zil 2023 e Zwe Olenpik 2024?

Ki kantite lantrener lokal i annan ki pe travay avek bann Lekip Nasyonal e ki grad zot annan? Mersi.

MR SPEAKER

Mersi Onorab. Minis ou repons silvouple.

MINISTER MARIE-CELINE ZIALOR

Mersi Mr Speaker. Bonzour Mr Speaker. Bonzour lekip. Bonzour tou Manm Onorab e bonzour tou dimoun ki a lekout. Mersi Onorab pou ou kestyon. Mr Speaker dan reform ki nou pe fer kot NSC nou'n revwar sa pozisyon ki nou apel *Coaches Commissioner* ki en pozisyon ki a plen tan.

I ti deza la li depi an 2016 sa pozisyon, me ti napa personn ki ti formelman ganny apwente dan sa pozisyon. Nou'n met lanfaz pou fer sa bouze e nou'n kapab apwent en dimoun dan sa pozisyon depi Novanm 2021.

E zisteman Mr Speaker parmi son responsabilite, sa Konmisyoner pou bann lantrener son responsabilite se organiz bann diferan kour pou elev nivo nou bann lantrener lokal ki travay avek nou bann Lekip Nasyonal. E sa bann kour i osi ouver pou bann lezot lantrener.

Mr Speaker an se moman i annan an tou 23 lantrener lokal, ki pe travay avek nou bann Lekip Nasyonal. I annan 10 ki a plen tan - *full time*. E 13 i travay tan parsyel - *part-time*.

Nivo sa bann lantrener i varye depi nivo 1, *level 1* parey nou dir an Angle ziska *level 4*. E zot pou konstate Mr Speaker ki sa bann sif ki mon pe donner la, i pa pe kouver tou bann disiplin sportif akoz i annan zis 23.

Sa se akoz i annan disiplin ki dan proze prezan ki zot pe finaliz nominasyon zot bann lantrener, e mesaz ozordi se pou zot degaze pou zot kapab fer li. Mersi Mr Speaker.

MR SPEAKER

Kestyon Siplemanter Onorab Arissol.

HON PHILIP ARISSOL

Wi Mr Speaker. Eski Minis i kapab dir Lasanble lekel ki fer evalyasyon lo bann lantrener pou war si i annan progre dan devlopman bann atlet ki an preparasyon pou bann konpetisyon nasyonal e enternasyonal ki nou espekte partisip ladan e lekel ki mezir sa bann progre? Mersi.

MR SPEAKER

Mersi. Minis.

MINISTER MARIE-CELINE ZIALOR

Mersi Mr Speaker mon ti ava demann PS pou reponn silvouple.

MR SPEAKER

PS ou annan laparol.

PS COLIN JEAN-LOUIS

Mersi Mr Speaker. Bonzour tou Manm Onorab, bonzour tou dimoun ki pe ekoute. Sa kestyon lekel ki responsab? Sa i en rol ki sa *Coachers Commissioner* i zwe koman sa dimoun ki *oversea* bann *coaches*.

E osi i annan bann Federasyon kot i annan en *Coaches Commission* ki zot ki

fer sa prose elekte e zot osi ki *monitor* travay ki sa *coach* ki zot in apwente i fer lo nivo nasyonal. Mersi.

MR SPEAKER

Mersi PS. Kestyon siplemanter Onorab Roucou.

HON MICHEL ROUCOU

Mersi Mr Speaker. Bonzour Minis. Bonzour PS. Minis mon kestyon i koumsa.

Lo kestyon Onorab Arissol. Eski i annan lantrener etranze osi ki pe ede dan sa demars? Mersi.

MR SPEAKER

Mersi. PS pou pran laparol.

PS COLIN JEAN-LOUIS

Mersi Mr Speaker. Mersi Onorab pou ou kestyon. Pou lemoman nou napa lantrener *foreign coaches* ki pe angaz li avek nou bann lekip lo kote Sesel, *ok*, be selman nou annan bann atlet ki pe *train* aletranze ki zot pe ganny kadre par en *coach* etranze.

Me sa i en prose ki nou amelyore kot nou kapab ganny bann *technical assistant* nou pou pran, *ok*? Par egzanp bokse, nou pe koz avek en dimoun pou pran pou asiste zot an preparasyon pou Zwe De Zil. E nou konnen parey ler nou pe

koz lo *beach soccer* ki Sesel pe *bid* pou *host*.

E nou pou osi *feature* dan Zwe de Zil ki posibilite i la pou apwent en *coach* etranze pou travay akote bann *coach* Seselwa. Mersi.

MR SPEAKER

Mersi. Kestyon siplemanter Onorab Romain?

HON GEORGES ROMAIN

Mersi Mr Speaker. Minis bonzour avek ou delegasyon. Minis loter kestyon i pe demann lo kote bann lantrener lokal. An vi ki kot nou konnen toultan dan lepase ti annan bokou bann etranze ki ti pe *coach* nou bann lekip *National Team*.

La ki nou pe koz lo lantrener lokal ou kapab dir nou, nou bann lantrener lokal si zot pe ganny en *package* oubyen *incentive*, oubyen parey koman en saler, konbyen vreman zot pe gannyen pou kapab ankouraz zot pou zot reste dan sa pozisyon? Mersi Mr Speaker.

MR SPEAKER

Wi PS Jean-Louis i ava pran laparol.

PS COLIN JEAN-LOUIS

Mersi Mr Speaker. Mersi Onorab. Ti annan en *package* ki

zot ti deza pe travay lo la depi 2016. E nou'n vwar ki i demann amelyore. E sa travay pe ganny fer pou finalize e pou donn zot en *package* ki en pti pe pli *conducive* pou zot kapab travay avek.

E osi ler ou pe koz *package*, i annan bann lezot *training* ki nou pe vin avek;- par egzant Mr Speaker atraver ou Onorab Arissol i konn byen i annan sa PAISAC ki ed en kantite avek *train* nou bann lantrener.

I annan bokou ki al *train Canada*. E zot pe vin fer en sesyon an Zanvye pou nou bann lantrener nasyonal ki pe travay ek nou bann lekip. Mersi Mr Speaker.

MR SPEAKER

Mersi. Kestyon Onorab Pillay.

HON SEBASTIEN PILLAY

Mersi. Mon ti ava kontan demann Minis konbyen atlet ki annan vi ki sa *part (b)* sa kestyon i koz lantrener lokal ki annan pe travay avek Lekip Nasyonal ki grad zot annan?

Mon ti ava kontan konnen par kont konbyen atlet ki annan bann *coach* etranze ki pe travay avek zot, oubyen lekip ki annan bann *coach* etranze? Apre i annan bann atlet ki PS in nonmen bann endividi.

Konbyen zot ki annan bann *coach* etranze avek zot?

E ki prosedir ki ganny fer pou ki en atlet par egzant ki lo novo sa ki nou apel onivo, i fer par egzant pou li kapab ganny en *coach* - si nou pe dir nou le pouse lo sa standar - i ganny en *coach* ki kapab pous lo sa standar swa lokal swa etranze?

E dezyenmman Mr Speaker, an relasyon ek servi en lasosyasyon par egzant mon konnen poudir Lasosyasyon Naze ti ankor annan bann *issues* ki pe ale vini Ankour.

Dan sa konteks kot ou annan sa bann konsern. Lekel ki swazir bann *coach* ki akonpanyan bann atlet ki al fer bann konpetisyon? Par egzant mon konnen i annan CJSOI ki pann *coach* pe ale. Lekel ki travay lo swazir sa bann *coach*? E ki rol ki Departman Spor oubyen NSC i bezwen zwe dan sirkonstans kot en lasosyasyon i ankor annan bann keksoz legal ki i bezwen *sort out*?

Koriz mwan si mon mal, sa bann keksoz in fini ganny *sort out*. Me ki arive dan sa sirkonstans e lekel ki *step in* pou fasilite ki bann antrenner, bann ankadre ki kapab ed sa bann atlet *achieve* en rezilta, i pe partisip avek sa bann atlet ler zot pe sa bann konpetisyon? Mersi.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou detruwa kestyon. Mon pou reponn en pe e mon ti ava kontan *PS* i adres - si i annan sa lenformasyon;- aköz pa sa ki ti kestyon konbyen bann atlet ki annan *coach* enternasyonal pou li kapab donneren avek li.

An sa ki konsern sa dezyenm kestyon lo bann lasosyasyon e bann Federasyon kot i annan difikilte. Pou lenformasyon *Leader* Lopozisyon wi sa *case* naze i ankor Ankour.

Me selman nou fer sir ki bann atlet e bann lantrener pa ganny afekte. NSC i annan en *Technical Committee*. I annan *High Level* ki la prezan mon pe *Chair*, ki nou pe fer sir ki sa bann prosedir ki ti napa pou ganny *coach* pou ensidswit, pou nou kapab met an plas.

E kot i konsern si i annan okenn lakonpanyan bann *coach* pou al avek bann atlet. Sa i ganny deside Mr Speaker par sa *Technical Committee* parey *Technical Committee* deside lekel disiplin ki pou partisipe. I fer sa koman en Komite ki enkli

partisipasyon si disiplin konsernen son Federasyon, son lasosyasyon.

Toultan ki son Federasyon Lasosyasyon i legal, nou negosye pli kantite negosye ki nou kapab negosye. E Departman pe ekrir bann gid prezan ki konsern tou sa bann konpetisyon ki Gouvernman i fonde, ki Gouvernman i *fund* pou nou kapab met en pti pe, keksoz i ava kler. Met devan Lasosyasyon Federasyon ki mannyer nou pou fer a lavenir letan nou annan sa bann keksoz ki pa kler.

E si i annan okenn dimoun ki annan okenn *grievance* parey in annan dan lepase i pe annan en pe la. Nou ape fer zot ekrir departman en let formel apre pou nou kapab dil avek.

Mon ti ava kontan prezan Mr Speaker pas laparol avek PS Jean-Louis pou li regarde si i annan lenformasyon lo konbyen atlet ki annan *coach* enternasyonal. Mersi.

MR SPEAKER

PS ou annan laparol.

PS COLIN JEAN-LOUIS

Mersi Mr Speaker. Mersi Onorab. Mon pou napa sa sif egzakt bann atlet ki annan, be selman mon pou zis gid ou kote

zot vini zot tonm bann ki tonm dan *Olympic Solidarity Scholarship*.

Zot, zot annan bann lantrener enternasyonal akoz zot pe *train* aletranze. Prezan i en swa ki ou fer, ou kapab *train* lokalman *ok*, ek ou *coach* lokal oubyen ou kapab *train* aletranze. E sa bann lenformasyon nou kapab fer ou gannyen Onorab. Mersi.

MR SPEAKER

Ok wi klarifikasyon. Ou a permet nou *move* on apre.

HON SEBASTIEN PILLAY

Non Mr Speaker, i zis en presizyon ki mon le demann Minis zis pou mon fer sir mon ganny li kler. So, Minis eski ou pe dir mon se ou ki Chair sa *Technical Committee* ki desid lo bann atlet? Petet mon'n mal konpran zis gid mwan lo la. Mersi.

MR SPEAKER

Mersi Minis.

MINISTER MARIE-CELINE ZIALOR

Mersi Mr Speaker. Non, non, non, non, *Technical Committee* pa mon ki *Chair*. Sa bann dimoun kot NSC ansanm en Departman. Nou, nou *Chair*, mwan mon *Chair High Level* ki

fer Polisi, ki fer *guideline* pou *High Level*. E sa *High Level* i deside ki i annan en *Technical Committee* ki annan lezot Komite ki pran sa bann desizyon. Mersi Mr Speaker.

MR SPEAKER

Mersi Kestyon Onorab Uranie.

HON ROCKY URANIE

Mersi Mr Speaker. Bonzour Minis avek ou delegasyon. Minis, eski tou bann lantrener ki pe akonpanyi bann atlet zot kalifye, zot annan sa nivo pou zot akonpanyi sa bann atlet enternasyonal sirtou dan naze?

E apre pou nou kapab fer atlet vin lo nivo nasyonal nou bezwen komans *train* zot *grassroot*. Par egzanp ou vwar La Digue nou annan bann atlet ki'n fer tre byen dan sanpyonna atletik e zot nivo ti tre o. Me parey la i annan *CJSOI*, nou'n vwar ki i annan in ganny kit ater.

E paran sa bann atlet zot menm zot dezapwente e menm sa lantrener i dezapwent ek ki mannyer sa sityasyon in ale. Mwan mon le konnen eski zot pou annan *coach* spesifikman lo La Digue, vi ki nou annan bann zanfan ki bon dan atletik pou ki zot kapab antrenn sa bann zanfan, pou fer zot vin lo nivo ki Nasyonal pe demande

pou zot osi kapab ganny zot sans pou partisipe? Mersi.

MR SPEAKER

Mersi Onorab. Wi Minis in endik *PS* pou reponn.

PS COLIN JEAN-LOUIS

Mersi Mr Speaker. Mersi Onorab. Annefe Onorab en bon pe sa ki ou'n koz lo la ti annan en konversasyon semenn pase nou de. E mon'n ankouraz sa lantrener pou anvoy son *grievance* ki nou fek resevwar bomaten. E nou pe angaz avek Federasyon Atletik pou nou vwar ki mannyer nou kapab remedye sa sityasyon.

Ler ou pe koz bann lantrener lo zil Praslin, La Digue zot ganny konte koman bann lantrener parey lo Mahe, e zot devret ganny enkli dan tou program ki annan.

Ofet ler nou pe koz lo sa *Coaches Commissioner*, se enn son rol se osi pou anmenn sa soutyen bann lantrener lo *Inner Island* Praslin ek La Digue. Mersi Mr Speaker.

MR SPEAKER

Mersi *PS*. Mon ava termin avek Onorab Norbert Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon.

Bonzour tou Manm, tou dimoun a lekout.

Mr Speaker mon kestyon i vize ver bann atlet *High Level*. Ou'n dir ki i annan bann *scholarship* pou serten bann *High Level* ki zot ale vi ki napa *coach* etranze isi. Mon anvi demande vi ki i annan dimoun ki bon lo spor be selman zot pa pou kalifye pou en *scholarship* petet, pou zot ale. Eski Minister zot i annan bann *training*, vi ki nou napa sa dimoun etranze lokal i kapab fer sa pou travay i osi lokalman?

Eski i annan bann *training camp* ki zot pou fer pou anvoy serten dimoun deor *or* serten *attachment* parey ti abitye arive dan lepase, pou ki zot ava ganny sa leksperyans apre ler i annan sa konpetisyon zot sot ladan konmsi en pe vitman? Konmsi fer li en pe pre ek konpetisyon. Sa i mon kestyon.

Apre lo kote, en lot ti pwen mon anvi ranforsi pwen Onorab Uranie. Vi ki tou le-z-an nou annan sa group atlet ki vin fer atletik e ki fer byen. Mon anvi demann zot alors, in koz lo kote, ki zot pe fer pou anmas sa bann marmay?

Akoz laplipar di tan sa bann marmay apre in perdi ou pa war zot. Ki zot pe fer zot pou anmas sa bann marmay pou fer

sir ki tou le-z-an nou annan en *pool* marmay ki nou pou bouz zot dan *High Level*. Mersi.

MR SPEAKER

Mersi. Mersi Onorab Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou bann kestyon. I annan bann premye parti kestyon *PS* i ava reponn. Mon pou reponn ki nou pe fer. Nou'n deza etabli reetabli sa *High Level* pou nou kapab met en pe lord ladan.

Ou konnen avan ler Mr Speaker, avan ler nou kapab fer okenn bann program - mwan mon koz bokou lo disiplin dan *sports*, i bezwen komans par bann disiplin ki nou bezwen etabli anndan.

E nou bezwen etabli bann prosedir ase syantifik kot nou annan en fason fer ki ase ekitab e ki fer pou tou dimoun kapab ganny en sans.

Nou ti'n deza konmanse. Dek apre ki Sanpyonna Nasyonal Atletik ti'n fini. Ti annan. Nou dimoun ki responsab *High Level* ti al Praslin ek La Digue, akoz sa 2 lekol ki ti fer pli byen, ti'n nobou kapab komanse fer en pe *profiling* pou regarde.

Me selman sa i nou'n bezwen pa kontinyen avek Mahe, akoz i annan en pe gid avek en pe Polisi, en pe *framework* ki pa an plas. Napa an plas. Nou bezwen fer sir nou met sa an plas pou nou kapab fer bann bon desizyon.

Akoz sanson si ou napa kriter ki mannyer ou fer desizyon, ki mannyer ou eksplike poudir en dimoun i antre lo *High Level*, en dimoun i pa antre lo *High Level*.

Vwala ki ou vwar nou'n bezwen met en bon pe sa bann striktir an plas ki ti napa. Nou pa'n vin zwenn, napa la. E nou bezwen vwar toultan. Nou bezwen pe komans en pti pe pli deryer, pou nou kapab met sa bann keksoz an plas, pou nou kapab fer sa.

Be selman Mr Speaker sa bann *grassroot* devlopman sa i osi travay Federasyon. I osi travay bann lasosyasyon. Parey futbol in nobou kapab komans fer, son program o nivo son program komans depi dan lekol avek en bon pe negosyasyon avek Minister Ledikasyon.

E sa ki nou osi tou bezwen fer platform pou sa bann Lasosyasyon Federasyon ekip zot don zot osi bagaz pou zot kapab ariv lo sa nivo. E mon ti ava kontan Mr Speaker pas

laparol avek *PS* Jean-Louis pou reponn premye parti kestyon. Mersi.

MR SPEAKER

PS ou annan laparol.

PS COLIN JEAN-LOUIS

Mersi Mr Speaker. Mersi Onorab. Lo kote *training camp*, sa i en desizyon ki sa Federasyon ki fer, i fer son *request* ler i konnen ki bann *major games* ki i annan. E li i prepar li e i anvoy son *request* kot *NSC*.

Zis pou azoute, ki i annan par egzanp la an se moman nou annan bann Konsil Onorer ki Sesel, kot laport i ouver pou en ta loportinite. Fodre nou, nou pran sa bann sans ki vini.

Nou pran li serye sirtou bann Federasyon ler i annan bann *request* ki vini, nou met atlet nou donn atlet sa posibilite pou zot al sa bann *advancement* dan zot preparasyon, *ok?* Mersi.

MR SPEAKER

Mersi *PS*. Mon a pran kestyon 175 Onorab Naddy Zailor.

HON NADDY ZAILOR

Mersi Mr Speaker. Bonzour tou dimoun, bonzour Minis. Mon kestyon i lir koumsa: -

Eski Minis i kapab enform Lasanble lo leta bann diferan Lakaz Dimoun Aze lo Mahe, Praslin e La Digue an sa ki konsern renovasyon?

Ki bann program ki annan an plas pour asir kontinyite e devlopman sa group dimoun ki pe ganny abrite dan bann *Homes*?

Eski sa bann program pe osi tous bann dimoun aze dan bann kominote e dan ki fason? Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pou ou 2 kestyon. Mr Speaker, letan Gouvernman ti pran zesyon sa 9 Lakaz bann Dimoun Aze ti napa en *maintenance plan*. Sa in fer ki tou nou bann lakaz i ganny avarye an term son bann striktir. E definitivman se sa ki pou arive letan nou pa mentenir bann batiman byen.

Bann problem ki frekan ki nou pe fer fas avek i *comme swivan*;

Lakaz koule, i koule kot prezan plafon osi ou bezwen sanze, ganny afekte. Bann *flasher board* avek dalo ki kase. E akoz sa prezan ou ganny

bann lakaz ki letan i annan lapli i annan *flooding* dan son *compound*. Nou annan serten lakaz delo anba fondasyon ki ape monte.

Nou annan en bon pe bann rigol ki'n bouse. Nou annan bokou bann twalet ki pa ti pe fonksyonnen ki nou bezwen aranze. I annan bann *cabinet* dan bann lakwizin ki pe tonm tousel. E nou osi bokou bann problem *plumbing*.

Aprè ki nou ti'n konn severite leta nou bann Lakaz Dimoun Aze Mr Speaker, nou ti demann Lazans Lenfrastriktir pou zot fer en evalyasyon detaye. Pou ki nou pa zis fer bann *quick fix* me ki nou fer en *maintenance plan* apropriye depandan lo nou Bidze byensir. E sa nou ti fer an Zen sa lannen.

Mr Speaker mon ti ava kontan enform Lasanble ki sa size *maintenance* Lakaz bann Dimoun Aze i prekip nou bokou, mon vwar nou sa lannen nou pas bokou, bokou letan avek sa. E mon'n fer en pe diskisyon osi avek Minis Finans zis avan nou soumet Bidze pou sa lannen, pou nou rod en pe sipor e rode ki mannyer nou kapab rezourd en pe sa bann problem en pti pe pli vitman.

E osi swivan vizit Prezidan La Digue detrwa zour pase, in

vwar leta Lakaz bann Dimoun Aze La Digue. E apre ki in swiv bann diskisyon lo sa size - aköz nou'n koz bokou lo la sa lannen - e in kapab negosye avek Minister Finans, pou nou kapab ganny Bidze pou aranz sa batiman an antye. E nou pa bezwen espere sa lannen. E sa i pou ariv en total 2.6 milyon ki i ede e nou kontan ki nou kapab aranz li antye La Digue.

An ki konsern Mr Speaker kontinite devlopman bann aktivite dan bann *Home*, Departman Lafanmir i rekonnèt ki Sesel nou annan en gran porsyon nou popilasyon ki aze. E zot osi pe viv pli lontan. Savedir nou pou bezwen met an plas bann program ek aktivite, pou nou kapab pli byen deservi zot bezwen.

Avek restriksyon ki'n ganny retire, bann administrater dan bann *Home* ansanm avek Divizyon ki Responsab bann Dimoun Aze, zot in komans met an plas bann diferan program rekreyasyonnel;

Par egzanp bann sesyon *Yoga* pe ganny fer, lakoutir, lagrikiltir, domino e osi legzersis fizik, ki nou ganny soutyen Seksyon Spor Tou Tou kot NSC, pou nou bann dimoun aze dan bann *Home* pou permet

zot reste aktiv, fizikman e osi mantalman, emosyonnelman.

Lo nivo lakominote, pou lemoman Divizyon ki Responsab bann Dimoun Aze pa ankor tro kapab al ladan. Ti sitan annan pou fer dan nou bann *Home* ki nou pa'n tro ganny sans fasilite aktivite pou lezot dimoun aze dan kominote dan pei ki pa dan *Home*.

Me nou byen kontan, nou'n apros Gouvernman Lokal, nou'n ganny sipor e Gouvernman Lokal in fer en pe aktivite pou bann dimoun dan nou kominote. Nou bi an 2023 Mr Speaker, se pou annan plis kolaborasyon avek bann diferan lorganizasyon gouvernmantal osi prive e osi sosyete sivil, pou fer bann program ek proze pou tou nou bann dimoun aze dan pei. Mersi Mr Speaker.

MR SPEAKER

Mersi Minis. Onorab Zialor ou siplemanter.

HON NADDY ZIALOR

Mersi Mr Speaker. Mersi Minis pou ou larepons byen detaye e avek bokou lenformasyon. Minis ou'n nonm 2.6milyon pou renovasyon La Digue. Be baze lo sa *history* ki ou'n donn nou, (*sorry* pou Praslin) - bann travay ki zot in bezwen fer depi

ler zot in antre, eski ou annan sif depi ler zot in vini par lefe ki ti napa en plan *maintenance*?

Eski ou annan en sif ziska aprezan, ki kantite larzan ki Gouvernman in depanse dan bann, tou bann *Homes* pou sa bann renovasyon? Mersi Mr Speaker.

MR SPEAKER

Mersi Onorab. Minis ou repons silvouple.

MINISTER MARIE-CELINE ZIALOR

Mersi Mr Speaker. Mr Speaker pou bann detay, mon ti ava kontan pas laparol avek ou permisyon avek *PS Roucou* pou li reponn. Mersi.

MR SPEAKER

Mersi. *PS*?

PS CLIVE ROUCOU

Mersi Mr Speaker. Bonzour Mr Speaker. Bonzour tou Manm Onorab.

Mr Speaker dan laliny keston Onorab Zialor, i enportan pou note apre ki Lazans Lenfrastriktir ti fer sa evalyasyon lo nou bann *Home*, in ariv en total apepre 16.7milyon travay ki devret ganny fer lo tou nou bann *Homes*.

Mon kapab al dan en pti pe plis detay par egzanp pou Point Larue en pe plis ki 800mil. Plaisance - 2milyon. Anse Boileau apepre 2milyon. La Riviere Anglaise - 2.4milyon. La Digue - 2.6milyon. Praslin - 2.4milyon. Anse Royale - 1.8 milyon e La Retraite - 3.2 milyon.

Sa i total apepre 16.7milyon larzan ki devret ganny mete pou nou bann *Home*. Me mon napa en *amount* spesifik lo kantite ki nou'n depanse ziske la.

Me selman *throughout* nou'n asire nou'n met tou travay an priyorite. E sa ki vin an priyorite nou met li an plas par egzanp, si *plumbing* i annan problem nou fer li. *Plumbing* nou fer li.

Laport kase, kot nou'n war nou bann *home* in avarye e kantite. Me tousala i vin en priyorite an term lekel ki vin avan.

Be mon napa sa spesifik *amount* ki nou depanse ziska la konmela. *Ok thank you, thank you Minister*. Ziska la nou'n depans apepre R180 mil zis bann detay ki nou'n fer lo bann renovasyon spesifik. Mersi Mr Speaker.

MR SPEAKER

Mersi *PS*. Siplemanter Onorab Pillay.

HON SEBASTIEN PILLAY

Mersi Mr Speaker. Mr Speaker prenon kont ki Minis, i kontan *remind* nou, ki sa ki zot in zwenn - e i fer 2an i a pe *remind* nou lo sa ki zot in zwenn. So mon pe demann mon lekòr kan ki Minis pou komans travay lo sa ki i sipoze pe fer?

Minis ou ti reponn en *PNQ* pa tro bokou letan pase, kot ou ti eksplik nou ankor enn fwa menntenenns dan Lakaz Dimoun Aze. Mon pa konnen kote Onorab Zialor ti ete sa zour.

Me ou ti osi eksplik nou, e nou ti annan dan en *Cabinet decision* ki R1000 pou ganny tire - pou ganny pran lo larzan ki sa bann dimoun i gannyen, pou al ver menntenenns.

Eski baze lo sa desizyon ki Gouvernman in pran, ki ou pe dir mwan la, pou al ver Minister Finans, pou met sa larzan ver menntenenns sa bann *Homes*. Ki sa larzan ki sipoze ganny tire lo sa bann dimoun aze, pa pou ganny tire parey Gouvernman ti'n antisipe pou fer dan desizyon *Cabinet* le 12 Oktob? Ki ti ganny raporte le 12 Oktob.

Dezyenmman Mr Speaker, mon ti a kontan ki Minis i klarifye pour nou. So

Gouvernman in antre an 2020, 2021 ti annan en Bidze pour reparasyon bann *Homes*.

Eski Minis pe dir nou ki depi 2021 ziska la, zot in depans zis R180mil lo menntenenns pou bann *Homes*? E akòz ki zot in nobou, zot in depans zis R180mil kan zot ti vwar poudir i annan tou sa problem kot sa bann *Homes*? Mersi Mr Speaker.

MR SPEAKER

Mersi. Minis ou repons.

MINISTER MARIE-CELINE ZIALOR

Mersi Mr Speaker. Mersi Onorab pour ou kestyon. Mon krwar sa enn premye Mr Speaker, parey Onorab in dir, mon krwar li osi i ti la, mon'n fini reponn sa kestyon, konsernan sa *PNQ* lo sa size, byen an detaye.

Sa dezyenm pwen lo son konsern si an 2021, si larzan pa ti ganny mete pou fer sa? Be zisteman Mr Speaker, akòz kantmenm petet kekfw nou tant pour nou - akòz mon *remind* akòz parfw nou tant pour nou bliye, ki nou'n vin zwenn. E i pa pou fer *reminder*, pou fer okenn pwen, pou fer okenn personn anbarase.

I zis pour nou kapab vwar kote nou ete, kot nou pe

komanse pou bann dimoun konpran, parfwa bann progre ki nou pe fer ki enn pti pe dousman pou eksplike akoz kot nou'n vin zwenn.

E wi nou'n bezwen pran bann desizyon avek Lazans Lenfrastriktir, nou'n ganny dir annou pa ale pour nou zis depans larzan, pour nou repar en keksoz ki petet - si ou pou al met en *quick fix*, ou pou al repar li, ou a pe gaspiy larzan akoz petet ou bezwen kase, refer.

E nou'n bezwen esper Lazans Lenfrastriktir, mazin li osi i nouvo etabli li, pour li fer. Akoz nou, nou napa teknisyen, ki kapab fer sa bann travay enzenyer pou al regard tou sa bann *Homes*. I annan 9. Zot in bezwen al fer enn par enn fer *scope of work* al fer sa detaye.

Sa fek fini fer Zen. En Gouvernman responsab, i pa depans larzan zis koumsanmenm, zis akoz sa R180mil la i bann tiyo, bann plafon ki pe koule, ki ti pe koul lo sa bann dimoun, ki zot ti a pe dormi dan mouye.

Sa nou'n bezwen fer manner, akoz nou'n fer sir nou organiz nou bann dimoun aze byen. Nou'n bezwen organize, pou nou kapab fer. Pour nou kapab al demann Bidze, nou kontan travay lo lenformasyon. Nou'n bezwen – *PS* in vini, in

organize, in bezwen dir annou fer antye e regarde, konbyen e regarde. Eski i vo lapenn, si annan keksoz pou aranze ou aranz la, ouswa ou fer en lot keksoz striktirel ki pou kapab, *last* ou - depans larzan byen - ki ava *last* ou pou detrwa lannen ki pe vini.

E letan prezan ou fer ou *maintenance plan*, pou konnen kan ki ou sipoze fer renovasyon, kan ki ou sipoze fer keksoz lo la, pour nou kapab fer li byen. Vwala Mr Speaker akoz in pran en pe letan. Mersi.

MR SPEAKER

Mersi. Onorab permet mwan mon annan plizyer Manm ki pe demann kestyon.

HON SEBASTIEN PILLAY

If I may Mr Speaker, mon ti a kontan, demann ou pour entervenir pour mwan kapab ganny en klarifikasyon.

Mr Speaker i fer dezyenm fwa depi bomaten, dan Lasanble i annan *freedom of expression, and freedom of speech ...*

MR SPEAKER

Wi-wi...

HON SEBASTIEN PILLAY

E sa i aplik pour ou osi, enkli ki aplik pour mwan. Nou tou lede nou annan sa ...

MR SPEAKER

Klarifikasyon silvouple.

HON SEBASTIEN PILLAY

So mon klarifikasyon. I fer dezyenm fwa mon demann en Minis en kestyon e Minis pe al anba en provizyon anba nou *Standing Order*, ki i pe refize pou donn mwan en larepons *basically*.

Mon kestyon pour Minis Mr Speaker sete pa pou reponn mon *PNQ*. Sete lefe ki Gouvernman ti'n pran desizyon, pour tir sa R1000 ki pou al osi ver menntenens. La nou pe ganny en nouvo lenformasyon, ki Minis pe dir nou poudir i annan larzan ki pe ganny mete pour menntenens. Mon ti pe zis demann Minis en klarifikasyon,

Eski Gouvernman in *go back to* sa desizyon? En kestyon lezitim. So mon pa vwar rezon akoz en Minis ki sipoze annan sa lenformasyon, dan Lasanble ek li, pa kapab donn dimoun. Ou a note Mr Speaker ki mon pa vin fer okenn kankan, okenn largiman avek ou.

Mon'n fer ase. Dimoun in komans konpran la deor, nou'n vwar levidans Dimans. So i zis

ki mon ava kontinyen fer mon travay. Mersi Mr Speaker.

(laughter)

MR SPEAKER

Mersi Onorab. Mon krwar Minis in adrese ou pwen. Les mon a zis note osi ki Onorab Zialor ti lev lanmen letan ou ti fer referans avek li. Mon pour demann li pour pa entervenir. Zis mon a dir poudir ou referans lo Onorab Zialor, pa ti annord. I pa ti byen. Nou a kontinyen avek kestyon siplemanter, Onorab Esparon.

HON REGINA ESPARON

Mersi Mr Speaker. Bonzour tou dimoun a lekout. Mr Speaker an vi ki en parti sa kestyon, i koz lo program pou asir kontinyite e devlopman bann dimoun aze, eski Minis i kapab dir Lasanble;

An vi ki *Regional Home for the Elderly* North East Point, ki ganny zere par Minister Lasante, ki kalite kordinasyon ou *networking*, ki i annan ant Minister Lafanmir, Minister Lasante e *Council for the Elderly*, pou asire ki bann pasyon pour *Regional Homes*, North East Point, i osi ganny enkli dan bann program pou bann dimoun aze, pour ki zot pa ganny kit ater e zot osi zot

benefisye anba sa bann program ki Minister Lafanmir pe ofer?

Parski laba osi i annan bann dimoun aze ki aktiv parmi bann ki *bedridden*? Mersi.

MR SPEAKER

Mersi Onorab. Minis ou repons. PS ki pou reponn, wi.

PS CLIVE ROUCOU

Mersi Onorab pour sa keston. *In fact* Onorab sa i en keksoz ki dan plan, Departman Lafanmir, e konversasyon i konmanse avek Minister Lasante pour nou annan sa *sort of exchange of* bann rezidan, bann kliyan.

Parey ou konnen i annan en kantite nou bann *Homes*, nou bann kliyan in vyeyri. E *from Regional Homes* i annan bann kliyan, ki en pe pli for ki kapab vin kot nou. Be sa travay kolaborasyon ant Minister Lasante avek nou departman i toultan, vivan. E sa i en keksoz nou pe met lanfaz lo la, spesifikman pour 2023.

Pour nou annan plis sa kolaborasyon e *get all* bann rezidan ki aze laba pour vin pros avek nou bann program, avek nou bann servis ki nou pe ofer. Sa travay i la dan plan. Mersi Onorab.

MR SPEAKER

Mersi PS. Kestyon Onorab Labonte.

HON ANDY LABONTE

Mersi Mr Speaker. Bonzour Minis avek *panel* e bann PS, bonzour tou dimoun ki a lekout. Minis koman en Gouvernman i vreman responsab, e ki pran bann desizyon ki dan lentere tou dimoun an zeneral, petet mwan mon en dimoun ki vizit mon *Home* souvan.

E mon pa konnen ki dernyen fwa Onorab Pillay in vizite li.

MR SPEAKER

Onorab! Silvouple eski i fer, *hold on*, arete. I fer dezyenm fwa, Onorab Pillay in fer li, Onorab Labonte pe fer li. Silvouple met zot keston san referans avek aksyon, oubyen konportman lezot Manm.

HON ANDY LABONTE

Ok.

MR SPEAKER

Met ou keston.

HON ANDY LABONTE

Mersi Mr Speaker. Mon al direk lo on keston. Minis wi, eski sa 2.4 milyon ki'n ganny mete pour English River, i pe pran kont pour renouvle sa bann

keksoz debaz ki vremen bann zabitan, plizyer letan zot pe konplent e zot vwar poudir zot pa ti pe viv zot dan en fason konfortab akoz ti napa en *maintenance plan*? Mersi.

MR SPEAKER

Mersi Onorab. Minis. Lekel ki pou adrese. Yes?

MINISTER MARIE-CELINE ZIALOR

Mersi Mr Speaker. Mersi Onorab pour kestyon. Mon ava apre pas laparol avek PS Roucou, pour li spesifikman dir sa sonm, kwa ki kouver. Zis pour mwan, mon pe realize Mr Speaker kekfwa i annan enn pti konfizyon.

Sa 16milyon i pou koute pou fer sa bann travay. I pa vedir, ki Finans 2023 pe al donn nou 16milyon pou fer tousala en sel kou. Bidze pe vin dan Lasanble Nasyonal ankor pe regarde, pe deside, ki mannyer parey mon ti pe dir fer *meeting* avek Finans pour nou kapab ganny larzan pou fer. Sa i son kou konbyen i pou koute sa. Mersi Mr Speaker.

Petet prezan PS i ava dir kwa bann travay menntenens ki enkli dan sa kou, ki'n ganny kalkile pour La Rivière Anglaise. Mersi.

MR SPEAKER

PS ou le azoute?

PS CLIVE ROUCOU

Mersi Mr Speaker. Mersi Onorab pour ou kestyon. Wi Onorab mon konnen ou'n fer en kantite konversasyon, en kantite vizit, nou'n fer pour lakour Rivière Anglaise.

Pour sa 2.4milyon sa i pou enkli, dalo avek *flasher Board*, ki ou menm ou vwar ki tou in fini kase, *plumbing* li menm li ki nou vwar ki nou *bill* delo i *quite* eleve. Akoz i annan problemm koule partou. Nou bann rigol ki'n fini bouse;- nou bann slab beton ki'n kase. E menm nou 4 nouvo lakaz, ki nou fek fer deza i annan problemm delo ki pe sorti, pe sorti dan plafon.

An term bann lakaz spesifikman, 5 oubyen 6 nou bann lakaz, deza zot laport in fini ganny avarye, pour sa kantite letan ki'n napa sa bon plan *maintenance*, tousala in fini pouri.

E dan sa plan, ki nou pe annan pour ki i annan bann travay ki nou'n komans fer spesifik;- bann ki en pe pli irzan, parey *toilet*, *cabinet*, dan lakwizin kot nou rezidans. *Locker* pour nou bann travayer. Tousala nou'n fini ganny fer. So *toilet* i irzan, *washing basin* i irzan.

Be lezot plan ki pe vini, sa 2.4 nou pe vize fer sa bann renovasyon, ki en pe pli dan fitir. Me selman sa bann ki *emergency*, nou'n fini fer. Sa parey ou konnen i enkli *cabinet locker, toilet, washing basin, plumbing* li menm. Mersi Mr Speaker.

MR SPEAKER

Mersi Onorab Romain ou kestyon.

HON GEORGES ROMAIN

Mersi Mr Speaker. Minis mon'n tann ou mansyonn 3.2milyon pour La Retraite, *Elderly son Homes*. Definitivman mon'n vwar ki i bezwen fer en bon renovasyon laba. Mon ti a kontan demann ou, avek Minis atraver ou Mr Speaker, kan nou ekspekte vwar en *major* renovasyon kot La Retraite, aköz i bezwen ganny repare sa landrwa?

Aprè mon dezyenm kestyon Minis, dan bann *Homes* eski annan en dimoun ki fer parey ou dir sa bann pti louvraz mentenans, ki par egzanz aköz parfwa enn ler ou vwar i annan bann ptipti problemm kot bann *Homes*, ki sa bann dimoun zot menm zot, zot pa kapab, rektifye sa problemm.

E kekfwa sa problemm i kontinyen, i kontinyen e in enn pti pe annwiyan. Eski zot annan en dimoun ki zot anploye ki al laba toulezour, pou fer ki zot a kapab rektifye sa bann pti problemm? Mersi Mr Speaker.

MR SPEAKER

Mersi Onorab. Minis?

MINISTER MARIE-CELINE ZIALOR

Mersi Mr Speaker, mon pou les *PS Roucou* reponn kestyon lo ki bann plan renovasyon La Retraite, apre lo sa travayer menntenens. Mon ti a zis kontan ou dezyenm kestyon lo kote menntenens ki nou'n fer, nou'n nobou kapab negosye.

Regard avek *Procurement* pour nou kapab parey ou pe dir sa bann menntenens par fwa e i pran letan parfwa aköz ki mannyer, prosedir i ete. La prezan kot i annan en pe sanzman ki pou ganny fer, kot nou'n nobou kapab modernize ki sa bann louvraz menntenens vitman, i kapab ganny fer vitman avan ler ki i avarye enn pti pe plis.

La mon a pas laparol Mr Speaker avek ou permisyon *PS Roucou*, pou reponn pli an detaye lo kote La Retraite. Mersi.

MR SPEAKER

Mersi. *PS?*

PS CLIVE ROUCOU

Mersi Mr Speaker. Mersi Onorab pou ou kestyon, Onorab wi *Home* La Retraite i en pe dan problem. Me selman nou evalyasyon ki nou'n fer lo tou nou 9 *Homes* nou'n vwar ki *Homes* Au Cap i en pe plis dan bezwen, an term akoz delo pe sorti dan son fondasyon, pe antre anndan e sa i pe donn *fungus* lo bann miray e tou. E bann *tiles*, lo la i komans eleve.

So plis nou plan pour 2023 i lo lakaz Au Cap. Me par kont nou kontinyen asire ki lezot lakour - sa 8 lakour an plis, plan menntenens i reste an term zot irzans dan *what needs to be done* atraver sak *Homes*. Mersi Mr Speaker.

MR SPEAKER

Mersi. Kestyon Onorab Uranie.

HON ROCKY URANIE

Mersi Mr Speaker. Minis eski i annan kontrakter sa lannen ki ti'n ganny demande pour soumet plan pou reparasyon Lakaz Dimoun Aze La Digue? Mersi.

MR SPEAKER

Mersi Minis. *Yes PS?*

PS CLIVE ROUCOU

Mr Speaker Onorab i kapab repas lo son kestyon silvouple.

HON ROCKY URANIE

Eski i annan kontrakter ki ti'n ganny demande pour soumet kotasyon pou reparasyon Lakaz Dimoun Aze La Digue?

MR SPEAKER

Mersi.

PS CLIVE ROUCOU

Mersi Onorab. Ou pe demann spesifikman pou plan renovasyon pour dimoun, pour *Homes* La Digue.

HON ROCKY URANIE

Mon a repet ankor Mr Speaker. Eski i annan kontrakter ki ti'n ganny demande pour soumet son kotasyon pou reparasyon Lakaz Dimoun Aze La Digue sa lannen? Mersi.

MR SPEAKER

Mersi. *PS.*

PS CLIVE ROUCOU

Mr Speaker bann travay, *emergency* oubyen bann travay ki bezwen lo bann *Homes*, *most of the time* nou pe *outsource* sa bann travay. So si i annan travay spesifik, par egzanp *plumbing* si i annan pou fer, nou *outsource* li avek en

plonber. Me an term zeneral. Nou napa en plan, nou napa en kontrakter spesifik ki ganny fer pour tou bann travay.

Me travay i ganny donnen an relasyon avek travay renovasyon ki bezwen ganny fer dan sak *Homes*. Mersi.

MR SPEAKER

Mersi. Onorab wi ki klarifikasyon?

HON ROCKY URANIE

Mr Speaker, *PS* pa pe reponn mon kestyon li. Mon kestyon se ki, eski i annan kontrakter sa lannen La Digue ki'n ganny demande pour soumet son kotasyon pou reparasyon Lakaz Dimoun Aze La Digue? Mon kestyon i kler *PS*.

PS CLIVE ROUCOU

Non-Mr Speaker napa okenn kontrakter ki nou'n donn travay spesifik pou La Digue.

MR SPEAKER

Mersi. Mersi *PS*. Nou'n ganny ase repons lo la. Mon a pran kestyon Onorab Lemiel.

HON ROCKY URANIE

Mr Speaker-Mr Speaker, Mr Speaker. *PS* pe koz lalang.

MR SPEAKER

Onorab! Onorab!

HON ROCKY URANIE

I annan kotasyon ek mwan la.

MR SPEAKER

Ou kestyon in ganny reponn. Onorab napa.

HON ROCKY URANIE

PS pe koz lalang Mr Speaker, i annan kotasyon. I annan kotasyon ...

MR SPEAKER

Napa-napa kontrakter ... Onorab Lemiel ...?

HON ROCKY URANIE

... I annan kopi ek mwan la - mon annan.

(Interruption)

MR SPEAKER

Onorab! Onorab Uranie ou kestyon in ganny reponn. Onorab Lemiel ou kestyon.

HON SYLVANNE LEMIEL

Mersi Mr Speaker.

HON SYLVANNE LEMIEL

Mr Speaker Anse Royale i enn bann premye *Home* ki'n ouver dan Sesel. E mwan mon'n *DA* Anse Royale, mon pa pou vremen tro - Minis i kapab ou annan en pwen. Me selman

mon pa pou vreman tonm dakor lo petet an sa ki konsern ler i ariv *Home* Anse Royale, sa kantite menntenenns ki'n ganny fer lo sa *Home* par *past Government*.

E menm i annan bann kontrakter, dan mon bann letan, ki ti vin fer travay pour nanryen kot *Home*. E ler mon get, *status Home* Anse Royale ozordi, i enn bann *Homes* ki'n ganny byen mentenir. Sa Minis mon krwar pa si ou poudir mwan non. Si ou'n pas laba en?

Par kont Minis mon vwar ki dan ou total, kalkilasyon pour tou sa 9 *Homes*, enkli Anse Royale, ou'n met R1.6milyon, sa ki mon konnen ti annan la pou fer Anse Royale. Akoz *tiles* in sanze, *aircon* pou lofis ti'n reste ater pour pres ki 6mwan, 8mwan. Zot fek mete, i *ok*, me 1.6milyon.

Mon konnen ti annan en *extension of Home for the Elderly*. Swa de lakaz, swa trwa lakaz mon pa konnen konbyen ti pou gannyen avek. So eski sa 1.6milyon, ki ou pe dir mwan ki nou ti ankor pe esper anba Fon Endyen, eski li menm li sa ki ou'n kont ansanm, dan sa total ki fer 16milyon, anba menntenenns? Or Anse Royale li pour li, i sa 1.6milyon pour sa *extension*?

Me si wi, konbyen *therefore* dan sa 1.6milyon ki zot pe mazin al depanse lo menntenenns ankor lo kote Anse Royale? Mersi. Si mon kestyon i kler.

MR SPEAKER

Mersi. Minis ou repons?

MINISTER MARIE-CELINE ZIALOR

Mersi Mr Speaker. Mersi Onorab pour kestyon. Mr Speaker letan mon vini, mon vin donn bann sif ouswa nou vin donn nou bann detay travay pou fer, pa nou - mwan mon pa'n al Anse Royale pour mwan al fer sa bann louvraz enzenyer. Mon'n ale Anse Royale, mon'n ale Anse Royale al vizit *Home*, al vizit tou *Homes* mwan.

Se sa rezon ki nou, nou donn sa bann dimoun ki *expert*. Nou Lazans Lenfrastriktir zot ki fer *scope of work*. Parfwa letan ou get keksoz avek ou lizye Mr Speaker, nou, nou pa *expert*, mwan mon pa en teknisyen enzenyer, mon pa fer *civil engineering*, mon pa fer tou sa bann louvraz.

Vwala akoz nou pa ale zis dir lo nou menm, nou'n donn sa bann dimoun pou fer. Sa bann louvraz - sa bann *scope of work* se sa Lazans Lenfrastriktir ki'n donn nou, avek son kou

konbyen i koute pou fer. E non, i pa enkli sa bann pou bann Don Endyen - nou pa'n mete ladan. Sa i pa li.

I sa sif avek bann *scope of work*, ki annan pou fer lo sa bann *Home*. Parey mon'n dir oparavan, mon eskize s i bann dimoun i ofanse, nou pa vini, nou pa vini pour nou vin met okenn dimoun *on the spot*.

Me solman nou bezwen dir keksoz parey i ete osi tou. E parey bann teknisyen in donn nou sa bann lenformasyon, nou pa vin rod pwen, nou zisteman zis vini pour nou regarde ki manner nou kapab donn lenformasyon.

E osi tou ki manner nou kapab travay ansanm, pour nou kapab aranz bann keksoz ki nou bezwen aranze Mr Speaker. Se sa ki nou pe fer. Lo kote detay lo Anse Royale Mr Speaker, mon ti a kontan pas laparol avek *PS Roucou*, pour li kapab donn plis lenformasyon. Mersi bokou.

MR SPEAKER

Mersi *PS*. Ou kapab azoute.

PS CLIVE ROUCOU

Mersi Mr Speaker. Mersi Onorab. Onorab sa parey Minis in byen dir, tou sa travay in ganny evalye par Lazans Lenfrastriktir. So i sa *amount*,

ki zot, zot in mete, e sa pa enkorpor pour sa 6 lakaz, pou azoute pour *Home Anse Royale*. Mersi Mr Speaker.

MR SPEAKER

Mersi. Kestyon Onorab Porice.

HON DOYACE PORICE

Mersi Mr Speaker, Minis avek ou delegasyon, tou mon bann koleg *MNAs*, e tou bann dimoun ki a lekout, bonzour.

Minis eski i annan serten lakonpanyen prive ki pare pou adopte serten sa bann *Homes*, pour ede avek kontinyasyon travay renovasyon ouswa bann pti demann lezot keksoz, sirtou dan *Home Grand Anse Praslin*? Mersi.

MR SPEAKER

Mersi. Minis?

MINISTER MARIE-CELINE ZIALOR

Mersi Mr Speaker. Mersi Onorab pour kestyon. Sa bann detay Mr Speaker, *PS Roucou* avek ou permisyon i ava kapab redonnen. Mersi.

MR SPEAKER

Mersi mon a pas lo kestyon 176 Onorab Naddy Zialor. *Sorry* mon'n mal konpran, ou'n dir *PS* pou reponn. Wi *ok PS* mon a les ou reponn.

Onorab Uranie ou kestyon mon'n adrese. Ale esper en kou. *PS* fini reponn.

PS CLIVE ROUCOU

Mersi Mr Speaker. Mersi Onorab pour ou kestyon. Mr Speaker Departman Lafanmir nou kontinyen travay an tre pros kolaborasyon bann lezot partner prive.

Par egzantp an relasyon ek nou bann *Homes*. Par egzantp nou annan Anse Boileau ki'n fini ganny adopte par Lasosyasyon bann peser Anse Boileau.

La Retraite tre byento pou ganny adopte. La Digue tre byento pou ganny adopte. Pointe Larue in fini ganny adopte, e Praslin spesifikman in fini ganny adopte. Tou sa bann travay kolaborasyon, tou nou bann *partners* ki nou travay avek, zot ed nou an term mentenans e bann lezot travay ki ganny fer otour nou bann *Homes*.

So Onorab wi, Departman Lafanmir an relasyon avek bann lezot *partners* prive, travay kolaborasyon i kontinyen, pour asire ki nou bann *Home* i ganny byen mentenir e *going forward* pour sa. Mersi.

MR SPEAKER

Mersi Onorab Uranie ki ou *point of order*?

HON ROCKY URANIE

Mr Speaker, mon ti'n ganny demande pour *substantiate* par Onorab, par SG Onorab Gervais Henrie. Mr Speaker aköz ler Minis in dir, ler *PS* in dir pou dir non, pa'n zanmen annan okenn kotasyon ki'n ganny fer, ki'n ganny demande pou ganny fer.

E mwan mon annan levidans, kotasyon ki ti'n ganny fer depi le 11 Zilyet sa lannen par *Advance Maintenance Services*, La Passe La Digue, pour fer reparasyon lo Lakaz Dimoun Aze La Digue.

MR SPEAKER

Mersi.

HON ROCKY URANIE

Mr Speaker, mersi.

MR SPEAKER

Mersi, be si ou ti annan sa lenformasyon akfer ou ti demann kestyon? Ou ti'n devret zis dir Minis. Mersi.

(Off-Mic)

MR SPEAKER

Mon'n terminen lo sa kestyon. *Order!* Kestyon 176, Onorab Naddy Zialor.

HON NADDY ZIALOR

Mersi Mr Speaker. Mr Speaker kestyon 176 i lir koumsa:-

Eski Minis i kapab enform Lasanble ki zistans ou Minister i ete an sa ki konsern *survey* nasyonal pou fer *profiling* lo bann dimoun aze, e dimoun ki pe viv avek en dezabilite isi Sesel?

Ki fason sa *survey*, pou pe ed Gouvernman dan formilasyon bann Polisi e pran bann desizyon lo nivo nasyonal? Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab, pour ou kestyon. Mr Speaker pour sa *survey* nasyonal pou annan en profil, dimoun aze e dimoun avek dezabilite, nou'n ganny en pe retar, *COVID* pa'n ed nou. Me osi nou ti napa ase resours imen, letan e finans pour nou kapab fer li.

Sa ki nou'n kapab fer par kont se travay lo tou dokiman neser ki nou bezwen;- par egzant bann kestyonner. Sa in fini ganny fer. E nou'n osi kapab travay lo en partenarya avek Biro Nasyonal pour Statistik, pour prezan organize

pou nou kapab anmas sa bann lenformasyon lo teren. Par kont Mr Speaker lo Praslin sa travay anmas lenformasyon li in fini komanse.

E lenformasyon avek nou bann dimoun pe viv avek dezabilite, sirtou sa bann i pe ganny fer, i reste prezan pou bann dimoun aze.

Mr Speaker, ki fason sa *survey* pou pe ed Gouvernman? Lenformasyon konkret e relevan k i ganny ramase i ava ganny servi pou devlop bann Polisi efikas pour sa de group dimoun. E i ava osi ganny servi pou desid lo bann servis, e prodwi ki sa de group dimoun zot bezwen.

Sa bann lenformasyon pou osi servi, pou desid lo nou bann stratezi mwayen term e osi lonterm, pour sa bann dimoun e osi pou fer en plan devlopman kapasite dan sa de domenn.

Nou pou bezwen analiz bann tandans, e met pare pour bann *skill* avek bann konesans ki nou pou bezwen, pou deservi sa bann group dimoun dan le fitir. E bann ki nou kapab la osi tou. E finalman, pour nou kapab fer bann rekomandasyon avek *Cabinet*, lo bann desizyon nasyonal ki annan pou fer avek sa de group dimoun. Mersi Mr Speaker.

MR SPEAKER

Mersi. Onorab ou annan siplemanter.

HON NADDY ZIALOR

Yes, Mr Speaker. Mersi Minis ankor enn fwa, par lefe ki ou'n dir ki i annan sa *profiling form* ki pe ganny etabli, oubyen ki'n fini ganny etabli, eski pou annan osi bann *input*, bann diferan lezot Minister ki annan lyezon direk avek sa de group dimoun? Par egzanp Minister Lasante, Minister Ledikasyon, Minister Lenfrastriktir e osi lezot? Mersi.

MR SPEAKER

Minis?

MINISTER MARIE-CELINE ZIALOR

Mersi Mr Speaker. Mersi Onorab pour ou kestyon siplemanter. Definitivman, nou'n deza fini komans vwar kwa bann lenformasyon adisyonnèl ki'n deza egziste la.

Sirtou avek Minister Lasante. Sirtou osi avek Minister Ledikasyon pour nou kapab met tousala dan bann analiz. E pou mwan fer enform Lasanble Mr Speaker, kozri avek Lasante avek Lafanmir, tre byento nou pou al fer en

zournen kozri pou nou regard armonizasyon.

Sa bann plan pour nou fer pour 2023, sa i enn parmi bann ki definitivman Mr Speaker lo nou priyorite. Mersi.

MR SPEAKER

Mersi. Mon pe pran siplemanter de Manm ki n lev lanmen, akoz mon bezwen termin sa sesyon kestyon a-tan. I annan Onorab Roucou apre Onorab Pillay. Onorab Roucou.

HON MICHEL ROUCOU

Mersi Mr Speaker. Minis eski dan sa bann demars pou fer sa bann *profiling* dan bann distrik, eski zot pou enkli Lotorite Distrik ladan? Anvi ki zot ki la dan distrik ki annan enn pti pe plis koneksyon ek sa bann zabitan dan aze, e osi spesyal. E osi mon le dir mersi nou *First Lady* ki pe fer vizit kot nou bann dimoun aze.

E mon vwar poudir Onorab Rocky Uranie in apresye sa. Mersi.

MR SPEAKER

Minis ou repons?

MINISTER MARIE-CELINE ZIALOR

Mersi Mr Speaker. Mersi Onorab pour kestyon siplemanter. Definitivman *PS*

Roucou i ava reponn sa Mr Speaker. Mersi.

MR SPEAKER

PS ou annan laparol.

PS CLIVE ROUCOU

Mersi Mr Speaker. Mersi Onorab. Wi Onorab travay in komanse, pou travay an tre pos kolaborasyon avek distrik avek bann MNAs. *In fact* nou departman in komans avek, Cascade kot nou'n zwenn MNAs avek DA. Kot nou'n komans fer sa diskisyon an term nou bann dimoun aze ek nou bann dimoun dezabilite dan distrik.

E i en plan i en keksoz ki pou kontinyen dan sa kouran lannen. Mersi Mr Speaker.

MR SPEAKER

Mersi Onorab Pillay, ou kestyon?

HON SEBASTIEN PILLAY

Mersi Mr Speaker. Mersi Minis pour ou bann larepons ki ou'n donner. Mr Speaker nou pe regard enn pti pe deba le 7 Novanm, *around* le 7 Oktob 2021 - lan pase kot nou ti ganny *commitment* avek Minis Marie-Céline Zialor, lo *repeal* Lalwa Konsey pou bann dimoun avek dezabilite.

E *commitment* ki nou ti gannyen sa letan, se ki pour

annan en zefor pli prononse ki Gouvernman pou pran, an relasyon avek *profiling* e etabli bann baz statistik lo bann dimoun avek dezabilite, ki Onorab Zialor ti'n deza *raise previously* dan Lasanble Nasyonal. En bon referans sa Mr Speaker.

Sa ki mon ti a kontan ki Minis i klarifye, avek nou, so depi Oktob 2021, eski baze lo sa ki Onorab Zialor in demande taler, (mersi Onorab pour ou kestyon) eski zot ankor pe travay lo en form, depi le 7 Oktob 2021?

Oubyen eski zot annan en form ki'n pare, ki zot pe al fer *profiling* avek? E eski Minis i kapab klarifye osi atraver *National Population Census* ki'n fek fini fer, eski napa okenn data capture ki'n ganny fer par NBS, lo *whether or not* i annan dimoun, ki pe viv avek dezabilite dan bann distrik?

E si i annan, eski ou Minister pe *interface* avek NBS pour zot pran sa baz lenformasyon, prezan pour zot travay lo bann Polisi ki zot pe dir zot pe annan, zot pe travay lo la depi le 7 Oktob 2021? Mersi Mr Speaker.

MR SPEAKER

Mersi Onorab. Minis.

MINISTER MARIE-CELINE ZIALOR

Mersi Mr Speaker. Mersi Onorab pour ou bann keston. PS Roucou pou reponn lo kote akoz bann kozri avek Statistiek avek larestan antite, Departman Lafanmir i annan detay i ava donn li. Lo ki sa bann kozri ki pe fer. Mon mazine *Leader* Lopozisyon pe demande akoz sa retar, ouswa i a pe fer dimoun krwar poudir depi Oktob 2021, nou a pe zis travay lo en form.

Mr Speaker depi le 5 Zen 1977, i annan en kantite keksoz ki nou kapab dir ki poudir depi ziske Oktob 2020, depi Oktob 2020 ki son leta, 43an ki manner i ankor ete la. Kantmenm parfwa sa bann parol nou pa kontan ganny dir. E si parey bann armonize dan Gouvernman kote lenformasyon i ete, ki manner ou kapab zwenn avek kanmarad pour ou kapab ganny letan.

Akoz Departman Lafanmir li i annan en pake zafer pou li fer, ki nou'n vin la pour nou kapab anmezir ou atrape, ou vwar prezan ki annan pour ou atrape. Zour ou pe atrap sa kote lanmen in plen ou atrape ek en lot, ou pe sey rode ki manner ou pe atrape. Depi le 5 Zen 1977 Mr Speaker!

So ou vwar? E larestan bann keksoz osi tou napa zis sa seksyon dezabilite ek bann dimoun aze kot Departman Lafanmir, i annan lezot keksoz osi ki zot in bezwen, zot atrap en kou tanzantan zot bezwen revini, nou refer plan e bann larestan Minister osi ki nou bezwen kolabore avek.

Zot osi en pake, yer mon fek asiz CS, avek madanm Mohideen, kot nou a pe - akoz nou pe get striktir, nou pe regard en pe bann keksoz ki nou pe pran en pe letan parey Onorab pe dir. E i osi i a pe dir ek mwan, kot i ti krwar i pou kapab fer la dan detrwa kot nou ti'n donn *deadline*. I pe dir mwan be ou konnen, ler ou an deor avek letan ou anndan i de.

Sa kantite ki bezwen ganny fer avan ler i nobou kapab atrap enn de bann keksoz ki nou bezwen atrape. So Mr Speaker, parfwa vwala akoz. Mon krwar Onorab i reponn son keston taler li menm, i pe dir akoz toultan mon vin la.

Mon vin anmenn en *reminder*, akoz i neser ki Seselwa i konnen egzaktman, ki nou'n atrape e ki kantite travay i annan pour nou kapab fer, pour nou kapab atrape. I pa asize fer *profile* lo en bout papye. Sa i siperfisyel, i ti abitye

ganny fer dan sa fason, nou pa travay koumsa nou.

E nou dakor zot pa kontan nou travay koumsa akoz nou, nou pa zot. Nou annan en lot kalite fason fer e nou, nou kontan asize fer en bon rezon lo ki manner. Rod bann *expert*, rod bann dimoun, i annan Dokter Adonis ki pe ed nou pour nou vin regarde ki manner ou fer sa. Akoz ou bezwen konnen, ki ou pe al fer avek sa lenformasyon. Parey Onorab Zialor in demann nou ki ou pe al fer avek.

Ki manner, lekel ki enkli kot *once* ou'n fer. Vre i annan bann pti bout en pti pe partou, partou, i annan li. E ou bezwen prezan fer konsolide, e *even* pou ou kapab fer bann dimoun dan Gouvernman parfwa, pou fer en pe letan Mr Speaker, pou asize pou koz ek kanmarad i difisil. Depi 5 Zen 1977, Mr Speaker. Mon ti a kontan prezan pas laparol avek PS Roucou pour li reponn larestan.

MR SPEAKER

PS Roucou. Mersi. Minis PS Roucou.

PS CLIVE ROUCOU

Mersi Mr Speaker. Mersi Onorab pour ou kestyon. Mr Speaker mon anvi afirmen ki pran Departman Lafanmir a

avek *Elderly e Disabled* anba la, wi nou ti napa lenformasyon lo sa de group dimoun. An term menm kantite e menm spesifisite par egzanp zot dezabilite.

Be mon anvi konfirm avek Onorab, ki tou nou bann papye, nou bann form neserer pou en tel legzersis in pare. Nou plan sete pour nou fer li en a n kolaborasyon avek NBS ler ti pe fer sa resansman, ki i pa'n materyalize, an vi ki nou bann kestyon ti vreman spesifik, e lenformasyon spesifik ki nou ti anvi anmase.

Alors sa ki nou pou anmase, i pou ed nou spesifikman, pour nou kapab anmenn nouvo servis program e Polisi an relasyon avek sa de group dimoun. Mersi Mr Speaker.

MR SPEAKER

Mersi nou ariv a lafen nou letan pour sa kestyon. Mon pe termin sa seans la, mon remerisye Minis ek son delegasyon e remeris bann Manm. Lasanble i a rebran 11.15. Mersi.

(BREAK)

MR SPEAKER

Nou ava apel Minister Finans e son delegasyon pour kontinyasyon kestyon.

MINISTER NAADIR HASSAN

Bonzour e byenveni Minis Finans Nasyonal e Komers Minis Naadir Hassan e pour premye kestyon, nou annan avek li Mr Patrick Payet *Secretary of State* dan son Minister Mr Davis Laporte, *Chief Investment Officer Seychelles Pension Fund*.

Bon nou komans avek kestyon e kestyon i lo papye dan non Onorab Churchill Gill. Me se dan son labsans se Onorab Egbert Aglae ki pou poz son bann kestyon. Onorab Aglae.

HON EGBERT AGLAE

Mersi Mr Speaker. Bonzour Minis, *PS* ek ou *panel*. Kestyon i lir *comme* swivan; kestyon in ganny demande par Onorab Churchill Gill Manm Elekte pour Baie Sainte Anne ki an se moman an *overseas mission*.

Eski Minis i kapab donn sa Lasanble en kontrandi lo retonbe; desizyon lenvestisman pou Fon Pansyon investir dan *Cable & Wireless*: -

1) Eski Fon Pansyon in kapab ganny okenn *dividend* dan sa lenvestisman e konbyen? Si non, aköz?

2) Eski *Management* Fon Pansyon in kapab konfirman si sa lenvestisman ti bon? Mersi.

MR SPEAKER

Minis ou repons silvouple.

MINISTER NAADIR HASSAN

Mersi Mr Speaker. Bonzour Mr Speaker. Bonzour bann Manm Onorab, e bonzour tou dimoun a lekout. Larepons premye kestyon.

Eski Fon Pansyon in kapab ganny okenn *dividend* dan sa lenvestisman e konbyen. Si non, aköz?

Fon Pansyon Sesel, in resevwar en *dividends* le 19 Me 2022 pou en sonm R19milyon 358mil368.6sou ki ti antre direk dan Fon Pansyon. Dezyenm kestyon. Eski *Management* Fon Pansyon in kapab konfirman si sa lenvestisman ti bon?

Mr Speaker Fon Pansyon ti investir 22poursan par dan *Cable and Wireless* an 2019, pour lavalier \$24milyon ki apepre R330milyon. An 2020 *Cable and Wireless* pa ti deklar *dividend* anvi kriz ekonomik koze par pandemik *COVID-19*.

An 2021 Fon Pansyon in resevwar en *dividend* parey mon'n dir pli boner ki ekivalan, en *return* 6poursan ki an se moman ki en *return* ki ekivalan

son target dapre son Polisi Lenvestisman.

Mersi Mr Speaker.

MR SPEAKER

Kestyon siplemanter Onorab Aglae?

HON EGBERT AGLAE

Minis mersi pour larepons. Minis premyerman mon ti a kontan demann ou si i annan en konversasyon avek Fon Pansyon, lo kantite letan ki i pou gard son lenvestisman dan sa lakonpanyen?

E osi anvi ki nou pe aprann osi ki lakonpanyen pe vann *shares* ladan. Ki son bann reperkisyon ki sa i kapab annan anver lenvestisman Fon Pansyon?

Dezyenm Minis, an vi ki bokou koze in ganny koze lo laz logmantasyon laz retret par Fon Pansyon, Eski Gouvernman e osi Fon Pansyon i ankor annan diskisyon ki pe ganny fer, lo size logmantasyon lo sa laz retret.

An vi ki bann lenvestisman ki pe aport fri osi, eski zot krwar fon pans yon pou kapab mentenir e soutenir, son bann lenvestisman fas a kontribisyon zot bann kliyan? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pou ou kestyon. Mon a pran ou dezyenm kestyon avan apre mon a pran ou premye kestyon.

Lo ou premye kestyon *regarding* ki lenpak lenvestisman pou annan lo *retirement age*. Mon krwar i Fon Pansyon in eksplike plizyer fwa dan lepase, rezon prensipal ki pe *drive* sa *requirement* pou *increase* laz pansyon, se *demographic* Sesel ki pe sanze. *Ok?* I pa senpleman zis en *issue of ganny additional return, ok?* Wi Fon Pansyon i bezwen fer lenvestisman ki *allow* li pou fer *better returns*. Me sa lo li menm pa adrese soutenabilite Fon Pansyon.

Son *main driver* se dimoun pe viv plis lannen e i annan mwens dimoun ki pe kontribye pour dimoun ki pe *retire*. I sa *ratio* ki sanze. E sa ler ou fer bann *actual study*, i sa ki *drive* sa *requirement* pour *increase* dan laz pansyon.

Lo ou dezyenm kestyon, ki lenpak sa *listing* lo Fon Pansyon e eski i annan okenn konversasyon lo ki kantite letan? Larepons se non mon krwar, Fon Pansyon in fer en lenvestisman lonterm. E li i bezwen *monitor* performans.

Akoz la ler ou annan en *listing, value of shares* i kapab monte, i kapab desann. Baze lo performans lakonpanyen. E li Fon Pansyon i bezwen annan en mekanizm, ki i kapab *forecast* sa. E dapre manyer marse i ale, li i pran sa bann desizyon lo sa bann baz. Mersi.

MR SPEAKER

Mersi. Nou a kontinyen avek en pe siplemanter. Onorab Pillay?

HON SEBASTIEN PILLAY

Mersi Mr Speaker. Bonzour Minis e bonzour tou delegasyon Minis ki la. Mr Speaker mon ti a kontan si Minis i kapab klarifye, eski Gouvernman LDS ozordi, pe dir ek nou ki sa lenvestisman ki Fon Pansyon in fer dan *Cable and Wireless* ti en bon lenvestisman?

E dezyenmman Mr Speaker, mon ti a kontan ki Minis i konfirman avek nou, eski prenon kont ki Fon Pansyon pe ganny serten *dividends* atraver sa lenvestisman, eski sa i vedir ki serten desizyon ki'n ganny pran vizavi laz pansyon, ki ti ganny anonse, me pa ankor vin dan Lalwa, me ki posibleman pou komans ganny aplike *as from* Zanvyè 2023, pa pou ganny met an aplikasyon, antretan ki Gouvernman i fer lanaliz, pou

etablir retonbe bann lenvestisman ki Fon Pansyon in fer vizavi sa logmantasyon dan laz pansyon? Ki pe kree serten konsern parmi en gran group travayer ki pe apros laz *retirement*.

Mersi Mr Speaker.

MR SPEAKER

Mersi Minis. Mersi Onorab. Avan Minis reponn permet mwan rekonnèt antre madanm Sheila Mohideen, *Chief Secretary Public Service Bureau* ki pe zwenn nou pou en kestyon pli tar. Minis ou repons.

MINISTER NAADIR HASSAN

Mersi Mr Speaker. Mersi Onorab pou ou de kestyon. Lo ou premye kestyon, mon krwar i bon ki mon klarifye en *issue* lo pozisyon ki *LDS* ti pran dan Lasanble.

E i pa ti zanmen dir ki i pa en bon lenvestisman. Ti annan de *issue* ki ti leve, se lo prosedir ki ti ganny swiv, e ti lo pri ki ti ganny peye. *Ok?* E ki tou lede ler Prezidan a sa letan ti lev *issue*, i ti de *issue* ki ti ganny klarifye e ti annan en re-negosyasyon ki ti arive. E sa mon krwar i bon pour eklersi avek Onorab.

Akoz mon krwar i pe fer serten, i pe *imply* poudir sa ti en move - Gouvernman ti krwar,

LDS ti krwar sa en move lenvestisman. Sa premye keksoz mon a klarifye. Mersi.

Lo dezyenm keston, lo kote laz pansyon avek lenplikasyon, lenvestisman ki'n antre. Mon krwar i enportan pour mon'n reponn sa keston, ki Onorab Aglae in mansyonnen lo kote lenplikasyon *return of investment* e laz pansyon.

E mon repet menm keksoz se ki se pa *return* vreman ki pe *drive* sa *process*, me *actual study*. Me sa i pa lopinyon sa. Ler nou koz lo *actual study*, sa i en *scientific mathematical process*, ki ganny servi pou get soutenabilite Fon Pansyon ki montre nou se ki laz ki dimoun i arive pe viv plis letan, ki *drive* sa *process*. E mon krwar i enportan ki nou tir politik dan laz pansyon. *Ok?*

Akoz demen mazorite antre nou la anndan ki pa pou ganny en pansyon si i kolaps. So annou pran bann desizyon responsab, parey toultan mon dir. Me pa bann desizyon ki *populist*, e nou vwar dan lemonn antye kot desizyon *populist* pe anmenn plizyer pei. Mersi Mr Speaker.

MR SPEAKER

Mersi.

HON SEBASTIEN PILLAY

(Off-Mic)

MR SPEAKER

Mon pa'n konpran ou Onorab Pillay, dir mwan ankor.

HON SEBASTIEN PILLAY

Mersi Mr Speaker anba nou *Standing Orders, Order 36* si mon pa tronpe, i dir nou koumsa poudir en Manm i bezwen *substantiate* en *statement* ki in fer. Mon ti a kontan avek ou permisyon, Mr Speaker *substantiate statement* ki mon'n fer.

Mon ti en Manm Sizyenm Lasanble e mon ti *note down* dan mon bann *notes*. Le 4 pwen ki parti LDS, dan Lasanble ti demann en *halt* lo sa tranzaksyon.

Premye pwen i ti dir i ti demann Minister Finans sa letan zot ti dan sizyenm Lasanble koman Lopozisyon – i ti demann ek Minister Finans pou pran aksyon imedyat pou termin sa tranzaksyon, si i pa ankor ganny konplete.

E pour inisye en lenvestigasyon imedyatman lo sa bann pwen ki ti ganny *raise*.

Dezyenmman, i ti demann nou Prezidan Danny Faure pour etabli en Komisyon Lanket ki ti pou ganny *lead* par en Ziz Lakour Siprenm.

Trwazyenmman i ti dir ki *Board* Fon Pansyon, i devret fer en *live televised press conference*;-

Savedir en konferans lapres imedyatman, pou eksplik son desizyon e reponn bann konsern ki'n ganny leve par bann Manm *LDS*.

Katriyenmman i ti dir, si *Board* pa kapab donn en leksplikasyon ki adekwat e akseptab an defans son aksyon, i devret *resign* imedyatman.

Se pour sa rezon Mr Speaker, ki fer mwan demann Minis si Gouvernman ozordi i krwar poudir sa i en bon lenvestisman. Ki dan mon lopinyon Mr Speaker, atraver ou i ti paret en depar *from* sa ki Gouvernman ti pe demande.

Sa letan ti Novanm 2019, sa i dan mon *note* Mr Speaker, mon kapab *share* avek ou e i annan rapor dan bann zournal nasyonal osi. Mersi.

MR SPEAKER

Mers i Onorab, mon pran sa koman en lesplikasyon personnel lo ou komanter. Nou a kontinyen avek kestyon 178 e Onorab Aglae, i annan ankor laparol lo la par Onorab Gill.

HON EGBERT AGLAE

Mersi Mr Speaker. Kestyon 178 i demande par Onorab Gill, eski

Minis i kapab enform sa Lasanble ki diferan kalite *loan* ki pei i annan?

Ki kalite Lagreman ki sa bann diferan *loan* i anba la?

Konbyen larzan an total pou tou sa bann diferan *loan*?

Ki kantite an term poursantaz sa sonm i ete lo kapasite garanti ki pei i kapab abzorbe? Mersi.

MR SPEAKER

Mersi Onorab. Minis ou repons.

MINISTER NAADIR HASSAN

Mersi Mr Speaker. Mersi Onorab pour sa bann kestyon. Lo premye kestyon, eski Minis i kapab enform sa Lasanble ki diferan kalite *loan* ki pei i annan?

Anba nou portfolyo det i annan diferan kalite *loan*. *Loan* i ganny klasifye anba domestik e eksteryer depandan lekel sa krediter, landrwa rezidansyel, sa krediter ki nou pran *loan* avek, si krediter i fer son loperasyon Sesel, dan sa ka sa *loan* i domestik e visversa pou *loan* eksteryer.

Anba domestik nou annan bann *loans* ek Labank Komersyal. Konponan pli gro nou det i reste sekirite Gouvernman ki konpri *treasury bills* e *treasury bonds*. Anba nou portfolyo eksteryer nou

annan bann *loan* bilateral. Sa bann *loan* i ant Sesel ek bann pei spesifik. Tel ki *L'Inde, La Chine, Grande Bretagne*, parmi plizyer.

Nou osi annan en gro konponan ki sorti kot bann nonmen krediter multilateral. Sa i prensipalman Labank Mondyal, Fon Monneter Enternasyonal ek Labank Devlopman Afriken. Nou osi annan nou bann krediter prive ki an form *Euro Bonds*. Finalman i annan bann krediter komersyal.

Dezyenm kestyon Ki kalite Lagreman ki sa bann diferan *loan* i anba la? Mr Speaker i enportan note ki sak sa bann *loan* i vin ek zot prop Lagreman. En parti sa bann *loan* i konsesyonnal, ki vedir zot annan en to lentere pli ba. E osi zot term repeyman, i pli bon. Akoz i les ou pey lo en pli bon term. Sa i prensipalman bann *loan* avek bann krediter multilateral.

Menm si sa bann *loan* i pli atiran, ou annan serten limit lo ki kantite en pei i kapab prete e pour sa rezon ki nou sours *loan* kot lezot krediter. Pour nou donn Lasanble an detay lo kondisyon, sak sa bann *loan* i pou en gran prosedir vi dan nou liv nou annan *loan* pou en sonm R17.9bilyon.

Sepandan tou lannen dan nou piblikasyon kont Gouvernman, nou pibliy lalis *loan* ki nou annan avek tou krediter. Par egzanp, pour lannen 2020 i trouve lo paz 234, *Annual Financial Statement* ki donn tou sa detay.

Alors nou kapab don Lasanble, bann endikater ki ede pou donn en apersi lo kondisyon striktir nou det. Konpozisyon det Gouvernman i *comme* swivan: -

Kantite *loan* an Roupri Sesel i 54 poursesan. Kantite *loan* an Dolar Ameriken i 26poursesan, kantite *loan* an Ero i 10poursesan, kantite *loan* an SDR i 8poursesan. Bann lezot endikater i *comme* swivan: -

An mwayen kantite letan avan nou fini repey sa bann *loan*, det total i an mwayenn 4.9lannen. Tou le lannen nou repey apepre 538milyon det eksteryer e 2.5bilyon det domestik.

Kestyon nimeron 3, konbyen larzan an total pou tou sa bann diferan *loan*?

Mr Speaker sa bann sif i apartir lafen Out 2022. Total det domestik i R9.8 bilyon, ki enkli R9bilyon pour Gouvernman e 0.8 bilyon garanti pou bann lantrepriz piblik.

Sa total i kapab ganny klasifye *comme* swivan: -
 2.3bilyon dan *treasury bill*.
 5.9bilyon dan *treasury bond*.
 1bilyon dan *loans*.
 507milyon dan bann lezot *liabilities* ki enkli *deposit*.

Total det eksteryer i 7.6bilyon ki enkli 7.4bilyon Gouvernman, e 118milyon garanti pour nou bann lantrepriz piblik.

Sa total i kapab ganny klasifye *comme* swivan: -

R5bilyon *loan* kot nou bann krediter multilateral.
 R1.26bilyon *loan* kot nou bann krediter bilateral ki enkli R607milyon *Paris Club* e R653milyon *non-Paris Club*.
 R239milyon *loan* kot bann Labank Komersyal. R1.1bilyon i *private bonds* enternasyonal.

Kestyon 4;- Ki kantite an term poursantaz sa sonm i ete lo kapasite garanti ki pei i kapab abzorbe?

Sa keston napa en larepons defini. Napa en nimeron spesifik an term kantite det en pei i kapab pran. Lesansyel se ki ler ou analiz si en pei, i kapab revey sa det, dan dirasyon sa *loan*, ou e ou det i soutenab, ou kapab pran sa det.

An se moman, det pei i tonm apepre 61.8poursan nou *GDP*, sif pou lafen Out 2022.

Menm si det i soutenab Gouvernman pe redwir, pe target redwir li pou ariv 50poursan *GDP* an 2026.

Bi, se pour redwir e donn lespas fiskal dan Bidze pour lezot depans. Soutenabilite nou det i enportan pou Sesel kapab abzorb okenn sok e pran nouvo det dan en kriz ekonomik.

Mr Speaker letan nou fer nou analiz, nou pran an kont depans lenvestisman Gouvernman. Parey zot konnen en bon parti bann depans lenvestisman dan prokirman pour bann proze konstrikasyon, i annan en lenpak direk lo marse deviz.

Alors bann travayer Minister Finans i travay konzwentman avek travayer Labank Santral pour vwar lenpak sa bann desizyon lo lekonomi.

E nou balans sa bann desizyon lo kantite *loan* Gouvernman i kapab pran. Mersi Mr Speaker.

MR SPEAKER

Mersi Minis. Siplemanter Onorab Aglae.

HON EGBERT AGLAE

Minis mon a dir ou mersi pou ou bann larepons. Minis mon siplemanter i pou vize lo bann *loan* eksteryer.

Minis, eski tou sa bann *loan* eksteryer ki nou annan ki swa bilateral ouswa multilateral, nou bann repeyman i azour parey nou Lagreman - bann Lagreman ki'n sinyen.

Dezyenman, eski i annan bann negosyasyon petet anvi ki tou pei in pas dan peryod *COVID*, e lekonomi ti pe ganny afekte. Eski in annan bann negosyasyon an term repeyman ouswa lentere, menm ki nou pe pey lo sa bann *loan*?

E dernyen eski, dan prozeksyon devlopman pei Gouvernman pe mazin pran okenn nouvo *loan* pou devlopman? Mersi.

MR SPEAKER

Mersi Onorab. Minis ou repons?

MINISTER NAADIR HASSAN

Mersi Mr Speaker. Mersi Onorab pour bann kestyon siplemanter. Si ou ti kapab zis repet kestyon nimer 3 ki ou'n demande - mon pa'n ganny sa silvouple.

HON EGBERT AGLAE

Nimer 3, i eski Gouvernman, i vin pran okenn nouvo *loan* kot i konsern devlopman pei? Mersi.

MR SPEAKER

Mersi. Minis.

MINISTER NAADIR HASSAN

Mersi Mr Speaker. Mersi Onorab. Mon a pran kestyon nimer 3 premye. Gouvernman i toultan pe analize e pe diskite, pour li pran bann det pour finans diferan proze e osi si annan finansman bidzeter ki i ganny fer.

Priyorite Gouvernman an se moman, an vi ki ler ou get marse finansyer enternasyonal, kot lentere pe monte. *Focus* Gouvernman se asire ki okenn *loan* ki i pran, i avek bann partener ki kapab donn nou bann lentere kondisyon konsesasyonel, *ok*?

So sa i *ongoing* pour plizyer proze. Lo dezyenm kestyon *regarding*, si i annan okenn negosyasyon lo repeyman. I annan en re-negosyasyon, ki ti fer avek en vremen, en vye det avek Gouvernman Libyen ki nou'n finalize.

E ti annan serten eleman lentere ki zot ti pe *claim*, ki nou'n kapab negosye pou fer desann. E finalman nou'n agree pour nou *settle* sa det. Mon krwar sa nouvel ti sorti dan *last two weeks*. So sa in *sort out*.

Me ki nou ti fer osi, lo kote det domestik. Nou ti annan en restriktirasyon det domestik pour nou asire ki bann det i vin

pli. E sa nou ti fer li, *as part of* program *IMF*.

Ki bann det domestik nou pe koz *treasury bills* la, ki bann det i vin pli lonterm a en kou abordab. *Now* mon krwar i enportan osi ler nou *look at this issue of* negosyasyon det, i enportan pour nou *maintain* nou *country rating*. *Ok?*

Ler ou al fer restriktirasyon det, i toultan annan en lenpak lo ou *country rating*. Akoz depandan lo sa restriktirasyon ki ou fer, i kapab ganny konsidere koman en *default*. E i afekte ou *rating*. *So as much as possible*, nou pa fer li, *unless absolutely* nesaser.

Lo ou premye kestyon, se lo premye siplimantasyon lo *loan* eksteryer. Eski tou peyman i an det? Wi, tou peyman i a ler e napa okenn *default* lo nou bann det. Mersi.

MR SPEAKER

Mersi Minis. Kestyon Onorab Cosgrow.

HON WALLACE COSGROW

Mersi Mr Speaker. Bonzour Minis, bonzour ou tim, bonzour tou dimoun. Minis eski ou kapab donn nou si ou annan sa lenformasyon donn nou, en kontrandi lo ki valer petet bann

loan ki'n ganny pran pandan sa dernyen 2an?

E osi Minis eski ou kapab dir nou, eski ki abilite Gouvernman ozordi la pour garanti bann antrepriz prive, e la mon pe mazin sirtou par egzant *PUC*. Akoz lantrepriz paraetatik pardon, mon pe mazin sirtou *PUC*, kot tou dernyerman nou ti diskit lo en, lo son bann diferan plan *sewage* dan pei. E *PUC* ti dir nou zot vwar li difisil akoz zot bezwen pran kredi, e kredi pou bann diferan plan *sewage* dan pei, i enn ki pou ser.

So ki abilite Gouvernman ozordi, la pou kapab garanti *loan* bann lantrepriz paraetatik? Mersi.

MR SPEAKER

Mersi Onorab. Minis?

MINISTER NAADIR HASSAN

Mersi Mr Speaker. Mersi Onorab pour ou de kestyon. Lo premye kestyon det i lo en *downward trend*. Ler mon ti pran lofis det ti zis par anba 100poursan *GDP*. E an Out det ti'n tonm apepre 61poursan *GDP*.

Nou antisipe avek bann serten *loans* ki nou pou pran, sa pou retourn apepre 67 poursan *GDP* by lannen.

Me tou prozeksyon makroekonomik ki nou'n fer, se nou *ok* pou nou pey det nivo ki i ete la. E anefè avek stratezi bidzeter, lo kote pour nou fer komans fer sirplis lannen prosenn pour nou det kontinyen redwir.

So larepons premye kestyon Gouvernman i *ok* avek pou li servis tou son det. Lo kote bann garanti. Wi, i annan bann limitasyon lo kote garanti e sa i anliny avek nou bann *debt ceiling* ki nou annan.

So sa in toultan egziste *debt ceiling*, ki nou kapab annan *both loan* direktman ki Gouvernman i pran, e bann ki garanti bann lantrepriz piblik.

Be i annan serten diskisyon ki nou pe fer, avek nou bann partener multilateral, e lezot. Ki *manner through* nou kekfwa *increase* nou bann kapital dan sa bann lenstitisyon, ki bann lakonpanyen parey *PUC* i kapab, pran *loan* direktman avek zot, san bezwen en *Government guarantee*. sa i ava don plis fleksibilite pou *PUC* pran *additional* det pou finans son bann lenvestisman.

Me *PUC* son plan lenvestisman osi, e i baze lo i annan en serten eleman ki Gouvernman osi i donnen dan Bidze. So i pa zis *from, loan* ki i

pran e reveni ki i fer. Me osi serten provizyon dan Bidze li menm, pou *PUC*. Mersi.

MR SPEAKER

En klarifikasyon Onorab. Wi?

HON WALLACE COSGROW

Mersi Mr Speaker en klarifikasyon. Mon premye kestyon ti *about* ki valer, lakantite *loan* zot in pran between sa dernyen 2an la? Mersi.

MR SPEAKER

Mersi.

MINISTER NAADIR HASSAN

Ok yes Onorab. Pour *World Bank*, i tonm \$90milyon e *FDB* \$70milyon. E *IMF* \$79.5milyon. Mersi.

MR SPEAKER

Mersi. Bon mon a pran dernyen kestyon Onorab Waven William.

HON WAVEN WILLIAM

Mersi Mr Speaker. Mr Speaker mon ti a kontan demann Minis, si i kapab dir ek sa Lasanble, si i annan sa lenformasyon, ler i konpar Sesel ek bann pei larezyon ki *manner* i vwar Sesel ek son nivo det soutenabilite konpare ek bann pei dan larezyon.

Epi dezyenmman, resaman nou'n ganny en *Fitch rating, B plus*. Eski sa osi i pran an konsiderasyon sa *rating*, kapasite pei pour li kapab servi son *loan*? Savedir eski nou dan en pozisyon konfortab letan nou'n ganny sa *B plus Fitch rating*? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab. Lo ou premye kestyon *regarding* konparezon det Sesel avek lezot pei, i varye. Diferan pei i annan diferan nivo det. Ler nou pe koz li *debt to GDP*, nou servi en menm *ratio*. Me ki nou vwar diferans se ki Sesel nou, nou lo en *downward trend* lo nou det.

Me bokou lezot pei zot l sa ki nou apel *debt distress*. Savedir zot det pe ogmante. I en pe sityasyon ki nou ti vwar nou an 2020, kot ler nou ti vin dan Lasanble mon ti anonse poudir nou det nepli soutenab. *Ok?*

So bokou pei pe vwar zot dan sa laliny, e parey mon pe dir i varye *from* pei tou pei depandan lo zot performans ekonomik, e zot ki mannyer zot *manage* zot Bidze. Me pour nou i lendikasyon ki bon se ki, i lo en *downward trend* e i pe

desann pli vit ki nou ti'n antisipe.

So Gouvernman i konfortab ek sa, e tou nou partener i enkonfortab ek sa. E sa i anmenn mwan lo ou dezyenm kestyon ki ou'n demande. Annefe ou, ou *country rating* i baze lo prensipalman tou endikater mannyer, i marye ek kanmarad, pou donn sa lendikasyon. Eski ou kapab *meet* tou ou bann repeyman det.

Sa i prensipalman ki en *rating* i *reflect*. So Sesel in ganny *upgrade from* en *B positive to a double BB minus*. Savedir i *one notch up*. Savedir ki i pe dir ou se ki abilite Sesel pou repey son det, pou *meet* tou son lobligasyon in *improve*. Sa ki en endikater dan en *summary* pe montre ou. Mersi.

MR SPEAKER

Mersi. A se pwen mon krwar mon kapab eskiz Mr laporte akoz nou'n fini avek kestyon Fon Pansyon. Mon a dir li mersi pour son partisipasyon. Bon nou a pas lo kestyon 179. Onorab Regina Esparon?

HON REGINA ESPARON

Mersi Mr Speaker. Mr Speaker eski Minis i kapab dir Lasanble si dan sa legzersis revizyon saler ki pe al ganny antreprann,

i pou osi pran kont bann revizyon *Scheme of Service* ki ti'n deza ganny propoze, me pa ankor met an aplikasyon:

a) an sa ki konsern *allowances*. E

b) lezot benefis parey *telephone allowance, clothing, marketable skills allowance, housing allowance* pou bann *graduates*.

MR SPEAKER

Mersi Onorab. Minis ou repons.

MINISTER NAADIR HASSAN

Mersi Mr Speaker. Mersi Onorab pour ou kestyon. Mr Speaker revizyon *Scheme of Service* ki'n ganny propoze par diferan lorganizasyon dan zot Bidze 2023. E ki pou annan enplikasyon bidzeter adisyonnèl. Sirtou sa ki annan logmantasyon dan bann *allowance* e saler de baz, pa pe ganny konsidere pour lemoman.

Sa akòz i pou annan en lenplikasyon direk lo travay, ki pe ganny fer anliny avek revizyon saler de baz. E kot serten sa bann *allowance* pou ganny konsolide, dan saler de baz.

Par kont travay pour revwar serten *Scheme of Service*, pou met li azour ek

bann devlopman striktirel, an ki konsern fonksyonman en lorganizasyon, en profesyon, en sektè e osi ek bann sanzman Polisi Gouvernman. Sa pe kontinyen fer ler i neser.

Mr Speaker i bon note ki anliny avek bann prosedir e Polisi ki an plas dan servis piblik, peyman *risk allowance* pa konsidere. Akòz sa eleman *risk*, i ganny konsidere dan evalyasyon bann pos.

Napa peyman *housing allowance*, i annan peyman *graduate allowance*. Aplikasyon tou bann *allowance* pe ganny revwar dan sa legzersis revizyon saler, ki pou ganny anonse dan Bidze 2023. Mersi Mr Speaker.

MR SPEAKER

Onorab Esparon ou annan siplemanter?

HON REGINA ESPARON

Mersi Mr Speaker. Mr Speaker eski koman en Gouvernman responsab ki krwar dan solisyon, Minis i kapab dir nou si dan lefitir o firamezir ki lekonomi i amelyore,

Gouvernman pe osi mazin travay pre ek sektè prive pou vwar ki mannyer, kot i posib zot osi zot revwar saler zot travayer. Sirtou pour bann kad ki lapey i pli ba?

E dezyenmman eski Minis i kapab dir nou avek sa revizyon saler, si zot pe mazin osi rekalkil *minimum wage across the Board*, avek bi aziste lapey bann travayer ki zot lapey i pli ba? Mersi.

MR SPEAKER

Mersi onorab. Minis ou repons.

MINISTER NAADIR HASSAN

Mersi Mr Speaker. Mersi Onorab pour bann kestyon siplemanter. Lo premye kestyon pour Sekter Prive. Pour lemoman Gouvernman pou kontinyen son diskisyon avek plizyer bann diferan partener dan sekter prive.

Parye SCCI e lezot, pour fer sa *call* pour ki bann revi saler i ganny fer osi dan Sekter Prive, dapre zot mwayen pou fer li. So Gouvernman i reste angaze avek sekter prive, pou les sa arive.

Me mon krwar osi ler Gouvernman, li menm li i fer azisteman saler i endirekteman kree en presyon pour sekter prive li osi aziste. E dan lepase ler sa in arive, nou'n vwar poudir i toultan kree en presyon pour sekter prive li osi aziste.

Lo ou dezyenm kestyon lo *minimum wage*, pour lemoman Gouvernman pa pe regard en *increase* dan *minimum wage*.

Akoz i annan plizyer faktor sirtou lo kote lenflasyon, pou fer biznes e lezot ki bezwen ganny regarde. I en legzersis ki bezwen ganny fer ase pridaman.

E sa i ava en keksoz ki Minister avek lezot partener ava regard ladan pour lannen prosen. Me pou lemoman Gouvernman pa pe regard *minimum wage*. Mersi.

MR SPEAKER

Mersi. Kestyon Onorab William.

HON WAVEN WILLIAM

Mersi Mr Speaker. Mon anvi demann Minis si bann *Scheme* ki pe ganny revize vizavi saler, i pou enkli osi bann *Scheme of Service* pou bann Diplomat? Mersi.

MR SPEAKER

Mersi Onorab. Minis.

MINISTER NAADIR HASSAN

Mersi Mr Speaker. Mersi Onorab pour ou kestyon. Sa revi saler ki nou pe fer, nou pe fer en revi striktirel. *Ok?* So sanmenm sa ki mon'n dir nou pa pe vremen regard spesifikman bann *individual Scheme of service*. Akoz nou pe get en logmantasyon *across the Board* pour tou travayer Gouvernman.

Me i annan en keksoz osi ki nou bezwen diskite lo *Scheme of Service*, e sa en konversasyon ki annefe ki mon pe fer avek *the Chief Secretary*. Se ki i annan plizyer *Schemes of Service*, ozordi dan Gouvernman.

E i fer en dezord dan lafason ki saler Gouvernman i ete. So i annan en louvraz ki *Public Service Bureau*, pou fer ansanm avek Minister Finans, pour nou kapab anmenn en pe plis, pour nou *streamline* sa *issue of Scheme of Service*.

An regardan spesifisite serten louvraz ki bezwen annan *differentiation*. So sa i en louvraz ki nou pou fer avek *PSB*, pour nou redwir sa kantite *Scheme of Service* ki egziste ozordi e ki fer en dezord. Mersi.

MR SPEAKER

Mersi. Kestyon Onorab Cosgrow?

HON WALLACE COSGROW

Mersi Mr Speaker. Mr Speaker anvi repons Minis ki Minis i dir pour lemoman Gouvernman pa pe eksplor posibilite *increase minimum wage*. E nou a note ki mazorite travayer Seselwa, i travay dan sekter prive.

E pour lemoman sel mekanizm ki annan pour revwar saler sekter prive se

atraver en sanzman dan *minimum wage*.

So eski Minis i kapab dir nou, si zot pe eksplor lezot posibilite. Ki bann lezot posibilite ki zot pe eksplere pour kapab, si i annan en nesosite pou annan en logmantasyon saler.

Ki zot pe eksplere pou kapab donn sa logmantasyon. An vi ki ou dir nou pe eksplor logmantasyon dan sekter piblik. E nou konnen sekter piblik i bokou mwens travayer ki sekter prive ozordi. E zis en group travayer ki pou annan logmantasyon si i arive annan. Mersi.

MR SPEAKER

Mersi Onorab. Minis ou repons.

MINISTER NAADIR HASSAN

Mersi Mr Speaker. Mersi Onorab pour ou kestyon. Onorab mon krwar i mazin byen ki normalman, dan lepase osi pa toultan ki ler nou annan en revi dan saler sekter piblik ki Gouvernman in *accompany* sa avek en *increase* dan *minimum wage*.

Me selman mon - e rezon i senp. Rezon i senp. Menm rezon ki Gouvernman avan pa ti fer li *alongside*, i menm rezon ki nou bezwen eksplere. E sa rezon se ki, ki mannyer *any increase* in

minimum wage i afekte *the cost of services* e *the cost of living* ki arive Sesel.

Kekfwa mon a donn ou senp legzanp, e i parey nou konnen *minimum wage*, i enpakte lo *foreign workers as well*, so en senp legzanp. Ou fer monte *minimum* dan sekter konstriksyon, ou pou otomatikman vwar pri lakaz i monte.

E lekel ki soufer demen se pep Seselwa, akoz lakaz i vin pa abordab. So sanmenm sa i enportan ki nou fer en letid ase detaye pour nou gete ki mannyer nou kapab met sa presyon pour ki saler bann travayer Seselwa dan sekter prive i kapab monte. Me nou pa ava tous bann sekter ki pou fer pri lavi, *cost of living* monte. Mersi.

MR SPEAKER

Mersi. Kestyon Onorab Pillay.

HON SEBASTIEN PILLAY

Mersi Mr Speaker. Mr Speaker mon pe get Lalwa Lanplwa. I dir tou travayer, Sesel i annan drwa demann serten kestyon vizavi son saler, si saler pou ganny ogmante, si saler pou ganny koupe, si saler pou ganny varye. Akoz sa i form par Lalwa Lanplwa dan nou pei.

I form par en prensip ki'n ganny etablir menm avek dan laliny ki nou Konstitisyon i ale. So mon ti a kontan demann Minis sa bann kestyon swivan pour li kapab klarifye pour mwan.

So nou dir ki pou napa logmantasyon dan bann *Scheme of Service*. So ler nou pe koz *Scheme of Service*, nou pe koz bann kad. Savedir ou pe mazin *nurses*, ou pe mazin Lapolis, ou pe mazin *teachers*, kot ou annan bann gran group travayer.

Be lefe ki Gouvernman in aboli bann ogmantasyon dan *long service allowances*, ki pou arive avek *long service allowance*, prenon kont ki pou napa revizyon dan *Scheme of Service*. E eski Gouvernman pe konsider pey *long service allowance* pour bann kad par egzanp *teachers* e *nurses* as of 2023?

Mon dezyenm kestyon Mr Speaker, eski Minis i kapab klarifye egzaktman, ki pou arive an relasyon ek sa revizyon saler? Akoz nou'n ganny de diferan *statement* avek Prezidan Larepublik e nou ti a kontan i pa vin parey dezyenm fwa, nou ganny en *statement* ek Prezidan, nou ganny enn avek Minis.

Prezidan in dir ek nou koumsa poudir, sa *temporary assistance* R500 pou kontinyen e ki 2023 pou annan en logmantasyon. So eski Minis i dan en pozisyon, ozordi pour li dir nou konbyen, sa logmantasyon pou ete *from* en pwennvi swa poursantaz, swa *amount* ki bann travayer Seselwa i ekspekte vwar an 2023?

E mon trwazyenm kestyon Mr Speaker avek ou permisyon, prenon kont ki i annan en konsolidasyon bann *allowances*, e an relasyon ek konsolidasyon bann *allowance* i pe fer ki bann dimoun ki menm pe ganny sa bann *temporary salary assistance*, i annan ki pe ganny 40sou oubyen 50sou - pa R500.

E lefe ki *Public Service Bureau*, ti pronons li lo en *performance appraisal* ki ler i ti pronons li i ti ilegal, pa ti ankor vin dan Lalwa, e nou'n fer travayer soumet a sa *performance appraisal*.

E Lasanble menm i ti vwar i bezwen fer serten azisteman avek Lalwa an relasyon avek trezyenm mwan, eski Minis i kapab klarifye, eski Gouvernman i annan lentansyon etabli en *Scheme* peyman pour travayer, *as of* 2023. Oubyen apre 2023? Akoz

baze lo lenformasyon ki ou'n donn nou, ou'n dir nou i annan kantite *Scheme*. Ki kree en kantite distorsyon dan peyman saler pour Gouvernman? Mersi Mr Speaker.

MR SPEAKER

Mersi Onorab. Minis repons.

MINISTER NAADIR HASSAN

Mersi Mr Speaker. Mersi Onorab pour ou kestyon. Mon ganny 4 kestyon non? Si mon'n tyonbo li byen. Premye kestyon, *long service allowance*, e sa pour ganny ankadre nouvo konsolidasyon *allowances* ki pe fer avek *basic salary*.

Lo revizyon saler, Mr Speaker, me si mon vin donn detay lo ki saler pou ete me plito mon pa vin donn *Budget Speech* lo 4 Novanm.

Lo katriyenm lasistans adisyonnal *supplementary income*. Wi ki nou ti anonse se ki tou dimoun pou ganny son saler *up to* R9000. So parey nou ti eksplike si ou ganny R8500, ou ganny R500, si ou ganny R8600 ou ganny R400. Sa mon krwar ti vini, ti byen ganny eksplike dan Lasanble. E bann teknisyen kot Minister Finans lo plizyer repriz in al eksplik sa dan medya.

Mon krwar si pou eksplik plis ankor, mon pa tro konnen

ki pli eksplike, ki nou kapab eksplike ankor.

Lo kote *Scheme of Service*, mon ti a kekfwa envit avek ou permisyon Mr Speaker, *Chief Secretary* pour li donn en pe detay *the thinking* ki nou pe fer e ki li i vwar koman *the Chief Secretary*, lo sa *issue of* diferan *Scheme of Service*. Mersi.

MR SPEAKER

Mersi. Wi *Chief Secretary*.

CHIEF SECRETARY PUBLIC SERVICE BUREAU SHELLA MOHIDEEN

Bonzour tou dimoun. Mersi Mr Speaker. An se moman dan Gouvernman i annan bokou *Scheme of Service*. E parey Minis in dir, i annan serten konplikasyon sirtou letan nou pe vwar ki i annan mouvman *from* en departman Gouvernman pour al kot en lot.

Kot i kapab annan bann konplikasyon sanzman saler. I annan lezot konplikasyon. Ki nou pe sey fer la nou apre sa konsolidasyon - So pour lemoman tou revizyon dan *Scheme of Service is on pause* pour nou fer sa konsolidasyon.

E letan nou fini fer sa konsolidasyon, ki nou le fer, nou le anmenn bann *Scheme of Service* ki en pe pli *broadband*. *Obviously* i ava annan son

minimum ek son maksimonm. E nou pe osi travay lo en metod ki mon a pel li en *scientific calculator*, ki nou pou servi ki pou kapab determin bann saler.

So sa travay ki pe ganny fer. E sa travay nou pe *benchmark* li, avek bann *good practices elsewhere*. I annan serten vizit par egzanp ki delegasyon in fer, Sengapour, par egzanp pou nou regard en pe ki zot, zot pe fer. E apre nou ava regarde ki mannyer dan sa travay ki nou fer, nou ava annan en sistenm, ki ava mwens *service*.

An se moman Mr Speaker zis poudir nou annan nou *over one hundred different Scheme of Service*. E dan sa bann diferan *Schemes of Service*, i annan telman bann pti bout *allowances* ki fer ki annandler letan ou pe aplik li, i anmenn serten, parey Minis in dir anmenn serten konplikasyon.

So nou le en sistenm ki en pe pli *broadband* e apre anmenn sa sistenm *scientific* ki nou pou servi, ki ava anmenn bokou *fairness* letan nou pe enplimant sa nouvo *Scheme*.

MR SPEAKER

Wi Onorab, ou permet en klarifikasyon?

HON SEBASTIEN PILLAY

Mersi Mr Speaker. Mersi pou permit en klarifikasyon, Mr Speaker. Bann dimoun deor ki pe ekoute zot tandé. Mwan mon ti a kontan demann Minis, e *press* Minis ankor lo sa size *long service allowance*. Akoz mon konsernen ek sa de kad travayer, ki zot, zot *length of service* i toultan enn pti pe plis ki dan lamazorite ka.

Sirtou par lefe ki la kad fason ki zot kad travay i ganny konfigire. E sa *teachers e nurse*, e enkli bann polisye. Pandan sa de lannen ki'n pase in napa en logmantasyon dan *long service allowance*, pou bann *teachers* ki'n ariv swa 5an servis, swa 10an servis, swa 15an servis, swa 20an servis.

Sa ki zot pe gannyen la, konmela e zot pou kontinyen gannyen Minis. Sa mon ti a kontan ou klarifye si zot pou kontinyen gannyen.

Me eski par egzanp bann ki'n ganny 20an servis sa lannen *ok*, e bann ki pou ganny ankor 20an servis lannen prosenn, eski pou annan sa logmantasyon dan *long service allowance*, parey ti pe annan avan ki ti annan en *freeze* lo logmantasyon dan *long service allowance*, spesifikman ler nou pe koz bann gran kad?

Parey ou dir bann *broadband Scheme*, parey pou

teachers, parey pour *nurses*? Mersi Mr Speaker.

MR SPEAKER

Mersi. Minis repons.

MINISTER NAADIR HASSAN

Mersi Mr Speaker. Mersi Onorab. Mon repet mon lekor ankor, poudir ki sa *issue of bann diferan allowance inclusive long service allowance*, pe ganny pran dan sa revu striktirel lo saler, ki pe ganny fer. E mon asir Onorab ki, logmantasyon saler ki bann *nurse ek teachers* pou gannyen zot pou kontan. Mersi.

MR SPEAKER

Mersi. *A ce point* se pwen nou'n fini avek sa kestyon mon kapab dir mersi *Chief Secretary Public Service Bureau* madanm Mohideen. E i kapab fer son depar. E nou a pran enn pti poz *sanitizing* avan nou apel lot Zofisye.

(technical break)

MR SPEAKER

Bon byenveni e bonn apre midi Mr Francis Lebon ki Sekreter Prensipal pour Komers e i isi pou pran nou dernyen kestyon ki en *Question Without Notice*. E mon zis fer remarke ki sa

Question Without Notice, i ti ganny orizinen dan demann ki Onorab Adelaide ti fer dan Lasanble, lo size en dokiman en S.I. ki ti ganny mete dan Lasanble.

Ler mon ti apros Minis avek sa size. Minis ti dir mwan, poudir i napa en *statement* pou fer lo la. Akoz si i ti pou fer en *statement* ti pou egzakteman sa ki dan sa S.I. E alor sa S.I. i *public knowledge* so i napa en *statement*.

E parey zot konnen *statement* i vin lo demann Minis. So nou, nou pa kapab demann Minis pou fer en *statement*. Me nou kapab demann li en kestyon. E se pour sa ki mon'n donn posibilite Onorab Adelaide, pou met en *Kestyon Without Notice*.

Onorab Adelaide?

HON FRANCOIS ADELAIDE

Mersi Mr Speaker. Bonn apre midi Minis avek ou delegasyon. Bonn apre midi tou dimoun ki a lekout.

Minis mon kestyon i al koumsa:-

Avek sa bann lensertitid ki lemonn pe fer fas avek, kot pri marsandiz pe kontinyelman monte zour an zour, eski Minis i kapab dir avek sa Lasanble, dan ki fason ki S.I. 109 lo *Maximum Retail Price* lo

komodite *STC* i kapab annan en lefe e ki son Minister pe fer pour garanti stabilite dan bann pri marsandiz e servis san afekte bann aktivite biznes an zeneral? Mersi Mr Speaker.

MR SPEAKER

Mersi Onorab. Minis ou repons.

MINISTER NAADIR HASSAN

Mersi Mr Speaker. Mersi Onorab pour sa kestyon. Mr Speaker le 25 Zilyet 2022, mon ti vin devan sa Lasanble pour anons en seri mezir, ki Gouvernman pe pran koman bann sipor tanporer pou asiste Seselwa ki saler i pli ba, dan sa moman difisil.

Kot pri komodite lo marse enternasyonal, i vreman ser. E sa osi i pe enpakte lo Sesel. Parmi sa bann mezir, mon ti anonse, e mon site, "En striktir pou devlop, pou entrodwir pri maksimonm lo serten prodwi enporte, e vann par *STC*, pe al ganny met an plas, pou asire ki pri sa bann komodite i menm parey lo Mahé, Praslin e La Digue. Regilasyon pou ganny drafte pou fer li en lofans pou vann sa bann komodite, a en pri pli o ki sa maksimonm *retail price*."

Alor Mr Speaker depi le 1 Oktob sa mezir in vin an fors. Atraver S.I. 109 pou lannen

2022. *Control of supply and services maximum retail price in articles purchased, from the Seychelles Trading Company Limited Order 2022.*

Sa size *MRP*, i enn ki Gouvernman in analiz tout a prenon kont bann labi dan pri lo marse. Nou konn tre byen ki menm si *STC*, avan sa ti pe propoz (*RRP*) *Recommended Retail Price* ti annan serten marsan ki ti pa pe enplimante.

Akoz anba sistenm *RRP*, marsan ti annan swa. Me avek sa sistenm *MRP*, marsan aprezan pou bezwen respekte akoz i dan Lalwa. Mr Speaker premyerman i bon note ki sa mezir pe ganny enplimante lo zis bann komodite, ki *STC* i enporte e vann.

E menm la i pa lo tou komodite. Gouvernman pe aplik sa mezir, lo sa 14 komodite ki dan kategori 1. Gouvernman pe servi *STC* koman sa platform, pour kit pri abordab dan marse. Akoz prodwi *STC*, i ganny vann dan tou kwen nou bann zil par bann marsan.

Menm si *MRP*, koman en zouti ekonomik, i annan serten dezavantaz dan lonterm, Gouvernman i rekonnet son bann benefis dan kour term, e dan bann sityasyon spesifik.

E sa se i en solisyon dan kour term pou pri pli abordab. E i osi anpes biznes pou pran lavantaz, e abiz lo konsonmater pandan sa moman difisil.

Mon osi oule fer resorti ki *STC* in fini pibliy sa lalis pri *MRP*, dan tou bann laboutik ki vann an detay. E osi pibliy li dan zournal Nasyon.

Sa se avek bi, pou ede edik piblik lo *MRP*. Tou le 3mwan, pri *MRP* pou ganny revize baze lo bann pri komodite ki'n ganny enporte. Nou'n diskite avek *STC* e pour lemoman, komanter ki zot pe gannyen lo lenplimantasyon *MRP*, i vreman pozitiv.

Mr Speaker Komisyon Komers Zis, avek Lotorite *Licensing*, in fini fer bann travay preliminar e en plan sirveyans in ganny met an plas, ki pou ed zot pran, aksyon kot i fodre.

Okenn vyolasyon sa Lalwa i ganny konsidere koman en lofans e en lanmann nivo enn ki pa pou plis, R10mil pou ganny aplike dapre Lalwa *Criminal Offences Standard Scales of Fines Act 2021*.

Avan konklir Mr Speaker, mon le fer resorti ki se Sesel i pa le sel pei, ki'n annan ou entrodwir *MRP*. Bokou lezot pei i annan sa an plas par egzanp *L'Inde, Maurice, Bangladesh, Sri*

Lanka, Pakistan, Nepal, Sengapour.

An konklizyon Mr Speaker parey ti anonse *MRP* i en mezir tanporer e irzan pour en lannen selman. Sa Gouvernman i en Gouvernman responsab, e determinen pou anmenn en meyer lavi pou Seselwa e kot i neserer pran bann desizyon pou ed sa sityasyon ki pe ki Sesel pe ganny enpakte avek. Mersi Mr Speaker.

MR SPEAKER

Mersi Minis wi Onorab Adelaide. Ou kapab poz ou siplemanter?

HON FRANCOIS ADELAIDE

Mersi Minis pour ou leksplikasyon. Mon le zis enn pti klarifikasyon, pour lenformasyon piblik, vi ki mon ganny en pe konplent, ki menm apre le 1 Oktob, ti annan marsan ti pe kontinyen, sarz an plis.

Eski aköz sa *S.I* ti ganny *laid*, le 18 Oktob dan Lasanble Nasyon. Eski bann dimoun ki'n ganny sarze, depi le 1 Oktob, zot annan rekour pour zot vin raporte si i annan levidans? E eski aksyon pou ganny pran avek sa bann marsan e ki sa bann dimoun pour ganny *refund* zot larzan an plis? Mersi.

MR SPEAKER

Mersi Onorab. Yes Minis?

MINISTER NAADIR HASSAN

Mersi Mr Speaker. Mr Speaker, si avek ou permisyon mon ti a les *PS* Lebon reponn sa kestyon, pou donn detay. Mersi.

PS TRADE FRANCIS LEBON

Mersi Mr Speaker. Mersi Onorab pour ou kestyon. Depi ler *S.I.* in ganny lir dan Lasanble, *SLA* avek *FTC* in zwenn ansanm pour zot fer osi en plan ledikasyon ki pou sorti byento pou donn konsonmater lenformasyon, lo ki mannyer pou raporte. I menm parey ki mekanizm ki *FTC* ti pe servi la deza pour bann lezot *breach* parey *expiry goods* ki pe pase dan *market*.

E byensir sa *S.I* i fer provizyon, napa provizyon pou *refund* direkteman konsonmater. So i en lofans ki'n ganny fer e *fine* i al pour Gouvernman dan *Consolidated Fund*. Mersi Mr Speaker.

MR SPEAKER

Mersi. Bon mon konnen poudir dan lepase mon'n ase limite lo kestyon siplemanter, lo *Question Without Notice*.

Me sa ti prensipalman aköz kestyon letan, zot a

remarque zot menm poudir ozordi nou letan i enn pti pe pli lib. E mon pa oule ganny akize ki mon pe fer preferans akoz sa kestyon i sorti kot en kote *LDS*. Mon sansib lo sa bann zafer. Donk mon a zis, nou a zis pran kestyon ki i permet pour ziskan midi edmi.

Premye kestyon i pou Onorab Henrie e Onorab Henrie mon demann li en leskiz akoz mon ti'n met son non lo en kestyon siplemanter lo dernyen kestyon. E apre mon'n bliye.

Onorab Henrie ou annan laparol. Kestyon?

HON GERVAIS HENRIE

Mersi Mr Speaker. *Apology accepted*. Mr Speaker, Minis in dir nou ki *MRP* i en mezir tanporer e irzan. Me anvi ki Gouvernman pe pran bann desizyon brav, ki pou ed son pep. Eski ou Minister i ava kapab swiv byen lenplimantasyon sa *Scheme* ki dan lefitir, swa i ava aplik li pour lezot komodite ki *STC*, ki fer vini parey ou dir *STC* li wi i annan en kantite prodwi li ki fer vini.

E lefet ki *STC* pour Gouvernman i pa pou byen vwar ki dimoun pe fer tro gran gro profi lo sa ki li *STC* pe sibvansyonnen. So i ava etidye pou fer sa, e elarzi.

E dezyenmman en keksoz ki sizyenm Lasanble ki tou lede kote latab in koz lo la sa, poudir regard byen kot bann prodwir ki nou pe vann Sesel i sorti. Kategoriz zot e etabli en *profit margin*, lo sa bann prodwir. E par egzanp *pharmaceutical*, manze;- kategoriz zot pour asir ki i ava en desizyon ki bon pou pep Seselwa, e fer sir ki nou standar lavi i amelyore. Mersi.

MR SPEAKER

Mersi. Minis, ou repons?

MINISTER NAADIR HASSAN

Mersi Mr Speaker. Mersi Onorab pour ou kestyon. Onorab sa propozisyon ki ou'n fer wi, i enn ki vreman valid, pour nou regarde lenplimantasyon sa *Scheme* parey i ete la, ki mannyer i progrese, ki bann keksoz pozitiv ki sorti ladan. Me osi ki bann negativite ki kapab sorti ladan.

Mon zis le fer kekfwa, fer en komanter ler nou pe koz lo maximum profit margin, lo en pli gran scale.

Sa *experiment* ti deza ganny seye, mon pe koz lo maksimonm profit margin lo en pli gran scale. Sa *experiment* ti deza ganny seye Sesel plizyer lannen pase par Gouvernman oparavan. E it i fel. I ti kree plizyer kantite problem, ki pa

ti rezourd sa pri, sa *issue* lo *cost of living*. Ok? So sa mon krwar ler nou pe regard pour nou *extend the MRP*, lo en *scope* pli gran, nou bezwen vreman fer en analiz serye, akoz *price control* li menm li, i anmenn distorsyon dan marse.

I annan plis *negative externalities* ki pozitiv. Sa bokou resers i montre, e dan nou prop leksperyans ler ti annan - avan 2005 sa, kot ti annan *maximum profit margin*, of 30poursan a sa letan. I pa ti *something* ki ti *successful*. Ti annan bann *under evaluation*, *over evaluation*, i annan en kantite keksoz ki ti leve. E i ti kree *black market*, *even* ler nou ti annan-

Si nou *extend price control* pou menm lo kote pri deviz etranzer, kot nou vwar sa ti kree en *black market* akoz ou pa pe les marse adapte lo son *equilibrium*. So i en keksoz ki nou bezwen get li, dan tou son lanplè e fer sir ki nou pa pran en mezir ki anmenn plis negativite ki keksoz pozitiv. Me selman en keksoz ki Gouvernman ava regarde ava evalye. E baze lo la i pran en desizyon. Mersi.

MR SPEAKER

Mersi Onorab Pillay.

HON SEBASTIEN PILLAY

Mersi Mr Speaker. Mr Speaker mon kontan vwar ki apre trwa repriz, ki mon'n koz lo sa Lalwa. premye fwa dan Bidze 2021, Minis ti reponn mwan, dan larepons ki sa Lalwa i pa en keksoz ki i kapab konsidere.

Dezyenm fwa pou Bidze 2022 Minis ti ankor enn fwa reponn mwan ki sa Lalwa, i en keksoz ki zot pa kapab konsidere.

Trwazyenm Fwa an relasyon avek Lalwa *FTC*, e safwasi Minis ti dir mwan, i paret la zot ti'n komans konsidere. I ti dir mwan pour lemoman zot napa okenn Polisi ki an relasyon ek sa Lalwa.

So mon kontan pou vwar poudir, Gouvernman in ekout en kou pour li fer en keksoz. Me selman, i annan serten keksoz ki mon ti a kontan kosyonn Minis ki petet, i kapab afekte lenplimantasyon sa Lalwa. e mon ti a kontan i ekout mwan lo sa baz.

Premyerman Mr Speaker, sa Lalwa dan son striktirasyon, i koz lo en group komodite oubyen komodite. I pa koz lo komodite sorti kot en *supplier*. Sa ki Gouvernman pa'n fer anba seksyon 2, ou pa'n enkli en derogasyon pou bann komodite *provided* par *STC*. Akoz *STC* i *anchor* sa pri.

Sa ki ou'n fer, ou'n fer en *S.I.* ki *follow* from seksyon 2 pou fer ki prezan ou'n kree en group komodite, ki *STC* i enporte. Lefe ki *STC* i en konponan enportan dan lekonomi, ti'n devret annan en lamannman dan *main* Lalwa menm, pou enkli *STC*. *And then* nou ti a kapab, de-koul tou bann komodite ki *STC* i fer vini. Me malerezman nou pa'n fer sa.

So eski Minis i kapab konsider vwar si sa pou napa en lenplikasyon legal lo lenplimantasyon Lalwa? Akoz koman i lir pour lemoman Mr Speaker, i koz lo si Prezidan dan Konsey i satisfè.

E i vwar poudir i esansyel pou *wellbeing* kominote, pour *equitable distribution* ou *availability at fair prices of certain commodities*. Savedir Mr Speaker i fer pour sa *S.I* pou sa bann komodite. I sa komodite ki ou pe kit *at a fair price*. Savedir tou komodite, koumsa i devret vann sa pri. *Unless* ou fer sa derogasyon. Sa i mon premye kestyon.

Mon dezyenm kestyon Mr Speaker, i deza egziste en *First and Second Schedule* pour sa Lalwa. Mon'n regarde e mon pa'n vwar kote sa de *existing First and Second Schedule* in ganny *repealed*.

Premye sa *First and Second Schedule* ki egziste *currently* Mr Speaker, en premye *First Schedule* i egziste an relasyon avek prodiksyon bef, prodiksyon dipen, prodiksyon dizef, prodiksyon *fruit and vegetables*. E sa ti baze lo en *S.I.* ki ti pase byen lontan. Le 26 Zilyet an 1976.

Dezyenm *Schedule* ki egziste, i an relasyon avek pour bann dimoun ki fer prodiksyon agrikol pou *allow* zot pou ganny lenspeksyon. E sa i en *Second Schedule*, ki'n deza egziste, mon pa'n vwar *repealed of the current First Schedule* Mr Speaker, parey pe ganny entrodwir anba nou *S.I.*

So eski Minis i kapab ankor enn fwa redir nou si zot pou regard avek *Attorney Zeneral*, pou vwar si i bezwen annan en *repeal* sa *Schedule*, pou fer ki sa *Schedule*, ki *relate* avek bann pri ki *STC* pe koz lo la, i antre?

MR SPEAKER

Mersi permet Minis reponn sa apre. Nou a pas en pe lo lezot Manm.

HON SEBASTIEN PILLAY

Mersi Mr Speaker.

MR SPEAKER

Minis.

MINISTER NAADIR HASSAN

Mersi Mr Speaker. Mersi Onorab pour sa bann kestyon e komanter. Mon a pran premye komanter ki Onorab in pase, apre mon a donn PS Lebon ek ou permisyon Mr Speaker, pou adres kestyon 2 avek 3.

Onorab, ou dir ki ou ti fer propozisyon 2021, 2020 pour entrodwir *MRP*, selman mon sirprann ki ler ou ek ou parti ti dan Gouvernman pa ti entrodwir sa. Me selman ler ou'n ariv dan Lopoziyon ou'n ganny sa *wisdom*, pour ou vwar poudir sa ti en bon mezir.

(laughter)

MINISTER NAADIR HASSAN

So kekfwa sa leksperyans bouz dan Lopoziyon, in donn ou en bon pe - *well wisdom*. Me lo kote si mon ti dir *cannot be considered*, mon ti spesifikman dir ki mwan mon pa *believe* dan *general price control* e sa i egzaktaman, pwen ki mon'n met devan Onorab Henrie ler in demann mwan sa kestyon.

E mon pwennvi ankor, i ankor parey. E sanmenm sa ki mon'n dir i en mezir tanporer e i en mezir ki son *scope* i ptipti. So mon pa'n *inconsistent* dan mon larepons ki mon'n donner avek Onorab.

Lo dezyenm kestyon mon a donn PS.

MR SPEAKER

PS Lebon wi?

PS TRADE FRANCIS LEBON

Mersi Mr Speaker. Mersi Onorab pour ou kestyon. *Basically*, ou dezyenm kestyon, lo kote *STC*, ler nou ti pe *formulate* sa *mechanism* anba *S.I.* parey Minis in dir dan son *introductory remarks*, se ki nou ti pe konsantre lo ban prodwi ki *STC* i fer vini. E sa 14 prodwir dan *schedule 1*. *Ok?*

Akoz nou pe servi *STC* koman sa platform e sa veikil pou fer pri vin pli abordab, aköz *STC* son bann prodwi i vann dan tou kwen Mahé. Mon konpran sa kestyon ki ou'n demande, selman pour nou, nou ti pe *focus* zis sa ki *STC* i fer vini. Nou pa ti pe get son *brand* spesifikman, pou donn *STC* osi sa fleksibilite.

Akoz nou konnen mannyer marse enternasyonal i ete, i annan kantite *disruption* pour lemoman. So nou, nou nide se sa 14 prodwi anba *schedule 1* ki *STC* pe fer vini, Sa bann prodwi i ava ganny *MRP* lo la. E konsonmater ava ganny a sa pri ki'n ganny deside par *STC* ki ava abordab partou dan

kwen Mahé e Praslin ek La Digue. Sa i pou dezyenm.

Nimero 3 lo kote si pou *repeal* sa Dezyenm *Schedule*. Mon mazin *the S.I. in go through the AG's Office*. Be selman mon ava zis klarifye ek li zis pou fer sir. Selman dan sa kopi ki mwan mon annan, dan sa *first schedule* i annan sa lalis komodite. 14 komodite, e sa enn dezyenm i annan sa bann *designated institution* ki pou fer egzekisyon lo la. Mersi Mr Speaker.

MR SPEAKER

Bon mon oule fini sa sesyon midi edmi, aköz mon pe mazin mon program apre midi. So mon annan 3 dimoun ki'n lev lanmen. Minis ek bann Manm, mon ti a kontan nou kestyon bref direk koumsa nou a permet zot. Onorab Cosgrow ou pe sinyal mwan ou pa pe demann kestyon?

Si ou pa, ou kestyon i ou kestyon. Si ou pa oule demande mon a pas lo lot. Ale demann ou kestyon.

HON SEBASTIEN PILLAY

(Off-Mic)

MR SPEAKER

Onorab. Ale *point of order* wi.

HON SEBASTIEN PILLAY

Mr Speaker premyerman verbatim Lasanble devan, sa ki mon ti dir an relasyon ek sa Lalwa sete zisteman ki aköz ki pri komodite pe kontinyelman monte Gouvernman, i devret konsider servi sa Lalwa.

E larepons Minis ti nou pa pou kapab rekonsider sa Lalwa. E mon pwen avek ou Mr Speaker ki mon pe enplor Minis pour li konpran ki mon pe dir li. Lalwa mannyer i egziste ozordi -

MR SPEAKER

Minis.

HON SEBASTIEN PILLAY

Sa Lalwa Mr Speaker.

MR SPEAKER

Ou nepli lo *point of order* la, Onorab!

HON SEBASTIEN PILLAY

Wi be mon'n sorti - mon pe al lo mon kestyon aköz mon pa le gat letan sa Lalwa. Sa Lalwa i enportan pou Seselwa. Dan sa Lalwa son laplikasyon, sa ki Mr Lebon pa pe konpran mwan Mr Speaker.

(Zot pa mwan ki pa'n ranpli zot ver relax ...)

MR SPEAKER

Ale.

HON SEBASTIEN PILLAY

Sa ki Mr Lebon pa pe konpran mwan. Se ki i deza egziste en *First and Second Schedule* anba sa Lalwa.

There has been no repeal me i supersede kwa, i bezwen annan en repeal of the two schedules!.

MR SPEAKER

Ya ok.

HON SEBASTIEN PILLAY

So Minis in fer Lalwa li menm i pa konnen ki i pe Mr Speaker!

MR SPEAKER

Minis ou annan ...

HON SEBASTIEN PILLAY

There's no such thing as supersede. Minis i bezwen retourn ek son Lalwa al aranze!

MR SPEAKER

Mersi Onorab. Ou war Onorab ou'n demann mwan, en *point of order*, me ou sa ki ou'n fer se ou'n prosede avek largiman e avek lot kestyon. Prezan ou vwar ki mannyer keksoz i marse.

Minis eski ou kapab adres sa, eski ou annan en repons, pou permet mwan *move* lo lezot kestyon?

MINISTER NAADIR HASSAN

Non mersi Mr Speaker. Mr Speaker sel keksoz ki mon ti annan poudir se ki, mwan mon pa en Avoka, e mon pa *claim to be* en Avoka. Be Biro *Attorney Zeneral* i Avoka ki met tou *Polisi Gouvernman into law*. So mon kit sa dan lanmen sa, mon pa *claim to be* en Avoka mwan. Mersi.

MR SPEAKER

Mersi Onorab Cosgrow ou kestyon. Bref silvouple.

HON WALLACE COSGROW

Mersi Mr Speaker. Vreman bref. Nimero enn mon enn pti pe soke ki nou pa ankor *rollout* en plan pou enform piblik, prezan ki nou pe met ansanm.

Dezyenm Mr Speaker, eski Minis i kapab dir nou si i annan, in annan bann konsiltasyon ki'n fer ek bann parti prenan par egzantp *Retailer's Association* pour zot kapab konpran lenplikasyon sa Lalwa ki devan nou ozordi? Mersi.

MR SPEAKER

Mersi. *Panel*, Minis a adres dezyenm pwen?

MINISTER NAADIR HASSAN

Mersi Mr Speaker. Mon ti ava envit avek ou permisyon *PS* Lebon pour eksplik louveraz ki'n

ganny fer lo kote konsiltasyon.
Mersi.

MR SPEAKER

Wi.

PS TRADE FRANCIS LEBON

Mersi Mr Speaker. Mersi Onorab pour ou kestyon lo kote, lo kote konsiltasyon *STC* in koze avek bann *retailers* pou enform zot ki manner sa pratik pou vini, lo sa kote. Me selman ou premye kestyon lo *regarding* plan ledikasyon. Menm si sa in ganny sinyen le 6 Oktob, *by the time* tou keksoz ti sorti ti tonm dan le 17.

E *given* ki de lenstitisyon ki pe travay lo la, plan i deza la, e ozordi petet pli tar pour vwar sa bann plan ledikasyon i sorti an mezir keksoz i ganny ranforsi. So sa ki ou pe vwar *MRP* la, lo kote ledikasyon i pa pou diferan son ledikasyon ki *FTC* in deza pe fer *expiry product* ek larestan. So i zis en kontinyasyon.

So i pe vini. I pou sorti e ki manner pou enformen osi si i annan *breach* osi i pou ganny sorti sa de lenstitisyon, pe travay tre pre ansanm.

So bear with us for this. Thank you.

MR SPEAKER

Mersi. Onorab Naidu, bref silvouple.

HON SATHYA NAIDU

Mersi Mr Speaker. Bonn apre midi Minis ek ou delegasyon. Zisteman lo pwen ki Onorab Adelaide ti'n souleve pli boner, ler i annan bann konsonmater ki ganny afekte, ler en komodite pa pe ganny vann dapre *MRP*, eski pou annan en *hotline* par egzant ki dimoun pou kapab pran kontak direkteman pou fer resorti zot konsern?

Dezyenmman lo kote mendev, eski zot annan ase? Lekel bann zofisye konsernen ki pou kapab adres sa bann defayans lo kote *MRP*, ouswa pou menm *police MRP*?

Ki pou arive vizavi bann komodite tel ki ponmdeter zoranz, zonnyon kot i annan diferan fourniser apard *STC*. Ki manner eski ou pou kapab asire ki i pou ganny vann lo *MRP*? Ki bann mekanizm ki an plas? E kwa ki bann marsan i bezwen fer *in terms of display*, prodwi osi. Tanzantan i annan bann defayans. Ki manner zot kapab fer sir ki pou ganny vann dapre *MRP*? Mersi.

MR SPEAKER

Mersi mon krwar ase kestyon. Wi Minis lekel ki pou adrese. *PS.*

PS TRADE FRANCIS LEBON

Mersi Mr Speaker. Mersi Onorab pour ou kestyon. Premye kestyon lo kote *hotline*, lenformasyon pou sorti sa semenn. Sa *mechanism* i deza la kot *FTC*, kot dimoun pe raport bann diferan keksoz ki zot vwar.

SLA li osi i ava donn, i ava donn son nimer. *So basically*, sa in vini ganny aranze, sa plan aksyon. *So sa i deza la*. Pou napa en nivo nimer ki pou ganny sorti, *so FTC* pou servi son menm resours avek son bann menm mekanizm ki annan.

Akoz i deza annan biznes protez konsonmater e tou sa bann lannen, sa dernyen 12an. *So sa i pou zis en keksoz adisyonnal*, ki zot pe bezwen pe fer.

Pa bliye poudir *both* lenstitisyon i annan pouvwar pou fer lenspeksyon e *FTC* in toultan fer lenspeksyon. Menm si ozordi i pe fer li pour *MRP*. *So napa nanryen ki pou sanze i zis en keksoz adisyonnal ki lo zot*. Mendev in ganny restriktire pour adres sa konsern aköz sa *order* i enportan. E i enportan ki nou, enplimant li byen.

Ok lo dezyenn kestyon lo kote, diferan fourniser parey ponmdeter. Mwan mon get sa

koman bann *loose item* dan *schedule 1*. Vre sa ti an konsiderasyon, ler nou ti pe mazin *the regulation*. Me selman nou annan seksyon 3 ki donn nou posibilite pou vizit bann ler ou al kot bann premises pou fer lenspeksyon ou get osi bann *accounts*, bann *delivery* ki'n ganny fer.

So sa zouti ek sa mechanism i deza ladan. Me selman pa tou sa bann keksoz ki nou pou kapab fer li 100 poursan. Aköz par ler pou en pe difisil osi, me selman *the mechanism* i ladan. *The executing authorities* i konnen e zot, zot ava fer sa travay lo sa kote. Mersi Mr Speaker.

MR SPEAKER

Mersi kantmenm nou'n depas letan, mon a bezwen pas kestyon Onorab Lemiel zis pou konplete. Onorab.

HON SYLVANNE LEMIEL

Mr Speaker mersi, en bout mon kestyon in ganny reponn, in ganny demande par Onorab Naidu. Me mon konsern aköz ziska aktyelman, wi nou konnen bokou marsan pe respekte *RRP*. Me nou bezwen vey sa bann marsan osi avek *MRP*, aköz i pou fer parey. Mon annan serten laboutik spesifik, ki mon pou anmenn non kot

zot, byento. I annan en sistenm fer sa. Menm si i annan bann regilasyon ki'n ganny met an plas.

En legzanp ou pran en boutey delwil *Sunflower*, i pran kot *STC* i annan *sticker STC* lo la, i sipoze vann R34 ler ou al i annan son pri R34 lo la. Me ler ou ariv devan lo *counter*, si ou pa demann li konbyen i tir R38. *So therefore*, mwan mon krwar sa bann dimoun ki vin verifye, ki vin regarde dan laboutik, i annan serten keksoz spesyal osi ki zot bezwen.

Mon pa konnen ki fason zot pou fouy sa, zot osi. Pour zot kapab konnen poudir i annan sa bann keksoz ki pe pase. E Lalwa li menm li, mon konnen ou'n dir pou annan *hotline whatever*. Me selman i annan bann in *dept investigation* osi ki zot zofisye i bezwen pe kapab fer.

MR SPEAKER

Mersi Onorab. Wi *PS* ou a kapab donn larepons.

PS TRADE FRANCIS LEBON

Mersi Mr Speaker. Mersi Onorab pour ou sa pwen tre valid. Zis pou tous enn pti git lo *RRP*. Wi zot pa ti pe respekte, be selman i ti en rekomandasyon, ou konpran napa nanryen ki okenn lenstitisyon ti kapab fer

zot penaliz zot. Me anba sa Lalwa i diferan, akoz i annan en *fine* si zot vann par lao.

Me selman mon konnen poudir bann lenspekter ler zot ale, lo kote *SLA* ek *FTC*, ki mannyer mon'n ganny enformen ki zot in ganny *brief*. I pa zis pou get sa *sticker* ek sa pri lo sa komodite. Zot osi kapab pran komodite osi pas li dan *till* gete ki pri zot pe donner. So sa bann keksoz nou okouran.

E sa bann zofisye kot *market surveillance* zot in ganny *well trained* pou fer sa. E mon konnen poudir zot pou fer li tre byen. E la mon ti a kontan averti piblik osi, pou vin nou zorey avek lizye, pour sa de lenstitisyon donn lenformasyon pour zot santi. Akoz sa in ganny mete pour zot, pour zot pa ganny afekte.

So kot zot pe vwar ed lotorite akoz lotorite pour napa mendev pou al partou. Annou servi sa bann platform ki annan, pour nou ed Lotorite pour li enplimant li byen ki a vin dan benefis konsonmater. Mersi Mr Speaker.

MR SPEAKER

Mersi. Minis wi en dernyen mo?

MINISTER NAADIR HASSAN

Mersi Mr Speaker. Zis pou mwan azout en dernyen keksoz lo sa size ki Onorab Lemiel in mete. Nou osi annan sa *requirement* ki pou vin an fors boner lannen prosenn, pour zot annan en *cash till* avek *POS*. Sa osi pou mars byen ansanm avek sa mezir. Akoz pou bezwen annan en resi sorti dan en *till* and all ki i ava annan levidans.

Me osi konsonmater i bezwen pran son responsabilite pou demann osi demann son resi *and all*. Mersi.

MR SPEAKER

Mersi, mersi tou dimoun nou pe termin sesyon kestyon la. Mon remersye Minis e son delegasyon pour zot partisipasyon. E mon swet zot bon kontinyasyon. Nou a pran poz la e Lasanble i a rebran 2er apre midi.

(BREAK)

MR SPEAKER

Bonn apre midi tou dimoun. bon nou kontinyen travay avek *Second Reading Bill*. Madanm raporter i ava apel delegasyon Vis-Prezidan silvouple.

Bonn apre midi Vis-Prezidan, ou avek nou pour *Constitutional Appointees Emolument (Amendment) Bill 2022*. *Attorney General* i pou

zwenn nou apre, nou kapab konmanse san li, tre byen. Nou annord pour komanse. Mosyon pour *Second Reading public Bill*. Onorab *Leader* Biznes Gouvernman.

HON BERNARD GEORGES

Mersi Mr Speaker. Bonn apre midi Mr Speaker, bonn apre midi Vis-Prezidan, tou mon bann koleg Onorab e tou dimoun ki pe swiv nou.

Mr Speaker anba *Order 69(2)* nou *Standing Orders*, mon ti a kontan *move* ki *the Constitutional Appointees Emolument (Amendment) Bill, 2022* i ganny lir en Dezyenm Fwa. Mersi.

MR SPEAKER

Mersi, nou a ganny segonnman pour sa? Onorab Henrie.

HON GERVAIS HENRIE

Motion seconded Mr Speaker. Mersi.

MR SPEAKER

Mersi mon ava envit Vis-Prezidan pou prezant sa *Bill*.

THE VICE-PRESIDENT AHMED AFIF

Mersi bokou Mr Speaker. Bonn apre midi Mr Speaker, *Leader* Lopozisyon, *Leader* Biznes Gouvernman tou Manm

Lasanble e tou dimoun a lekout.

Mr Speaker Konstitisyon, i etabli Lotorite Lapwentman Konstitisyonnèl, oubyen *Constitutional Appointments Authority*, ki nou konn li koman CAA. Dapre Konstitisyon fonksyon CAA, se pou konsider bann aplikan pou serten pos kree anba Konstitisyon e propoz kandida kalifye ek Prezidan Larepublik pou apwentman.

Sa bann pos tel ki Ziz Dapel, Ziz Lakour Siprenm, *Master* Lakour Siprenm, *Attorney Zeneral*, *Oditer Zeneral*, *Ombudsman*, manm Komite Konsey lo Pardon, e Manm Komisyon Elektoral, i osi i annan responsabilite lo retir serten *constitutional appointees* pour move konportman.

Pandan sa dernyen 4-5an, plizyer Lalwa i ganny pase, ki'n elarzi manda e fonksyon CAA. Par egzanp se CAA ki fer rekomandasyon bann manm *Advisory Council* ki anba Lalwa Anti-Koripsyon 2016. Bann Komisyoner *TRNUC*, *Chairman* e *Vis-Chairman Board SBC*, *Appeals Board* anba *Physical Planning Act*. I annan plizyer lezot, tel ki *Chair* e *Vis-Chair NISA*, *Chair*, *Vis-Chair* e bann Komisyoner lo *Seychelles Human Rights Commission* 2018.

Chair ek *Komisyoner Information Commission, Curator*, e mon'n nonm *Physical Planning Act* e son *Appeals Board*. Alors CAA in annan en rol en responsabilite pli larz ki i ti annan oparavan.

Pour note ki Konstitisyon i prevwar anba Lartik 142(5), ki saler, *allowance*, e gratwite pour *Chairperson* e manm CAA i a ganny preskrir par en Lalwa. Sa Lalwa i apel *Constitutional Appointees Emolument Act: (Cap 256)*

Sa Lalwa ozordi i preskrir saler gratwite, pour bann lapwentman konstitisyonnèl. Me dan ka CAA kontrerman avek lezot lapwentman, i pa spesifye okenn gratwite pour en manm CAA.

Depi 2019, CAA in fer en demann ki son bann manm i resevwar en gratwite parey Konstitisyon i permet zot resevwar. An vi ki plizyer lezot lapwentman konstitisyonnèl i resevwar en gratwite, nou santi ki i zis e i ekitab pour CAA li osi resevwar en gratwite.

An fet sa logmantasyon, konsiderab dan volim travay CAA ki mon'n fek fer resorti, pandan sa dernyen 4-5an i zistifye zot demann pou en gratwite. Gouvernman in alors prezant sa Prozedlwa, avek bi pou koriz sa lenzistis. Sa

Prozedlwa i propoze pour modifye, *Constitutional Appointees Emolument Act*.

E preskrir en gratwite pou *Chairman* e sa 4 lezot manm CAA, pour ki a lafen zot term, oubyen ler zot arete koman en manm CAA pandan zot term, zot resevwar en gratwite ekivalan 25poursan zot saler pandan sa term.

Mr Speaker, vwala an gro sa *Bill* ki devan nou. Mon ti a demann tou bann Manm pour donn zot sipor, pour sa Prozedlwa. Mersi bokou Mr Speaker.

MR SPEAKER

Mersi Vis-Prezidan. Nou a pran deba lo sa *Bill*. Mon kapab ganny lanmen bann Manm ki annan lentansyon entervenir.

Bon mon annan 4 pour lemoman. So mon a les zot lib pour lakantite letan. Bann Manm ki a vin apre mon a limit zot pour 10minit.

Well mon envit Onorab John Hoareau.

HON JOHN HOAREAU

Mersi Mr Speaker. Bonn apre midi VP avek AG. Bonn apre midi tou dimoun ki a lekout. Mr Speaker ler nou pe get sa *Bill* ki devan nou, nou vwar ki i en responsabilite ki ti'n devret ganny fer depi byen lontan.

I en *Bill* ki ti'n devret ganny anmennen dan nou Lasanble depi byen lontan, aköz Konstitisyon li menm i prevwar, ki CAA i ganny gratwite. Me pandan tou sa letan parey nou'n vwar, Gouvernman ki'n o pouvwar avan *LDS*, in negligiz son responsabilite. Zis egzakteman parey son bann Manm ki la dan Lopoziyon, zot negligiz zot responsabilite.

Mr Speaker, Mr Speaker CAA i byen ki nou konpran li enn pti pe profon lo en baz konstitisyonnèl ki fason in ganny etabli. CAA i annan 5 manm, e sa 5 manm i fer en travay vreman eksepsyonnel mon kapab dir, pour anmenn en pour tenir la demokrasi dan Sesel.

Zot en independent body, premyerman, e zot in ganny kree par Konstitisyon, pour fer sir ki okenn lapwentman ki zot fer, napa okenn konotasyon politik ladan. I bipartisan e osi i parey prezantater sa *Bill* in fer, in dir i apwent bann manm Zidisyer, bann zofisyè Zidisyer *Ombudsman* e plizyer lezot ankor.

E parey on dir, son rol in ganny agrandi enn pti pe, pou osi apwent plizyer lezot *chairpersons* pou bann *Boards* parey pou *SBC* parey pou

Physical Planning Board, Advisory Council pour ACCS. So in ganny enn pti pe en rol an plis par Gouvernman pour li kapab delivre.

Alor anba Lartik 140, i dir nou dan Konstitisyon ki manner sa *Board* oubyen sa Lotorite i ganny apwente. E 139(1) i dir i donn nesans sa Lotorite li menm.

Me parey mon pe dir lenportans pou en tel *Board*, i pou mentenir la demokrasi. I annan en bann prensip fondamantal, ki sa *Board* i bezwen *abide to*. Akoz i bann prensip *Commonwealth* anba bann sa ki nou apel, sa *body* ki nou apel *Latimer House Principles*, ki en *very reputable body* ki ganny trouve Langleter.

E sa i annan en lasosyasyon, bann dimoun *de loi - Association of Lawyers, Association of Lawyer Education Body* osi. So zot, zot promouvwar en *responsive Government*. En Gouvernman ki baze lo latransparans e baze lo bonn governans. Alor sa bann prensip, i ganny si oule i ganny anmennen par CAA dan sa travay ki zot fer.

Mr Speaker, Lartik 142(4) parey in ganny dir, se sa Lartik ki predir poudir sa *Board* i bezwen - sa Lotorite plito i bezwen, ganny en saler, en

gratwite avek son bann *allowances*. E parey mon'n dir, se i ti devret responsabilite Gouvernman oparavan, pour zot kapab anmenn en Lalwa koumsa.

Nou'n vwar isi dan Lasanble, ki lafason pei ti pe ganny gouvernen oparavan, kot in mank serten responsabilite e sa osi i de-koul enn pti pe lo sa bann Manm ki dan Lopozisyon osi ki nou vwar poudir zot osi par lafason ki annandler zot koze ki zot koze avek larogans, zot krwar poudir zot lafors i vin dan larogans, zot fer li.

E dimoun deor ki sivre zot, sa pti group ki ankor reste, ki byento pou napa, e krwar poudir se sa standar e etik. Alor ler nou pe get CAA li menm, nou vwar poudir CAA, i enn bann lorganizasyon dan pei ki etabli bann standar e etik, pour bann diferan *appointees* ki zot fer, parey *Judiciary* ensidswit.

E zot, zot kapab retir sa bann dimoun si i annan *breach of ethics* oubyen zot pa pe fer zot *travay comme il faut*.

Mr Speaker nou lo sa kote latab, nou toultan kit *the moral high ground*. Nou fer sir ki nou pa desann dan rigol. Akoz nou konnen poudir si nou koz dan en fason vyolans, nou dimoun pou vin vyolan. E sa i pa en keksoz ki nou anvii vwar.

Mr Speaker, nou konnen poudir lot kote zot pou vin avek zot gitar en lakord ankor, pou sey dir be aköz donn sa bann dimoun sa larzan, donn malere. Kan zot konnen poudir vreman, sa i en drwa konstitisyonnèl pour sa group dimoun. I form parti zot kondisyon, parey nenport ki dimoun ki vin travay, i annan son kondisyon travay.

Mr Speaker avek sa, mon napa tro bokou pou dir. Mon krwar VP in fer tre kler, ki rol sa Lotorite. E avek sa Mr Speaker mon pou donn tou mon sipor pour sa *Bill* ki devan nou. Mersi.

MR SPEAKER

Mersi Onorab. Mon bezwen dir mon vwar li en pe regretab, ki Onorab in pran en lapros politik pour lans sa deba.

Mon pe, mon ti a swete ki lezot Manm pa ti a tonm totalman dan sa laliny. Mon apel Onorab Loze pour kontinyen deba.

HON JOHAN LOZE

Ah mersi Mr Speaker. Mr Speaker mon'n note ki Onorab avan mwan in sey anvoy enn de pti koudpwen sat, pov pti bet. In vin koz lo vyolans, kan li menm li sa *weekend* ti pe

partisip dan en aktivite, kot son *mantra* se "pil lo li!"

So nou, nou napa leson lo larogans ek vyolans pour nou pran avek en parti ki son Kredo se pil lo son frer e ser Seselwa Onorab! So gard ou rezerv lo sa bout.

(APPLAUSE)

HON JOHAN LOZE

Mersi Mr Speaker. Mr Speaker, Onorab ki'n koz avan mwan in anmenn largiman konmkwa sa ti'n devret vin depi lontan avan, Gouvernman avan ti'n devret anmennen. Pa ki mon pou dezagree avek li.

Be Onorab, *since* sa ti'n devret vin depi lontan avan, be fer li retrospektif. Fer li retroaktif, donn tou Manm CAA ki'n *serve* avan zot gratwite. Par lozik ou largiman ki ou pe anmenn fer retroaktif e donn tou bann ansyen manm CAA zot gratwite, par lefe ki sa ti'n devret vin depi lontan avan, i en lenzistis, i en mank responsabilite, i en isi laba.

Be pran zot responsabilite, fer keksoz byen e drwat. Met tou keksoz norm e konform. Mon pe zis swiv ou lozik Onorab, ti'n devret vin lontan avan. Ki ou panse lo la? Mersi Mr Speaker.

Mr Speaker *a lot of shade had been thrown*, pa ki neserman tou sa ki'n ganny dir pou kole lo nou. Enn, nou rekonnèt e nou respe travay, zefor, kouraz, ki CAA i mete dan zot fonksyon konstitisyonnèl, ki zot annan pou zot fer. Nou rekonnèt e nou salye zot koman, en *constitutional body* ki aktiv dan mentenir la demokrasi dan nou pei Sesel.

E mon krwar letan nou pran laparol ozordi, nou tou nou bezwen koze pou edik e fer konpran Lepep Seselwa, ki CAA i en fonksyon nou Konstitisyon e ki li i donn aksyon bann swe ki bann *framers of* nou Konstitisyon, ti mete ladan.

I la i annan en rol enportan, i annan li en fonksyon. Ki nou tou, ki form parti sa la demokrasi, ki form parti la gouvènans Sesel, nou bezwen respe e aksepté.

As *such* mwan personnelman koman en lezislater, mon napa lobzeksyon ki en Lalwa i ganny anmennen, pour sa bann dimoun tous zot gratwite fen lannen. Mon napa lobzeksyon a sa kantmenm ti pe ganny dir la avan ki petet, mon pou obzekte, nou pou obzekte non. I pa sa nou largiman.

Mr Speaker, nou annan largiman ki tre kler nou. Nou pe koz gratwite e nou'n fek

ganny dir la poudir gratwite pa spesifye pour en manm CAA. Mon krwar sa ki'n ganny dir. Be gratwite pou travayer Seselwa i spesifye li. Pa ti spesifye avan en, *sorry* mon eklersi mwan. Gratwite sa ki Minis in sey eksplik nou, poudir avan pa ti spesifye anba Lalwa.

Be la Lalwa in vini pour spesifye, be pour travayer Seselwa ti spesifye li. Ti spesifye klerman en trezyenm mwan saler, son gratwite. Lafen lannen i ganny en gratwite koman trezyenm mwan saler koman son gratwite. E sa se largiman ki i ti anmennen par Onorab Wavel Ramkalawan letan i ti *Leader* Lopozisyon.

So mwan mon largiman i tre senp, akoz nou pe kree kontinyelman kree leksepsyon dan sa pei? Nou vini la, nou anmenn gratwite pour lapwentman konstitisyonnèl. Be lo lot kote nou anmenn Lalwa ki aras gratwite travayer Seselwa.

Nou a donn ou 50poursan, 50poursan i a baze lo isi laba, *ceci cela* ou a fer legzanmen si ou pase, ou pase si ou pa pase ou pa pase. Be akoz ou pa donn li son gratwite. Nou pe kontinyelman aras travayer sa ki pour li! E nou kree leksepsyon, nou donn sa ki nou anvi serten benefis.

Be travayer Seselwa pa merit nou konpasyon li? I pa merit ganny son gratwite li? Nou koz lo logmantasyon, *burden* ki'n annan lo bann travayer CAA. Logmantasyon dan zot responsabilite. Nou bezwen rekonnèt e aksepté i vre. Be nou pa koz lo logmantasyon soufrans lo travayer Seselwa.

Pri bis in ganny ogmante lo zot avek largiman pli bet dan liniver konmkwa ki SPTC pa ti pe fer profi. Be SPTC ti ganny kree pou fer profi li? I ti ganny *design* pou fer profi? ouswa i ti ganny *design* pou fer *conveyance* pou anmenn dimoun travay e retour avek zot se zot? I pa ti ganny *design* pou fer profi li.

E zot largiman ki zot vin avek, se ki SPTC pa pe fer profi e zot met en *burden* lo lafanmir Seselwa la lala *enjoy*. Zot antre dan STC zot tir *subsidies* lo tou marsandiz ki ti pe ganny *cross subsidize* par STC, les lenflasyon pet plafon, ler Seselwa pe noye li tousel dan en kou lavi ki i pa pe kapab *manage*, zot antre avek en nespes RRP, zot vire zot ogmant RRP, la zot tir RRP zot met MPR sepa mwan MRP.

Zot pe noye dan en konfizyon, total zot menm e dan tou sa konfizyon ki nou vwar

konfizyon ki nou vwar? Leksepsyon pour sa ki pli byen pase dan sosyete. E en mank konpasyon, pour sa travayer ordiner Seselwa.

E se la mon *focus* kot i ete mwan. Mon *focus* in toultan la mwan. E sa en batay ki mon pe anmennen avek zot depi ler sa Lasanble in antre. Mwan kantmenm zot poudir mwan mon mank responsabilite, mon osi, mon laba, mon responsabilite remain *narrowly focus* la sa pep ki apel Seselwa. E sirtou lo travayer Seselwa. E se laba ki mon konpasyon i ete.

E zot avek tou sa responsabilite, ki zot annan zot napa konpasyon pour sa pep, e zot napa son lentere a ker. E sa i bezwen ganny dir. E se avek bann mo tre senp, e bann largiman tre senp ki mwan mon pe dir zot, mon pa pou vot kont zot Lalwa, akoz mon pa kont CAA i ganny en gratwite.

Be mwan personnelman mon pa pou vot an faver zot Lalwa. Akoz mon krwar fermeman ki travayer Seselwa, i devret ganny sa ki pour li. Sa i enkli son gratwite. I enkli long *service allowance* pour nou bann Ners, nou bann ansennyan. I enkli donn travayer Seselwa, tou sa ki apel pour li ki zot in pran, ki pa pour zot. Rann li, pour li sa!

E la mon swete ki mon pe koz *softly enough*. Mon pa pil lo zot, mon pa pe koz ek vyolans parey zot in akiz nou taler. Akoz mon anvi fer zot konpran, mon le ki zot konpran ki zot *focus* i devret lo Se..sel..wa!

Pa kontinyen kree leksepsyon, pour sa ki pli ekstraordiner, kree leksepsyon pour sa ki pli eksepsyonnel dan nou sosyete. Komans par rann sa ki zot in pran. Komans par donn travayer sa ki li in *earn*. E sa se bann largiman (Doyace Porice, reste ou trankil silvouple!) ki mon pou kontinyelman repete avek zot. Zot bezwen tande!

Mr Speaker Onorab Doyace Porice i dir mwan li i annan ledikasyon li, mon pa konnen ki i pe gronnyen ek son ledikasyon.

MR SPEAKER

Onorab, Onorab adres Speaker silvouple.

HON JOHAN LOZE

Mon'n adres ou Mr Speaker, mon'n adres ou pou lev sa yonyon ki pa pase laba lot kote, mon pa konnen ki i gannyen.

MR SPEAKER

Onorab, *Order!*

HON JOHAN LOZE

Mr Speaker. Mon konnen i fermal pou zot, mon konnen i fermal ler mon koz lo sor e soufrans sa pep avek zot. Mon kapab *broaden* mon largiman plis. Akoz bann largiman ki zot, zot pe anmennen se ki nou bezwen anmenn nide, nou bezwen travay ansanm ek zot, nou bezwen anmenn nide, ki n ou bezwen travay ansanm ek zot, nou bezwen pran responsabilite.

Bann legzanp zot anmennen ler ti annan reform, zot ti travay a kote nou. *Joint Motion* pour anti piratri, *by the way* Mr Speaker, mwan ki'n fer li rapel sa zafer *joint motion* en, ti dan mon dernyen *speech* Bidze.

Ler nou kontan kopi la, nou ale nou al rod sa ki kanmarad anmennen, nou pran nou sivre. Be prezan *since* mwan ki ti fer li rapel poudir ti annan sa *joint motion* la lapiratri. Mon pou fer li rapel tou, imedyatman apre ki ti *met joint motion* pour lapiratri.

Si zot le nou travay ansanm ek zot la, nou pou travay la ozordi. Imedyatman apre ki i ti anmenn *joint motion* antipiratri par madanm Marie Louise Potter, Onorab Marie Louise Potter e Onorab Wavel Ramkalawan. Ti annan en odyo ki ti sorti, ti sirkile kot en Mr

John, ti pe sey kas anba Lotorite pou negosye direkteman avek pirat. E nou tou nou konnen lekel Mr John.

I ti pe negosye pour trwa son sipoter ki ti'n ganny pran par pirat, ganny *released*. Mr John, sa travay ki zot ti travay ansanm ek nou, *jointly*. E imedyatman apre ki Mr John ti al negosye avek Somalyen, ti'n *fall flat on his face*, i ti'n fel. Ki zot ti fer? Zot ti pibliy plan baz *Coast Guard* dan Regar. En akt de traizon. En pei, ki ti an plenn ger avek kont pirat. Zot pibliy plan baz *Coast Guard* sa pov malere *Coast Guard* ki li i ti lo *frontline*.

Prezan ozordi vini vin dir nou, responsabilite anmenn nide, travay avek zot. Be nide nou anmennen Mr Speaker. Bomaten la Onorab Pillay pe fek montre zot defayans dan Lalwa ki zot in anmennen pour zot korize. Pe sey ed zot, mon garanti zot, zot pou vin korize zot. Selman zot pou kanmi ler zot vini.

Be nide pe travay ansanm ek zot, ler nou travay ansanm ek zot ki zot fer. Zot dir nou, nou bezwen zot. *Le chien aboie, caravane* osi mon pa konnen si i ti *pe aboie at the time*.

Sa zot ki pou fer nou konnen, me kantite maltrete nou'n gannyen la anndan nou

sak fwa nou sey travay avek zot. lan edmi, zot pa'n bezwen nou, zot ki ti pe *rule border*. lan edmi nou'n sey dir zot sa bann keksoz ki mon pe dir ozordi.

MR SPEAKER

Onorab sey tourn lo *Bill* silvouple.

HON JOHAN LOZE

Lo *Bill* be mon pe adres sa ki in dir lo *Bill* pli boner.

MR SPEAKER

Wi, wi.

HON JOHAN LOZE

Mank responsabilite. Pa travay, mon pe kontribye la... mon pe kontribye la

MR SPEAKER

Rise above.

HON JOHAN LOZE

Lala mon fason *rise above* Mr Speaker. *I am a very heavy individual, I have to struggle to rise*.

So apre lan edmi zot deside zot bezwen nou. Be kekyon ki mon le met devan Lepep Seselwa ozordi. Sa *desperation* ki mon'n vwar mwan dan sa *interview* ki ti donner la devan sa laport, pour nou vin travay ek zot, atrap lanmen, donn nide.

Mon le met en keksoz devan pep Seselwa mwan, *there's something worse coming! There's something coming down the pipeline* ki zot bezwen nou pou asiz ansanm avek zot, pou agree, pou mars akote zot.

Koumsa nou tou nou a pran blanm *for whatever* zot pe plan fer. Seselwa bezwen konpran zot byen. Parske pa kapab pandan lan edmi, tou sa ki nou'n dir zot, zot anvoy nou marse. Zot rod nou zot ki pe *rule border, le chien aboie, caravane* li mon pa konnen ki i ti pe fer.

La ozordi *suddenly* debout devan laport Lasanble, nou bezwen travay ansanm, atrap lanmen kanmarad - *collective responsibility*.

Be nou pou get zot byen avan. Mwan mon'n dir zot mwan. Mon pa antre dan magouy avek zot *anymore*. Mon get zot byen dan zot lizye, avan mon fer *anything* ansanm avek zot! Mersi Mr Speaker.

(APPLAUSE)

MR SPEAKER

Mersi. Mersi Onorab. Mon a apel prezan Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker, bonn apre midi Vis-Prezidan, *Attorney Zeneral* tou Manm Onorab e tou manm piblik ki pe ekoute.

Mr Speaker nou Konstitisyon i Lalwa siprenm nou pei, e i sa Lalwa ki tou Lalwa i de-koul anba la. E i *set* mezir pou tou bann Lalwa ki vini, an term prensip Mr Speaker.

E ozordi nou pe get en Lalwa ki vin devan Lasanble pour aziste parey in ganny dir, en benefis ki Konstitisyon li menm i *provide*, pour *Constitutional Appointments Authority*. Ki petet wi ti'n devret ganny fer, depi avan aköz Konstitisyon i *provide*.

E Konstitisyon i parey mon dir sa Lalwa siprenm ki nou devret pe swiv. E alor Mr Speaker an term konstitisyonalitye sa Lalwa, an term prensip sa Lalwa, a mon avi i napa nanryen mal, avek sa ki devan nou ozordi.

Mr Speaker ozordi nou pe asize apre mid i nou pe debat lo en Lalwa, pou donn benefis dan sa ka gratwite, pour bann manm CAA. Nou pe fer li aköz i nou devwar pour nou fer li.

Me par kont Mr Speaker, nou bomaten, nou menm nou lo sa kote latab, Malgre ozordi nou pe debat benefis pou en group

dimoun nou lo sa kote latab, avek tou respe nou perdi serten benefis ki Lalwa i *provide* pour nou. E nenport ki travayer ki perdi benefis anba Lalwa Lanplwa i annan en rekour, i bezwen kapab eksplik son lekor, reprezant son lekor.

E demen si Lotorite i vwar ki poudir i pa ti byen. *Then* Lotorite i ava pran son aksyon. Me par kont nou, nou pa ganny drwa eksplik nou lekor. Bomaten nou'n sey demande pour eksplik nou lekor, nou'n ganny refize en leksplikasyon.

So nou pe debat pour en group dimoun, ganny son benefis, me par kont nou, nou pa kapab debat kot nou benefis i konsernen. E mon kit sa la Mr Speaker, pour Lasanble, pour manm piblik tande.

Ozordi Mr Speaker nou pe fer sa deba, avek tou respe pour sa *body* ki ganny etabli anba Konstitisyon, parske nou rekonnèt zot fonksyon anba Konstitisyon. E ozordi nou pe donn li tou sa respe ki i merite.

Mr Speaker, par kont nou Lasanble Nasyonal. Ler mon dir nou mon pa pe koz lo kote latab isi. Mon pe koz lo Lasanble Nasyonal. Souvandfwa nou santi, e mon krwar ki tou Manm i ava dakor avek mwan, ki i annan lezot brans Gouvernman ki mank respe pou sa

lenstitisyon siprenm Lasanble Nasyonal.

Mon a donn ou en legzanp Mr Speaker. Tou resaman dan *rally* politik, Prezidan li menm dan zot prezans...

MR SPEAKER

Sorry, sorry Onorab. Si ou pou ...

HON WALLACE COSGROW

Mr Speaker nou pe koz lo respe ...

MR SPEAKER

Si ou pou koz lo *conduct* Prezidan ou bezwen fer li par en Mosyon. Mersi.

HON WALLACE COSGROW

Mr Speaker mon dakor avek ou.

MR SPEAKER

Mersi.

HON WALLACE COSGROW

Mr Speaker mon a *rephrase* li.

MR SPEAKER

Swiv nou lareg.

HON WALLACE COSGROW

I annan lenstans kot nou Lasanble Nasyonal, i ganny denigre. Malgre nou, nou ganny demande pour annan respe

pour lezot brans Gouvernman dan sa L'Egzekitiv.

Me nou L'Egzekitiv pa respe nou Lasanble Nasyonal. I tret nou tou sord kalite fason. Onorab ki'n koze lo kote latab lot kote Mr Speaker boner, ki'n ouver deba, in koz lo lefe ki Lalwa ti devret vin pli boner.

Mr Speaker i osi responsabilite Lasanble Nasyonal pou pas Lalwa, pou fer Lalwa, pou anmenn Lalwa. E tou dimoun i konnen ki depi 2016, sa Lasanble Nasyonal i kontrole par zot *LDS*. Alor oli zot responsabilite?

Akoz depi 2016, zot pa ti anmenn sa Lalwa, zot pa ti propoz sa Lalwa? I annan Lalwa ki ti ganny propoze devan Lasanble Nasyonal, prezante par Onorab Afif en *Private Members Bill*. I ti kapab anmenn Lalwa devan Lasanble Nasyonal, pour amann keksoz.

I ti kapab anmennen, zot ti kapab anmennen, me zot in deside pour zot pa anmennen. Ozordi zot pran sa pake lenz sal zot anvoy lo nou. Me ti annan posibilite. Lasanble, *LDS* sa letan, i bezwen asim serten responsabilite li osi. E i pa kapab anvoy sa zis lo nou kote. Zot osi zot pa'n fer zot louvraz. Zot in kontrol sa Lasanble pour plis ki 6an.

Mr Speaker mon osi anvi aport mon kontribisyon an sa ki konsern, retrospektivite. Si nou dir ki sa bann dimoun ti merite, e la mon siport mon koleg Onorab Loze. Si nou dir, ki sa ti devret merit, ti devret la depi avan.

Alors annou donn tou sa bann lezot travayer ou manm CAA ki'n deservi zot term anba Konstitisyon ki ti annan sa provizyon, annou fer Lalwa retrospektiv, annou donn sa bann dimoun. Si nou pe koz *fairness*, nou pe koz respe, annou osi *extend* avek sa bann lezot dimoun.

Mr Speaker parey mon'n dir, sa Lalwa i en Lalwa ki annan son merit. Me nou pa kapab inyor lefe ki ozordi nou napa zis serten kategori travayer Sesel. Nou napa zis *constitutional appointees*, nou napa zis manm CAA.

Me osi nou annan lamazorite travayer Seselwa ki swa dan sekter piblik, ki swa dan sekter prive, ki pe travay. E ki'n anmenn sa pei kot i ete ozordi.

Sa kategori travayer Mr Speaker, zot kan zot pou ganny zot bann benefis. Akoz souvandfwa, sa i ganny anvoy-e lo nou Manm Lasanble. E dir nou pas Lalwa pour benefis isi, benefis laba. Me nou pa get

lamazorite travayer. Gratwite lafen lannen, mazorite travayer Seselwa, in ganny dir lekel ki ti refer la koman, lo sa koman gratwite, travayer Seselwa.

Donn travayer Seselwa son gratwite lafen lannen, son Trezyenm Mwan, san kondisyon, san okenn *appraisal*, ki zot in entrodwir dan milye lannen, zis pou sey fer fason pou pa donn travayer son trezyenm mwan saler antye!

Donn li sa ki i merite, nou pa kapab koz benefis zis pour en serten group dimoun. Me nou pa osi get benefis pour lamazorite. Nou pe koz gratwite pour bann travayer, pour bann manm CAA.

I annan en demann deor la, depi ler ki Gouvernman in anons sa zafer pansyon 65an, pour Gouvernman revwar, rekalkile. I annan dimoun ozordi ki dan lensertitid, e ki pe mazine Desanm pe vini ki i pou fer. I pe al ganny 60ekek lannen. I pe mazine si i pou reste, si i pou ale. I pa ankor vwar okenn Lalwa vin devan Lasanble, e i ankor dan lensertitid.

Li osi i bezwen son bann benefis. Li osi i bezwen konnen kote i *stand*. So nou pa kapab anmenn en Lalwa zis pou en bann, e nou inyor en lot group.

Mr Speaker sa i osi anmenn mwan lo sa size, logmantasyon saler. Bomaten dan Lasanble Nasyonal, Minis Finans in dir ek nou atraver en kestyon ki mon'n demann li, pou dir zot pa pe konsider logmantasyon dan saler minimonm. *Now* e mon'n demann li, eski zot pe konsider en lot mekaniz? Akoz sel mekanizm ozordi pou kapab *deal* avek saler dan sekter prive, se atraver saler minimonm. Se en logmantasyon dan saler minimonm.

Me Minis in dir zot pa pe konsidere. So deza la nou annan en gran kategori travayer ki dan lensertitid, ki pa konnen malgre in ganny promet poudir i pou annan en logmantasyon, malgre in ganny promet ki poudir, nou pou revwar saler, nou pou revwar an fas avek pri lavi.

I pa konnen kot i ete akoz Minis in deklare dan Lasanble Nasyonal ki poudir napa okenn konsiderasyon pou logmantasyon saler dan sekter prive. E zot pe get zis en azisteman logmantasyon dan sekter piblik.

Me sa kategori travayer li, son benefis, son gratwite li kan i vini pour li? Nou pa kapab ankor get zis en kote, en

minorite, me non pa fer provizyon pour lamazorite.

Mr Speaker mwan, mannyer mon'n komanse e mon'n set li byen, mon'n dir zot poudir mon pa vwar okenn nanryen mal avek prensip sa Lalwa akoz i sorti dan nou Konstitisyon. E nou bezwen respekte prensip nou Konstitisyon, nou bezwen respekte sa. I en formalite ki zot pe fer, e Mr Speaker mon osi solider avek lamazorite travayer Seselwa, e ki mon krwar zot bezwen ganny en *better deal*.

Gouvernman i bezwen koz lo lamazorite travayer Seselwa. Zot bezwen vin avek bann Lezislasyon pour lamazorite travayer Seselwa. E se pour se la rezon Mr Speaker, ki mwan mon pa pou vot kont, me mon pa pou vot pour Mr Speaker, akoz mon ankor pe esper en bon *deal* pour travayer Seselwa.

Ler zot ava vin avek en bon *deal* apre nou ava gete. Avek sa Mr Speaker mon a dir ou mersi. E mon a rezerv mon komanter si i annan dan *Committee Stage*. Mersi.

MR SPEAKER

Mersi Onorab. Mon ava aprezan apel Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker i mon lapriyer souvan ki nou koman Manm Lasanble Nasyonal nou ti ava pli - e la, mon pe koz koman *Chairperson Standing Orders Committee*. Nou sey fer mannyer pou nou konn byen nou *Standing Orders* e met li an pratik akoz sa i nou Labib, i nou tou en.

E si nou, nou pa fer atansyon, si Lasanble Nasyonal i en kales nou menm nou ki dan sa kales ki pou kas li. *Standing Orders 59(1)* i kler i dir ou: - "*A member shall confine his or her observations to the subject under discussion and may not introduce matters not relevant thereto*".

Size ki devan nou se en lamannman pou asire en lamannman dan *Constitutional Appointees Emolument (Amendment) Bill, 2022*, pou asire ki i vin an konformite avek Konstitisyon. Me alor nou kit nou bann largiman lo sa size e i fer ki swa bokou nou, nou kapab koz lo sa size e nou kapab merit *coach* nou lekor, devlop nou talan, pou nou koz lo en size spesifik dan serten kantite pwen dan en dele letan.

Akoz si non nou pe zis gaspiy ou letan, letan dimoun deor, *panel* i annan bann travay

pou al fer ou pe anmenn nenport ki size.

La zafer size travayer in antre ladan. Konmsi kote i antre? E prezan nou koman Lasanble i annan bann keksoz ki pe otour nou, nou pa sezi pou nou kontinyen eksplik dimoun sityasyon kote nou ete. E ki alor koman en pei konmsi nou kapab bouz de lavan ansanm.

Gouvernman in fini met son lentansyon vizavi travayer Seselwa pou annan revizyon kot bann saler pou ganny konsolide. In dir poudir sa saler pou kontinyen. Alor i annan en keksoz la. E bomaten in bezwen dir *Leader* Lopoziyon pa en fwa, pa 2 fwa me fwa ki sa zafer **Long Service Award*, i pou dan - *Long Service Scheme* en i pou dan sa revizyon.

E lo kestyon prive - sektor prive Mr Speaker mon pou bezwen zis adres sa akoz i vin en konfizyon. Nou koman Manm Lasanble nou bezwen konnen poudir i annan diferan keksoz ki Gouvernman in fer depi 2020 ki'n donn lespas sektor prive en *breathing space* – biznes, koman modern ekonomik pou li kapab fer byen.

E nou ki nou ekspekte komans en Gouvernman responsab, se ki sektor prive. Prezan sa pti gin ki i gannyen i *pass on the benefit* pou son

travayer ki apre tou pe fer li gannyen. Letan Gouvernman i redwir son poursantaz taks, son *business tax* i en biznes prive i peye. Ler Gouvernman i tir *CSR* lo li. Ler Gouvernman i al negosye avek *African Development Bank* pou li ganny en \$20milyon, pou kapab amelyor lanvironnman biznes ki zot kapab *borrow* avek bann to favorab.

Letan Gouvernman i dir ki sa sipor saler R500 *across the Board* prive e sektor piblik pou kontinyen, eski konmsi nou pa war poudir bann pti keksoz ki nou frer, ser Seselwa tousala pe benefisye avek? Ler i reviz *weight ASP* ki pa'n arive dan 10an;- letan in travay pou fer to lesanz desann destabilize, eski sektor arive i pa benefisye ki alor travayer i kapab gannyen Onorab Cosgrow, mon anvi demann li atraver ou Mr Speaker?

Konmsi sa i bann keksoz ki ou vwar letan mwan koman en Manm Elekte dan distrik Mont Buxton mon fer letour mon distrik dan Sanmdi, mon asize avek dimoun – malgre - wi i annan en pe fristrasyon, en pe iritasyon en pe koz for.

Me ler ou asize dousman ou koz ek en dimoun e ou ed li konpran e reflesir, i vwar ki pe arive e i dir ou mersi. E mon ti

ava swete letan nou pe dir Lopozisyon travay ek nou, depi 2004 wi, mon ti en Manm Katriyenm Lasanble - mon pa konnen kot Onorab Loze ti ete Mr speaker - wi mon ti vote mwan lo sa Mosyon - *joint motion* pou kapab tir nou bann frer Somali.

Ou vwar, so alor letan mon koz lo *joint motion* mon pe koze akoz lo mon leksperyans mon ti lev mon lanmen anler. Sa ki mon anvi dir sa Onorab, regard byen ou bann lenformasyon ki ou al rode avan zis ou vin dir nenport kwa dan Lasanble.

Me pou retourn lo sa size ki devan nou Mr Speaker lamannman ki devan nou, i pe fer ki sa Lalwa i a vin anliny avek Konstitisyon. Sa detour ki mon bezwen fer lo komansman parske Manm Lopozisyon e pour piblik ki pe ekout nou, sezi zot byen, zot annan en sel largiman ki zot pe servi tou loportinite pou sey kre diskord ki pa neser.

E nou, nou pe dir zot non, nou'n vin la dan Lasanble nou bezwen travay lo bann size ki devan nou e zot pe fer per menm dimoun poudir *something is coming* e alor nou bezwen zot. Nou, toultan nou'n travay avek lot kote, menm ler nou ti dan Lopozisyon nou ti an

mazorite. La nou annan 2 tyer mazorite zot realize nou annan 2 tyer.

Nou pa anvi les sa pouvwar vin dan nou latet e pou nou vin arogan. Nou pe *still extend our hands to you!* E alor nou pe dir zot vin en Lopozisyon responsab parey nou, nou ti fer ler 15 lo 10 ti annan.

Nou pa ti *lock* pei nou. Nou pa ti blok pei. Nou pa ti sabotaz servis piblik.

(APPLAUSE)

HON GERVAIS HENRIE

Nou pa ti provok dezord;- nou pa ti met dimoun kot Lorloz pou anbaras limaz nou pei avek touris, nou ti travay koman en Lopozisyon responsab e nou pe demann zot silvouple pou fer parey.

(APPLAUSE)

HON GERVAIS HENRIE

Alor lamannman ki devan nou Mr Speaker i pe met sa Lalwa anliny avek Konstitisyon pei, e dan Lartik 142(4) i kler, i dir saler, pansyon ek Gratwite ki devret ganny peye avek e Manm loportinite lapwentman konstitisyonnell ava ganny preskrir par, ouswa anba en Lalwa e saler pansyon ek

Gratwite sa Manm ava ganny tire dan Fon Konsolide.

Alor akoz Konstitisyon in fer provizyon pou sa bann keksoz swivan; saler, pansyon ek gratwite. Alor sa Lalwa prezan i pe koriz en lenzistis, en mankman ki'n annan. Prezan nou koman en Lasanble serye pou nou reste lo size ki devan nou parey *Order 59(1)* i demann nou, kekwfa nou merit dir be in ler pou nou regard tou bann lezot provizyon konstitisyonnell e fer sir poudir i byen;- bann Lalwa ki swiv i byen.

Ofet yer mon pe get Konstitisyon e letan mon pe koz bann kekyon saler, gratwite, pansyon dan sa versyon ki avek mwan, zis pou ek *Leader of Government Business* ki pansyon i mansyonnen dan Konstitisyon. Akoz sa i ti en lamannman ki ti vin bokou pli tar, akoz sa i ti napa *Leader of Government Business* ler Konstitisyon ki ti ekrir an '93.

So, be pou *Leader* Lopoziyon napa pansyon dan sa versyon ki mwan mon annan.

So these i bann keksoz ki prezan nou koman en Lasanble serye si nou pe koz lo *subject matter* ki devan nou, pou nou dir lo kekyon Manm Lasanble Nasyonal. *Case in al* Ankour, Lalwa in bezwen: - Konmsi

this is nou loportinite prezan pou nou dir nou Konstitisyon: - (Onorab Pillay aret mon pe dir ou depi bomaten atraver ou Mr Speaker Onorab Pillay pe pran en latid i pe *bully* tou bann dimoun la anndan) Mwan mon pe dir ek li zanmen i pou kapab *bully* mwan Gervais Henrie! Non, ou pa pou fer bann zes ek mwan konmsi mon perdi latet non, non, non Onorab Pillay.

Mon'n travay pou mwan ganny sa sit la kot mwan ete! Mon'n debout mon pa'n ganny eleksyon en fwa me 2 fwa ...

(APPLAUSE)

HON GERVAIS HENRIE

... akoz dimoun in vwar poudir abilite ki mon annan pou travay lo zot par. Alor mon *sorry* ou, ou pa pou *bully* mwan dan sa Lasanble Nasyonal!

MR SPEAKER

Annou adres Speaker *please*.

HON GERVAIS HENRIE

Mr Speaker alor sa Lalwa se sa ki i pe fer. Nou'n vwar poudir CAA depi son konsepsyon son bann responsabilite in elarzi. E alor pou nou kapab ganny *the best* dimoun pou deservi dan sa bann rol, nou bezwen asire poudir bann benefis ki zot merit gannyen i annakor parey

Konstitisyon orizinalman i fer promosyon pou sa.

E nou pe kontinyen travay pour ki, pou tou sekter e pou tou travayer Seselwa, sa i leka. E pou nou pei ozordi nou rekonnèt poudir i annan en problemm prodiktivite. E sa trezyenm mwan ki mannyer pe ganny *design* e mwan mon siporte ki apartir lannen prosen wi, i retourn lo poursan apre dimoun i bezwen debourye.

Ou konnen akoz? Mwan letan mon ti *SBC* la mon ti lo Kontra mwan. E pou mwan ganny peye mon Kontra lafen mon Kontra tou le 2an i ti depan lo mo prodiktivite e tou mon bann koleg ki'n travay avek mwan zot kapab sertifye, mon ti debourye menm, debourye e toultan *I was amongst* bann ki son poursantaz ti pli o.

Akoz non selman mon ti prodwi program, me mon ti *design* program e don mon bann lezot koleg pou fer, akoz mon ti fer mon louvraz avek leker. I en louvraz ki depi mon lanfans mon ti'n kontan pou mon fer so prodiktivite *was part of my working culture*.

E alor mon'n anvi ankouraz mon bann lezot travayer Seselwa, pou fer parey. E se sa alor ki nou pe dir, *SAA* nou anvi zot travay byen,

drwat, endepandan, prodiktiv pour ki zot ganny tou zot bann benefis ki zot bezwen. E sa ki enportan pou pep Seselwa realize, poudir lapwentman sa bann Manm ki annan 5 zot, 2 i ganny apwente par Prezidan, 2 par *Leader* Lopoziyon. E sa 4 zot, zot tonm dakor pou elekte zot, pou idantifye en *Chairperson*.

E depi konsepsyon *CAA*, pou premye fwa sa enn *CAA* ki sa 4 dimoun in tonm dakor lo zot *Chairman*, san ki Prezidan in bezwen apwente. Si zot pa dakor Prezidan i nomin en dimoun an konsiltasyon avek Sef Ziz e Speaker Lasanble Nasyonal ki Elekte *Chairman*. E alor pou premye fwa sa 4 dimoun zot in nabou dakor pou Mr Felix vin zot *Chairperson*.

Donk mwan mon napa difikilte avek sa lamannman ki nou pe fer Mr Speaker. I malere ankor ki nou'n bezwen al dan bann lezot sityasyon ki napa naryen pou fer avek sa Lalwa nou pe - nou'n gaspiy en pti pe letan.

E mon swete ki lot entervenans ki vini apre mon i reste *on the subject matter*. E ki alor nou kapab fini avek sa *item* lo azanda ozordi e alor mon ava remerci ou Mr Speaker e Lasanble e piblik pou zot latansyon. Mersi.

(APPLAUSE)

MR SPEAKER

Mersi Onorab. Mon ava apel Onorab Naidu.

HON SATHYA NAIDU

Bonn apre midi Mr Speaker. Bonn apre midi VP ek AG ek tou koleg Onorab. Lamannman ki devan nou CAA Lartik 139 avek 140 ki donn CAA son nesans, parey in ganny fer resorti, i enportan par ler pou repet lesansyel pou fer pep Seselwa konpran ki konpozisyon CAA i annan 2 manm ki sorti baze lo Lopozisyon baze lo *Leader* Lopozisyon avek 2 Manm lo kote Prezidan.

E ant sa 4 Manm zot pou selekte enn ki pou deservi sa rol koman *Chairperson*, CAA son lobligasyon se pou apwent bann lapwentman konstitisyonnell bann Ziz, ou annan Lofis *Ombudsman*, *Attorney Zeneral*. *Auditor Zeneral* e tou resaman nou'n vwar baze lo bann Lalwa nou menm nou ki nou'n pase parey ACCS, par legzanp kot nou'n *extend zot scope*.

E tou resaman osi zot in vin avek bann prosedir ki tre kler an 2020 vizavi *rules* lo fason ki zot fer zot in *interview* e bokou plis ankor, pou asire ki dan bann pozisyon ou ganny

bann endividi ki annan sa konpetans.

An menm tan, sa CAA la fason ki i pe travay mon vreman fyer vizavi bann lapwentman ki pe ganny fer, pou asire ki tou bann lorganizasyon ki sa bann endividi pe ganny apwente, i ganny fer lo en baz ki bipartisan ki travay dan en fason ki endepandan.

Mon totalman dakor avek mon koleg Onorab Henrie kot in dir ki ou bezwen reste lo sa Prozedlwa ki devan nou e pa al lo bann keksoz ki irelevan. Me mon krwar e kekfwaw entervenans ki pou swiv apre mwan i kapab don en lendikasyon si sa i vre wi ou non, me selman nou annan en Lopozisyon i sitan teti Mr Speaker.

Zot toultan annan en lobligasyon, ouswa en bi pou konfiz nou pep;- met en bann lenformasyon ki fo, fann bann rimer ler zot a pe deservi sa dwa ki nou annan ki apel *droit des expressions*. Wi byensir ou pa pou ganny pourswiv. Me selman sa i minite. Lafason ki i ganny servi dan sa Lasanble, i fer mwan poz serten kestyon Mr Speaker.

Ou konnen ozordi mon bezwen dir ou konnen ti annan en Manm ki ti pe koz lo *breathalyse test* sepa ki zafer, *I say God forbid you have an*

accident, akoz anybody can get into an accident. Annou pa distort larealite dan baz politik bon marse, foutou!

(APPLAUSE)

HON SATHYA NAIDU

Koman en zenn ki'n antre dan sa Lasanble ou konnen ki mon ti dir, mon dir mon ti a voudre ki vre nou a koste – nou a koste pour tou zanfan Seselwa, akoz se sa ki ses li bezwen. Me i paret ki lo lot kote an deor Lasanble zot dir tou sord kalite keksoz ki manner ou ete, isi laba.

Mwan mon pa reponn ni enn zot apard dir bonzour akoz kourtwazi i annan dan mwan sa. Me selman pa krwar mon pou asiz lo menm tan ansanm avek zot, akoz mwan personnelman mon pou bezwen fer resorti sa pwen, akoz dan politik i annan lipokrizi.

E mwan mon pa pou pare pou annan okenn mwayen an term an deor travay ler i ariv koz nivo Komite Lasanble, ouswa si ou al en *overseas mission* - wi pou annan kourtwazi. Me selman pou bann dimoun ki pe sey met sa Gouvernman an retar par bann fo propagann, zanmen eski mwan Onorab Naidu mon pou *ok* avek zot.

Silvouple pou sa pei, pou sa pep sanz zot latitud. Vizavi Gratwite en term savedir 7an dan 7an zot pou ganny 25poursan zot saler anyel. Pa toulezour ki zot pe al gannyen sa, *ok*? E CAA dan en serten sans in ganny preskrir par Konstitisyon, in annan en *oversight*.

Ti annan en Onorab ki ti pe dir dan Sizyenm ki zot ti fer? Be pep Seselwa in war kwa ki'n arive dan Sizyenm Lasanble e se pourtan pou sa rezon ki nou annan 25 Manm isi dan sa Lasanble. Zot in war sa travay ki nou'n fer e se pourtan pou sa rezon ki nou annan, Wavel John Charles Ramkalawan *State House!*

E pou sa enn ki pe koz lo konpasyon, me kote eski ou konpasyon ti ete ler ou ti pran '*larzan forgo*'?

(APPLAUSE)

HON SATHYA NAIDU

Sa '*larzan forgo*' i pou reste kole lo ou, ziska ler ou pou kapab rann sa larzan si ou vreman kapab rann, *ok*?

(Interruption)

HON SATHYA NAIDU

E kwa lasos tomat? Wi, byensir, byensir. Me selman lo sa

lamannman nou pe senpleman koriz en lenzistis. Nou pe senpleman fer sir ki tou keksoz i azour avek Lalwa Siprenm nou pei. Mersi Mr Speaker.

MR SPEAKER

Mersi Onorab. Onorab Roucou.

HON MICHEL ROUCOU

Mersi Mr Speaker. Bonn apre midi Minis. Tou dimoun ki pe ekout nou. Mr Speaker mon osi tou mon pa pou rat sa sans pou mwan dir 2 pti mo, lo CAA, ki i vreman enportan pou nou akoz zot ki apwent nou bann dimoun konstitisyonnèl ki parey Ziz limenm li.

Mr Speaker ler ou pe get nou Gouvernman ozordi ki nou'n pran en lapros pou nou pa kit personn deryer, en Gouvernman ki pe travay pou sa pep, en Gouvernman ki'n vini pou nou adres bann ou kapab dir bann lespas ki'n ganny kite.

Mr Speaker sa amannman li menm li i en parmi bann ki nou pou war i vin kot Lasanble akoz nou war poudir dan lepase Gouvernman ki ti la avan zot pa'n war li enportan pou zot adres bann tel size. E nou Gouvernman li menm li nou war li perdi i enportan pou nou fer sir ki nou met tou keksoz an pla, tou keksoz drwat e fer sir

poudir tou keksoz i drwat avek Lalwa Mr Speaker.

E en lorganizasyon parey CAA ou kapab dir se ki i vreman enportan, akoz ler bann Manm CAA zot pou fini zot term ou kapab dir, zot osi zot *deserve* pou zot ganny zot gratwite e pou nou, nou menm nou nou'n war li poudir sa i nesese Mr Speaker. Akoz si nou pa fer li la, nou osi nou pou war poudir nou pa'n desarz sa responsabilite parey nou predesese avan, ki zot, zot ti'n zis pran sa fou dan en kwen.

Mr Speaker sa lamannman ki mon'n ganny en Onorab parey Vis-Prezidan in dir nou in la depi, i ti'n devret ganny anmennen depi 2019 ki aprezan nou war nou la nou sa Gouvernman ki la nou war nou aprezan nou bezwen vin dres tousala. CAA i pa li tousel ki i ti'n war li ganny kot deryer, ki ozordi nou Gouvernman nou war ki i nesese kot nou bezwen pou nou kapab ede, pou nou kapab met li drwat.

Bann parey tel si ou pou gete byento nou pou war kot pou annan en *Bills* ki pou vini an term *carer* li menm li, kot bokou bann ki mon'n koz avek, ki ler mon pase zot dir ek nou poudir zot osi ler zot in fer bokou plis letan dan sa travay, ler zot fini zot zis ale napa

naryen zis en pti mersi. Mon konn bokou dimoun lo la be nou, nou pa anvi ki sa i ganny arive avek CAA.

E mon ler mon'n ekout Onorab Cosgrow, ler i ti pe koze Mr Speaker mon demann mon lekor keston be li i ti en ansyen Minis be ki zot in fer? Ki zot in fer ki ozordi aprezan ki zot, zot, pe vin dir nou ki mannyer pou fer. Nou *at least* nou Gouvernman pe fer li, mon pe pran desizyon. En Gouvernman ki pran desizyon Mr Speaker ki responsab osi tou.

E nou, nou pe fer sir ki nou met tou keksoz drwat. I enportan ki pep Seselwa i ganny en konpran poudir se ki, ler zot tann lot kote latap pe sey vin edik nou mannyer pou fer isi, pou get Seselwa. Be mwan mon pe gete poudir se zot pa ti responsab, zot pa ti get sa pep zot. E ozordi zot anvi vin dir nou mannyer nou, nou pou get sa pep.

Mr Speaker nou koman en Gouvernman responsab, nou pe fer sir poudir dousman, dousman nou pe sey dres tou keksoz, pou fer sir ki demen ler nou pe pran bann desizyon - en Gouvernman ki pran desizyon ki demen i pa pou anmenn okenn lenpak negativ lo nou pep.

Sanmenm sa ki ou war poudir se ki ler en desizyon i ganny pran par nou Gouvernman ki en Gouvernman responsab, se ki nou fer li *smart* Mr Speaker. Akoz nou anvi ki demen nou pei i bouz pli an avan.

Mr Speaker lepep deor i bezwen ganny an konpran poudir, se ki nou pa zis leve demen bomaten nou vini nou pran en desizyon. Nou asize, nou analize, nou gete e nou gete ki *the way forward*. I pa vadir ki ozordi parey in ganny dir ki nou, nou pa pe get sa pep, nou pe bliy zot, nou pe pa pe donn logmantasyon.

Mr Speaker nou pe fer li *the smart way*. Nou pe fer li en fason Mr Speaker, ki si demen ler nou donn en logmantasyon nou konnen poudir sa lenpak ki pou vini, se ki i pa pou afekte sa pep Mr Speaker. E zis parey la Mr Speaker, dan lepase CAA in ganny gete dan en pti kwen.

Pourtan zot, zot ki rekomann bann dimoun, bann zonn *de loi* ou kapab dir, zot ki rekomande Mr Speaker, ki sa bann dimoun zot ler zot in fini zot ki rekomande zot ganny zot bann benefis. Be CAA li non li, zis i la.

Be selman en pwen Vis-Prezidan ki mwan osi mon pou tous lo la, ki mon'n tann enn de

bann Onorab sirtou lot kote tonm lo la, se ki bann ansyen manm ki dan lepase zot ti'n ganny oubliye par Gouvernman avan, ki pa ti enportan pou zot ganny en gratwite ki aprezan ou tann zot pe kriy pli for, konmsi si zot osi kote zot pou antre ladan Mr Speaker.

Mr Speaker mwan mon pou donn mon sipor sa *Bill*, sa lamannman Mr Speaker. Akoz i vremen enportan ki nou, nou vini nou redres tousala, nou fer dir poudir tou keksoz i drwat ek konformite Mr Speaker, pou fer sir poudir tou demen person pa ganny kit deryer. Mon dir mersi.

MR SPEAKER

Mersi Onorab. Bon la i reste mwan Onorab Aglae ki'n demann laparol e apre mon a pran bann *Leaders*. Mon oule konnen si i annan okenn Manm ki oule laparol pou mwan termin lalis. Bon Onorab Aglae.

HON EGBERT AGLAE

Mersi Mr Speaker. Mon pa pou lo sa Prozedlwa. Mr Speaker kreasyon CAA ki sa lannen i a fer omwen 29an depi legzistans, in en kreasyon ki in anmenn en servis dan fason fer, dan en fason pli demokratik pou pei anba nou ladministrasyon.

E mon salye e rekonnèt tou zefor ki bann manm bann

ansyen CAA pe fer ziska la ozordi, pour ki zot travay koz zot i fer pou kapab apwent dan bann pli o lenstans bann pozisyon parey Ziz, Sef Ziz, *Attorney Zeneral*, *Ombudsman* e Komisyon Eleksyon li menm li, son Komisyoner. E tou bann lezot lapwentman ki tonm anliny avek zot manda ki zot fer dan en fason enparsyal.

Me Mr Speaker, nou'n ariv lo en pwen ozordi ki mon krwar i enportan pou nou reflesir, tou keksoz i ariv a son moan letan. I fasil pou ou montre ledwa pou dir ou ki responsab, ou ki pa ti responsab. Me ozordi si nou pou komans koz lo lekel ki responsab, mon krwar zot osi zot annan en lalis responsabilite ki zot in manke, ki nou ti kapab met devan ozordi tel parey zot ki responsab pou fer pri bis monte dan sa pei.

Zot ki responsab pou pa donn *long service allowance*, zot Gouvernman ki responsab pou aboli *URS* e zot Gouvernman ki responsab pou ferm preski tou laport sipor sosyal ki egziste dan sa pei.

(APPLAUSE)

HON EGBERT AGLAE

So si nou pou kontinyen Mr Speaker i annan ankor nou pou dir lekel ki responsab, mon krwar nou bezwen osi get devan nou laport avan nou akiz kot nou prosen.

Mr Speaker, mon'n ekout enn de entervenans lo kote parti mazoriter i fer mon krwar poudir zot pa ti ekout zot Prezidan ler ti koze dan *rally Roche Caiman*. Se zot ki'n vin fer politik lasos tomat la anndan!

(APPLAUSE)

MR SPEAKER

Onorab Aglae, eski ou'n tann mwan dir ...

(Off-Mic)

MR SPEAKER

... silvouple! Eski ou'n tann mon dir si ou pou lev *conduct* Prezidan ou bezwen fer li lo en Mosyon -ok? Silvouple evite. Kontinyen avek ou diskour.

HON EGBERT AGLAE

Mr Speaker mon pa'n lev *conduct* Prezidan Larepublik, mon'n zis sit en komanter ki i ti fer ki'n pas lo medya nasyonal. Mersi.

So Mr Speaker si mon poudir CAA i *deserve* sa i zot pe demande ozordi, mwan mon poudir ou wi zot *deserve*. Akoz zot annan enn travay ki zot pe fer e i annan en travay ki zot bezwen kontinyen fer. E sa 5 manm ozordi ki lo CAA ki dabor 2 in ganny apwente par Prezidan Larepublik, 2 par *Leader* Lopozisyon e parmi zot, zot in tonm an akor pou apwent en *Chairman*.

Me pour mwan Mr Speaker la realite i la se ki petet nou bezwen vwar serten keksoz akoz la fason fer akoz ozordi sa *Leader* Lopozisyon ki ti apwent CAA ozordi se li ki Prezidan, e ou annan en *Leader* Lopozisyon ki la ozordi ki li i pa'n apwent okenn manm CAA malgre manda CAA i fer 7an.

Eski napa en pti anbigite dan Lalwa petet kot si demen ledwa i ganny montre lo sa 2 manm ki'n ganny apwente par *Leader* Lopozisyon, nou pa pou kapab montre ledwa lo nou *Leader* Lopozisyon ki la, la anndan. So mwan mon pe met en keksoz devan pou fer son larealite.

Lot pwen Mr Speaker petet ki nou a tonm dakor lo la, se letan nou pe koz - ou konnen tou Seselwa letan pe koz larzan, tou dimoun i ganny atrakte par larzan koz si i travay i ti a

kontan ganny sa pli meyer dil. Kot i konsern son saler, e osi bann lezot reminerasyon ki atase ek servis ozordi. E byento Bidze pe vini la le 4 semenn prosen, pou annan bann lanons ki poi ganny met dan Bidze.

E nou lo sa kote latab nou, nou swete ki ler CAA pe rod pou li pe ganny pou li nou, nou a debout lo en lot kote - lo kote malere, lo kote bann ki vilnerab, pou osi lager pou sa lot kapab ganny sa ki zot ti pe demande e sa ki zot *deserve*. Parske zot in travay - sirtou sa trezyenm mwan saler ki nou, nou konvenki ki i merit ganny donnen son 100poursan.

(APPLAUSE)

MR SPEAKER

E mwan Mr Speaker mon pa dakor ek sa zafer kot nou sanz poto gol dan milye en *match*. Les *match* fini si ou anvi sanz ou poto gol apre pou sa sanze. Sa i enkli akoz travayer in travay en lannen.

E letan nou'n ariv sa moman pou zot kapab ganny zot trezyenm mwan *full*, zis apre 4mwan avan sa desizyon i kapab espere pou zot gannyen, nou vini nou sanz konteks, nou sanz poto gol. E se sa problemn ki ozordi nou war poudir

dimoun i fristre. So sa i bann keksoz ki bezwen aranze.

E osi Mr Speaker mon senserman krwar bann desizyon dan lepase ki'n ganny pran pou kapab soulaz bann dimoun, sirtou kot i konsern sa *long service allowance* i en keksoz ki *very deserving* ki mon krwar Gouvernman LDS i devret mazin lo la e enplimant li.

Nou ti diskite lo la e mon pa mazin okenn moman ki ti annan - sa bann moman zot ti dan Lopoziyon - kot zot ti kont sa. Be akoz nou pa kapab met li son lenplimantasyon e son kontinite? Parske i annan bann travay Mr Speaker ki dimoun i travay en kantite i pou *long years* ki zot ladan, zot *deserve* akoz nou ankor bezwen zot.

Sa i *teachers* Mr Speaker, i Lapolis li menm li, i bann *nurse*, bann dokter e bann ki dan bann servis esansyel ki *require* en *long endurance* e zot sibir. So pou mwan Mr Speaker mon pe rod en pe *fairness* dan sa bann desizyon kot annou pa get zis en bor, annou get lezot bor osi donn zot, zot valer sonn zot, zot reminerasyon kot zot merite. e mwan mon pa kont.

Si ozordi nou vini ouswa dan Bidze ki pe vini zot a vini zot ava met sa bann reminerasyon sa bann

allowance ki bezwen ganny donnen ki pa ti donnen, mwan Mr Speaker mon pare pou siporte.

Me tan ki nou pe zis get serten aranz Lalwa zis pou benefisye serten, mon pa tro, tro an faver sa kalite pratik. Annou get tou dimoun *across the board*, akoz nou tou nou pe soufer dan en menm lekonomi, si pou donnen annou donn tou parey. Mersi.

(APPLAUSE)

MR SPEAKER

Mersi Onorab. Bon avek zot konprenezon mon ti a prefere zis nou kontinyen, akoz nou a kapab pe ariv lo lafen nou deba. Mon a pran bann *Leaders* e apre nou a fer *summing-up*. Onorab Pillay.

HON SEBASTIEN PILLAY

Mersi Mr Speaker. Bonn apre midi. E bonn apre mdi *VP* avek *Attorney Zeneral* e bonn apre midi tou koleg Onorab e tou dimoun ki a lekout pe swiv nou Lasanble.

Mr Speaker ou a permet mwan o komansman mon lentervansyon pou met serten keksoz o kler, zis pou mwan pa ofans person, e mon pa fer plere person akoz i paret mon pe ganny dekrir koman en

bully. E mon'n war atraver ou Mr Speaker Onorab Gervais Henrie in tre emosyonnel mon pa ti a kontan ki sa i en keksoz ki reste lo son leker.

Ou konnen Mr Speaker, definisyon en dimoun ki en *bully*, se ler nou ganny en pozisyon e nou ganny demande pou eksprim nou lekor vizavi sa pozisyon, nou al lo *camera* e nou evoke pour ki saler nou gran koleg i ganny koupe. Me par kont, par kont Mr Speaker e la mon pou al dan *verbatim* Lasanble ler Mr Patrick Herminie ti prezant son lekor koman en kandida pou vin en Minis, Onorab Jean-François Ferrari ti annan sa pou fer li.

“Akoz lefe ki ou'n tanzantan koup saler bann Manm Lasanble, e ki ou'n form parti, ou'n en Manm en parti politik kot ou'n menm debout lo *stage* pou koze, mon pa krwar ou pou kapab anmenn en Minister dan en fason enparsyal.”

Ok sa ti largiman ki zot ti servi ek Vis-Prezidan li menm li sa letan i ti pe sakouy latet i ti dakor avek. E nou, nou'n ganny dir poudir pa bezwen al an deor Mosyon, pa bezwen swivi lezot largiman, pa koz lo sa bann keksoz. Be i enportan Mr Speaker pou sitye avek Lepep Seselwa akoz ki nou bezwen fer

sa ki nou fer, zisteman dan sa Lasanble nou fer fas avek en difikilte, enorm zis pou nou kapab viv sa ki Konstitisyon i dir e sa se laliberte lekspresyon dan Lasanble Nasyonal.

Atraver ou Mr Speaker mon annan ankor en *verbatim* la kot Onorab Henrie i atraver ou in admet li menm li i pa ti pou donn Mr Faure son bann Minis ki i bezwen pou li fer son Gouvernman fonksyonnen.

I pa pou donn Mr Faure son Minis ki pou fer son Gouvernman fonksyonnen, me ozordi sa menm Onorab pou vin donn nou en leson, oubyen en ledikasyon lo ki mannyer nou, nou devret vini e travay ansanm avek *LDS* e aret, (mannyer i dir sa) "aret senm konfizyon!"

Mr Speaker ler zot ti antre zot ti dir nou poudir nou'n mor. Ti dir nou poudir pou napa okenn distrik ankor ki nou pou gannnen. La ozordi nou'n vin bann '*bully!*' Nou senm zis 'konfizyon!' Nou fer 'isi', nou fer 'laba!' Sa ki vedir se ki Lopozisyon i relevan dan sa pei. E Lopozisyon pe tous zot kot i fermal!

(APPLAUSE)

HON SEBASTIEN PILLAY

Lopozisyon pe tous zot kot i fermal e sa ki kler Mr Speaker

se ki mwan mon annan en keksoz ki mon ti a kontan dir, vizavi privez ki Lasanble i annan.

Ou konnen mon'n asize la lo sa kote latab kot zot ete pandan Sizyenm Lasanble e Onorab Lemiel e Onorab Aglae e Onorab Andre, Vidot e Onorab Loze i a rapel tre byen, konbyen fwa Onorab Ramkalawan koman *Leader* Lopozisyon in annan en *conduct* Prezidan Faure dan sa Lasanble? Par egzamp ler ti en senp *screen saver* kot *DICT*, sa *screen saver* ti vin lakoz pou ki apre menm Bidze *DICT* ti ganny koupe pa ti pase, siporte par Vis-Prezidan, ki ozordi i oule donn mwan leson lo moralite.

Mr Speaker mon krwar ki nou bezwen aret fer lipokrizi dan sa Lasanble. E ler Onorab Henrie i dir mwan taler Mr Speaker ki'n mon pe *bully* li. Non! Ler i pe al dan sa largiman pansyon mon pe dir li *think brother, think*.

Akoz ou largiman ou menm ou fek dir nou *according to Order 59(c)* mon *Chairman Standing Order*, me selman ou menm ou pran deba ou anmenn dan en lot rigol, e ekspekte larestan dimoun pa pou vini pou vin tir sa labou ki dan sa rigol ou'n sey anvoy lo zot.

Look, mwan si zot pa'n kapab ranpli zot plen, pa pran lakoler ek mwan!

(APPLAUSE)

HON SEBASTIEN PILLAY

Pa pran lakoler ek mwan akoz pa mwan ki'n dir poudir zot *motorcade* ti 30poursan, sa se enn zot gran sipoter ki'n dir. Pa mwan ki'n dir poudir laplenn pa ti plen, pa nerv avek mwan!

(Interruption)

MR SPEAKER

Silvouple! Bann Manm silvouple aret enteronp! I annan en pe lavwa ki mon pe tann tro for, silvouple aret enteronp deba!

HON SEBASTIEN PILLAY

Mersi Mr Speaker. Mr Speaker ou a note ki petet apre sa detrwa 4 semenn ki'n pase, mon'n adopte en lapros ki travay ki mwan mon ti annan pou fer se ki fer mon parti reste relevan. Fer komanter ki mon parti i annan pou fer vizavi alegar Lepep Seselwa in ganny fer.

Dimoun pe komans ekout nou, dimoun pe komans realiz laverite. E finalman dimoun pe komans konpran en keksoz, akoz si ou war en parti politik i

bezwen pas li 3 zour pou eksplike ki mannyer en Gouvernman ek son *Cabinet Minis* pe fonksyonnen, san mansyonnen ki mannyer son bann *MNA* pe fonksyonnen, savedir ladministrasyon e Egzekitiv ozordi i annan en gro problemn!

Me sa i pa mon problemn i zot problemn e zot ki pou bezwen rezourd. *Ok?* Me selman pa fer zot problemn vin problemn Lepep Seselwa! Pa fer zot problemn vin problemn Lepep Seselwa akoz i pa lozik Mr Speaker, si nou pa ganny sans pou fer en pwen vizavi konportman Gouvernman parey ti ganny fer dan Sizyenm Lasanble, parey ti ganny fer dan Katriyenm Lasanble, parey Lopoziyon in toultan fer, *then* pa vo lapenn nou la koman en Lopoziyon!

Zot pa kapab ekspekte ki nou, nou en Lopoziyon ki pou vin asize avek zot vwar dite, bwar kafe, manz gato e tonm dakor lo tou keksoz ki pou dir. I annan keksoz ki nou pou tonm dakor lo la, me i annan keksoz ki nou pou diferansye lo la.

E se sa ou annan Lopoziyon dan en pei e se sa rol ki nou, nou pou zwe, akoz nou osi nou'n ganny mete la par Lepep Seselwa, pou zwe sa rol.

(APPLAUSE)

HON SEBASTIEN PILLAY

E sa ki enteresan Mr Speaker, ankor se ki mwan mon pe ganny leson avek bann dimoun ki lontan ki ti anmenn baryer parti ki mon reprezante e tir fizi lo tron koko, fer bann lezot aktivite. E zot pa realize zot menm zot, zot in donn lanmen *perpetrate* sa menm keksoz ki zot in dir ozordi, pa'n ganny fer dan lepase! Zot annan ou arete pran nou labou anvoy lo nou kanmarad. Dezyenmman Mr Speaker, sa i mon premye pwen.

Dezyenmman Mr Speaker i enportan osi pou nou realiz en keksoz. Si nou, nou largiman i baze lo sa fe, enkontournab, nou napa problemm avek onor en lobligasyon konstitisyonnèl pou donn 25poursan gratwite parey i mete anba sa Lalwa.

Nou pa'n eksprim problemm ek sa nou. Pa nou ki pou komans fer problemm ek sa, se Onorab John Hoareau atraver ou Mr Speaker, ki'n pran sa deba kareman, plonz li dan en seo labou e ekspekte ki tou dimoun apre pou sorti prop ladan!

Si nou ti anvi ki sa deba i komans byen nou ti a komans li byen. Savedir i pa nesaser pou nou vin fer bann komanter, ki

pa nesaser ganny fer aköz se sa ki pou- Aköz i pa mwan ki'n dir Mr Speaker, se ou menm - ou ki'n dir poudir ou dezapwente la fason ki deba in komanse!

MR SPEAKER

Mon dezapwente la fason ki in kontinyen osi.

(APPLAUSE)

HON SEBASTIEN PILLAY

Be napa problemm, napa problemm.

(APPLAUSE)

HON SEBASTIEN PILLAY

Ou bezwen dezapwente la fason ki i kontinyen aköz pou premye fwa mon'n war ou koman Speaker pe eksprim ou lekor lo *stage LDS*. E mon demann mon lekor si ou pou tret mwan avek enparsyalite dan Lasanble?

Mon napa problemm ek sa mwan. Mon napa problemm ou eksprim ou lekor, me sa ki mon pe dir ou se ki ou pa pou zanmen anpes mwan eksprim mon lekor.

Prezan si oule mon vin lo pwen konstitisyonnèl an relasyon ek sa, e ou, ou dir mon ou en gran defander Konstitisyon, *ok?* Konstitisyon i prevwar ki mon laliberte lekspresyon i *subject to* serten

derogasyon ki *Standing Order* i met anba mwan, se ki mon annan drwa proteste kan mon devret proteste.

Mon annan drwa osi pou eksprim, mon lekor si mon pa dakor avek en keksoz, me eski ler mon pou eksprim mon lekor, mon pou ekspekte ki en marto pou ganny tape lo mwan, zis akoz mon pa tonm dakor avek Gouvernman sa ki i fer? Be sa i pa leka.

E prezan apre zot *rally* ou a dir i annan en dikton ki'n ganny dir vin pini sa bann Manm *United Seychelles*, akoz ou pe tro donn nou problem. Be i vre nou pe tro donn zot problem akoz zot pe koz lo konfizyon. E konfizyon, ki manner konfizyon in arive, konfizyon in ariv koumsa Mr Speaker.

Mwan mon ti la mwan, ler zot ti ranpli Roche Caiman dernyen fwa, be sa fwasi zot pa'n kapab fer parey.

(laughter)

HON SEBASTIEN PILLAY

Kestyon ki zot bezwen demann zot lekor. Kestyon ki zot bezwen demann zot lekor ... pa ankoler – pa ankoler -

(Interruption)

MR SPEAKER

Order!

HON SEBASTIEN PILLAY

Kestyon ki zot bezwen demann zot lekor, se akoz? Prezan apre vini, vin maltret mwan vin dir mwan nenport kwa? Mon napa problem mwan, mon krwar sa ki sa msye selman ti dir kot sa sez i konsernen i vre, mon ledo i larz anvoye i *ok*, napa problem!

Me petet ozordi dan sa sez ki li i asize son ledo nepli larz e son lapo in vin en pti pe pli fen, ki prezan i pa kapab pran en serten kritik, bann menm kritik ki li i ti avanse. Sa i swa nou tou.

Prezan Mr Speaker annou regard Konstitisyon an sa ki konsern CAA. *Look* larealite ki Onorab Aglae in prezante i en realite reel e i en anbigite ki ganny kree atraver Konstitisyon. I vre ki se *Leader* Lopozisyon ki apwent 2 Manm lo CAA. Me i pou premye fwa dan nou listwar ki nou annan *Leader* Lopozisyon ki'n vin Prezidan.

In fer ki sa 2 manm ki sa *Leader* Lopozisyon avan ti apwente pou reprezant, pou reprezant Lopozisyon, i nepli 2 manm ki ti ganny apwente par, i pa de manm ki'n ganny apwente par Lopozisyon ozordi.

Me par kont e la kot largiman, la kot largiman opoze pou vini, se ki dimoun a dir nou poudir be pa ou Prezidan ki ti apwent sa de lezot manm? Alors pa se zot ki sipoze reprezant lenter ou sa?

Be CAA pa travay lo en baz partizan, CAA dapre son sa i sipoze travay lo en baz non partizan. Me selman sa ki nou konnen Mr Speaker ki Lopozisyon ler ti an mazorite dan Lasanble, ti met en presyon enorm lo Gouvernman US sa letan, kot sak lapwentman ti ganny *vetted*, par Lopozisyon dan Lasanble e si zot pa ti kontan *boycott, boycott, boycott!*

Mr Speaker mwan mon annan rikord e *challenge* mwan pou prouve, mon ava anmenn son met devan zot. Ler Prezidan Faure ti anvi fer en *statement* vizavi COVID, ti annan koze pou li vin dan Lasanble, zot konnen lekel ki ti refize? Se Lopozisyon sa letan ki ti refize enkli Onorab Henrie atraver ou Mr Speaker, enkli Vis-Prezidan, pa ki mon pe met son *conduct* an kekyon.

Zot, zot ti refize pou Danny vin dan - pou Prezidan Faure vin dan Lasanble, selman zot egzize ki nou, nou vin dan Lasanble pou vin selebre zot 24mwan dan lofis! Sa se sa ki apel lipokrizi Onorab Naidu,

atraver ou Mr Speaker aköz se ou ki'n anmenn.

E prezan sa ki enteresan Mr Speaker, ozordi Lasanble in ouver son lebra avek tou manm, menm manm ki'n annan serten problem dan zot lavi. Ozordi manm in pas atraver diferan difikilte psikolojik an, mantalman *ok*, e rol Lasanble Nasyonal Mr Speaker ...

(Interruption)

MR SPEAKER

Order!

HON SEBASTIEN PILLAY

... rol Lasanble Nasyonal Mr Speaker se pou epol, epol okenn endividi. E se pour sa rezon ki sa bann gratwite in ganny mete atraver bann Lalwa. Aköz bann fonksyon piblik koumsa, i anmenn avek zot en presyon enorm. Me dan sa presyon ki nou pe koz lo la, i annan osi en eleman enportan ki'n ganny *raise* par nou kote latab.

E apre ki in dir nou atraver ou Mr Speaker ki tou keksoz ki nou'n dir i pa byen Onorab Roucou ki'n taye la, in pare pou dir la i tonm dakor avek nou ki, ki pou arive ek bann manm bann *formal members of CAA*? Eski zot osi zot pou ganny konsidere? Lalwa i fer kler ki non. Lalwa i dir ki

Lalwa pou pran lefe ler i vin an loperasyon.

Me eski par egzant Mrs Jane Carpin ki'n en ansyen koleg Onorab Georges e ansyen koleg Onorab Henrie e ansyen koleg Onorab Arissol, eski li petet i pa *deserve* en gratwite? Mr Speaker mon pa konnen akoz Onorab Henrie i ankoler ek mwan.

(Interruption)

MR SPEAKER

Silvouple! Silvouple!

HON SEBASTIEN PILLAY

Ler mon vin ankore lo Konstitisyon, mon prezimen ki rezon akoz sa lenpas i dan konstitisyon pou *secure sa tenure of 7an* pou en manm CAA, se lefe pou donn CAA en peryod pa zis klimatizasyon, me osi en peryod pou zistans li avek sa ki pe arive dan lavi kouran toulezour. E se sa son term i preskrir pou 7an.

Me Mr Speaker mon bezwen dir poudir parfwa mon osi konsernen, avek la fason ki serten lezot provizyon lo Konstitisyon i *relate* avek CAA, e serten aksyon ki nou pe pran en la fason ki nou pe konport nou ozordi. E la mon pou vin en pti pe Mr Speaker lo Lofis

Speaker. Pa lo ou me lo Lofis Speaker.

E sa i en largiman akoz mon pe avanse pou en pe letan akoz i dir ou dan Konstitisyon ki ler en manm CAA pa'n ganny apwente, Speaker i annan en rol pou zwenn dan lapwentman manm CAA. E sa i vedit ki Konstitisyon pe prevwar ki Speaker Lasanble Nasyonal i annan en rol enparsyal pou li zwe.

Akoz byensir sa ki pou annan sa *Leader* Lopoziyon e i pou annan Speaker ki pou sorti dan swa sa parti swa en lot parti. Me eski si Speaker i aktivman en dirizan son parti oubyen en Manm Egzekitiv son parti, oubyen en manm ki ankore ek son parti, eski sa i asir enparsyalite son lofis vizavi sa bann apwentman enportan ki i bezwen fer?

Mon bezwen note osi Mr Speaker e dir mersi pou bann *current* manm CAA akoz zeneralman mwan Mr Speaker, mon pa atak kredibilite sa bann dimoun ki annan zot louvraz pou zot fer.

E mon krwar poudir zot bann dimoun ki'n dan zot profesyon ki zot in fer, i annan ki ansyen Minis, i annan ki bann ansyen Direkter Lakonpanyen. I annan ki bann ansyen, mon krwar i

annan ki bann ansyen Clerk Lasanble Nasyonal, zot bann dimoun ki parey Konstitisyon in prevwar zot annan en *high office* ki zot in okipe.

Me petet Mr Speaker, pli ki nou bouz devan nou bezwen osi konsidere ki mannyer nou defini sa *high office*. Ki nivo ki nou pe koz lo la ler nou pe koz lo en *high office*. Mr Speaker, mon konvenki Mr Speaker ki demokrasi Sesel son lenportans ki i atase avek lekspresyon lib, i reste keksoz primordyal pou nou konsiderasyon isi dan sa pei. E ki tou dimoun i kapab eksprim son lekor libreman.

Me sa ki pe arive dan nou pei pli ale, se ki nou dir dimoun eksprim zot lekor me si zot dir sa ki nou pa kontan tande, nou oule atak sa bann dimoun;- nou oule met sa bann dimoun anba presyon. E mon ti a kontan ki bann manm CAA, (mon konnen zot pe ekout nou deba ozordi) zot pran sa an konsiderasyon. Akoz mon krwar zot bann dimoun avek lentelizans ki konpran en kantite keksoz e k zot annan en rol enportan pou zot zwe.

E ki mwan mon krwar senserman ki i fer sans, pou nou annan sa provizyon, prenon kont presyon ki sa bann lofis i anmennen lo sa endividi ki i pe fonksyonn anba la.

Me an konklizyon Mr Speaker, mon bezwen osi dir ki i relevan pou fer Gouvernman konpran ki, ler ou pe dir nou annan sa prezans lespri pou donn CAA son gratwite, nou oule osi ki ou annan sa konpasyon pou onor langazman vizavi par egzantp gratwite travayer, pou lafen lannen ki trezyenm mwan saler.

E sa term gratwite i pa nou ki'n envante me se Prezidan li menm ki ti koz lo la. Ki ti defann en kantite, me ki ozordi mon vwar en depar *from* sa prensip. E si zot koz ek la mazorite dimoun ozordi, la mazorite dimoun pou dir ek ou koumsa poudir si sa lobligasyon i la, annou onor li parey i ete. *Which is* larzan i la pou donn tou travayer sekter piblik en trezyenm mwan ou pou donn zot trezyenm mwan.

An terminan Mr Speaker, mon annan sa pou dir. Pandan sa komansman apre midi, mon'n ekout plizyer entervenans ki'n koz lo sa Lalwa, e nou tou nou'n ganny dir pa sorti lo Lalwa, pa al isi pa al laba, be mon krwar mon'n fer kler le pwen akoz parfwa nou bezwen sorti.

Mwan mon napa problemm avek okenn dimoun ki ou'n eksprim son lekor, e pareyman okenn dimoun pa

devret annan problemm avek en lot dimoun ki pe eksprim son lekor. E i enportan ki nou, nou konpran sa. Nou, nou ganny et otaz pou la mazorite keksoz ki nou fer isi. Nou ganny dil avek, nou *ok* ek sa. koup nou saler, nou'n *ok* ek sa; fer sa, nou *ok* avek.

Me selman pa nou kantmenm zot ti pe sante pil lo li, pa nou ki'n les tonbe se zot ki'n les tonbe dimoun! se zot ki bezwen mazin sa. Mersi Mr Speaker.

(APPLAUSE)

MR SPEAKER

Mersi Onorab. Kote isi Onorab Arissol ou ti'n lev lanmen, ou ki pou terminen? Yes in leve, in leve. Ale.

HON SANDY ARISSOL

Mr Speaker, bonn apre midi. Onorab Pillay fek *remind* nou poudir letan en dimoun i annan son lopinyon, annou aksepte son lopinyon. Mon'n lev mon lanmen, parske mwan osi mon nan mon lopinyon pou mon kapab partaz avek Onorab Pillay avek son bann Manm.

Mr Speaker mon kontan leksitasyon ki'n annan, parske sel sok ki i annan ozordi se *US* ki'n ganny sok wikenn!

(APPLAUSE)

HON SANDY ARISSOL

E zot ankor dan sok, zot ankor dan sok parske zot ti krwar poudir nou'n dir dimoun in fase ek nou, dimoun pa kontan nou, nou'n fer tousala dimoun pa pou desann.

Prezan zot ankor dan sok zot Mr Speaker, prezan zot eksite zot vir *LDS* lot fason. Dezyenm sok ki zot in gannyen koman *US*, zot pa'n ekspekte poudir ou pou koup zot saler, zot in *walk out* zot pa'n vini Zedi zot ti krwar tou keksoz pou pas *ok*. E ler ou'n dir zot prezan zot pe eksite e zot saler in ganny koupe, parske zot pa'n delivre pou travay Mr Speaker.

Alor prezan sa ki enteresan letan zot pe koz lo laplenn, zot pe dir ek ou, zot in adres ou tou *as* Speaker dan ou triko anler lo *stage* Mr Speaker, kan zot bliye poudir zot Speaker li i ti anler lo *stage* an menm tan i ti pe fer Ricky Blaster, i ti pe anmas tou keksoz lo *stage* pou li poste lo *internet*, lo *Facebook*.

Tousala nou konnen zot bliye? Zot bliy vitman. Selman sa ki enteresan Mr Speaker mon anvi *challenge* zot bann *US*. Eleksyon i pas 3 zour dan nou pei nou, nou'n fer 3 zour selebrasyon, Vandredi, Sanmdi e Dimans!

(APPLAUSE)**HON SANDY ARISSOL**

Alor si zot lafors i parey zot koze, olye fer en pti *rally* sal le 6 Anse Boileau, fer enn gro parey nou'n fer, fer enn Vandredi. Fer enn Sanmdi en *motorcade* e Dimans fer enn. La zot pe sanz landrwa. Granmersi nou'n montre zot kote laplenn Anse Boileau i ete Mr Speaker zot, zot ti abitye fer Regina Mundi oubyen *Freedom Square*.

Nou, ki ti tay Anse Boileau, nou ki ti al *North East Point*, nou ki ti al Anse Aux Pins. La ozordi zot in war lo map i annan en laplenn ki apel Anse Boileau. Selman zot ki for! *Comme* dir Prezidan in dir e bomaten mon'n tann zot pe dir ou a krwar boutey lasos tomat in komans ouver, i pe fann, fann partou, lasos tomat pe fann lo zonnyon tou.

Mr Speaker mwan mon proze Lalwa ki'n vin devan nou, e parey in ganny dir dan Lasanble Nasyonal letan Onorab Pillay pe koz lo gratwite, i enportan pou dimoun ki pe ekoute konpran. Napa en Seselwa laba deor ki travay ki pa ganny gratwite. Tou Seselwa i ganny son Gratwite letan i fini travay. Parske avan ti 15an, in

vin tou le 5an prezan. Konmsi i pa en zafer ki Lopozisyon ki pe envante, pe fer nou krwar, pe dir avek *VP* ou konnen letan nou pe donn gratwite laba, annou pa bliy bann travayer laba deor, akoz zot pa pe gannyen.

Travayer i gannyen son gratwite li. E nou nou'n asire si ou ki'n donner i byen me selman pa donn lenpresyon poudir depi ler nou'n pran pouvwar an 2020 nou'n aras gratwite, non! Tou travayer i ganny son gratwite e zot ankor pe ganny en saler. E la nou pe asire poudir i pau annan en trezyenm mwan saler ki zot, zot pa ti vote, zot tou taye!

Tousala zot in fer, selman zot ki tap lanmen lo latab, zot ki vin donn nou leson, zot ki vin donn nou lektir, zot ki pe vin dir. E ler ou pe donn nou toultan, nou osi nou pou donn ou ankor, e nou pou donn ou tou kou ziska ou pou *walk out* ankor dan Lasanble Nasyonal e ou pou ale.

Mr Speaker sa proze Lalwa ki pe ganny anmennen ozordi par Vis-Prezidan, pe koriz en lenzistis ki'n arive anba Gouvernman *US*. Setou ki i pe fer - koriz en lenzistis ki'n arive. E nou koman en Gouvernman responsab - en Gouvernman ki rod solisyon. En Gouvernman

ki serye - En Gouvernman ki pran aksyon, pa parey zot ki zis koze apre zot taye, non! Se pour sa rezon ki Vis-Prezidan in vini ozordi, pou nou koriz en lenzistis Mr Speaker.

Sa lenzistis i trouve dan nou Konstitisyon 142(4) i ladan, poudir CAA i sipoze ganny zot gratwite. Li dan Konstitisyon sa i pa en zafer ki nou, nou fek evante me i la. Selman sa ki enteresan, zot, zot ti konnen poudir i dan Konstitisyon. Zot in kit sa koman en lenzistis, prezan se zot ki vini ki dir be ou konnen be ou a dir mwan be bann Manm ki ti pas lo sa CAA avan, zot pou ganny zot?

Be aköz ler zot ti la zot pa ti asire ki bann Manm sa letan lo CAA pa ti gannyen? Be zot pa ti responsab mon bann zanmi! Zot pa serye, zis zot kontan koze. E prezan ler zot koze zot dir Mr Speaker bann dimoun laba deor pe ekout nou, ou konnen bann dimoun pe krwar dan nou, pou zot soz e zis zot ki dimoun i ekout zot, nou dimoun pa ekout nou ditou nou!

So alor VP mon krwar sa ki ou pe fer se senpleman sa ki nou Gouvernman pe fer, se anmenn en lenzistis ki'n ganny soutire par parti US pandan tou sa bann letan. E nou pe koriz en lenzistis ki zot in fer par US pandan tou sa bann lannen -

setou! Alor letan nou pe koriz lenzistis en pe partou kote par egzanp a nou'n amelyor sityasyon trezyenm mwan saler nou pe donner, travayer pe al ganny en logmantasyon.

Minis Finans in dir ek nou bomaten, zot pou kontan sa logmantasyon ki bann travayer pe al gannyen. Nou pe koriz sa lenzistis ankor ki la;- bann trwazyenm az i ganny serten benefis, bann fanmir in ganny serten benefis an relasyon avek kou elektrisite.

Bann paran in ganny en benefis pou zot zanzan kot bann leköl, pandan sa pti gin letan - sa pti gin letan ki nou'n la. Nou pe koriz ban lenzistis. Nou pe asire ki nou dimoun i ganny soulaze, zot, zot zis koze nou pa war okenn aksyon.

MR SPEAKER

Onorab adres Speaker *please*.

HON SANDY ARISSOL

Mr Speaker mon pa'n nonm non personn mwan.

MR SPEAKER

Adres Speaker.

HON SANDY ARISSOL

Mr Speaker, zot, zot zis koze;- bann US lot kote Mr Speaker, bann US zot zis koze - i napa aksyon. Me nou lo sa kote Mr

Speaker nou koze e nou fer aksyon. Parske nou Gouvernman i responsab i delivre e i onnet dan son lapros. I enportan pou dimoun deor ki pe ekout nou tou la anndan balanse.

E Dimans dimoun in montre nou, parske zot sa kantite ki zot ti dir ek nou arr la pe fer trwazyenm-az pey R1000 selman avan anba zot ladministrasyon, ou konnen konbyen trwazyenm-az ti peye dan *Old People's Home*? R900, Gouvernman i vini i met R100 i fer R1000. Arr pa devret akoz zot fer sa ek trwazyenm-az?

Selman anba ladministrasyon avan trwazyenm-az ti pe peye. Apre zot vini zot sant en lot kalite zistwar e zot donn lenpresyon zot ki pe travay, zot ti lo sa sez sa kote Mr Speaker la zot in ariv lo lot kote. Zot ti dir nou sa, dan *verbatim* ti ekrir sa Onorab Henrie ti *bully*.

E Mr Speaker *US* in bliye ou mon en mannyer zot ti apel nou en lepok? Lisyen dan semen, ti annan en maladi ki ti ganny deklare *Brazil* ti apel 'Zika.' Zot ti apel nou 'Zika'. Tousala zot ti dir nou zot. La ozordi zot sitan sansib, sansib letan ou tous zot, zot sot anler!

Sanmenm sa ki apel politik. Me parey Prezidan in dir

dan son ladres poudir si zot pa anvi desarz sa rol koman Lopoziyon, sed la plas pou bann dimoun ki ava anvi serye vini e pran sa plas pou vin Lopoziyon. E en Lopoziyon ki ava responsab Mr speaker.

Parske ler nou ti dan Lopoziyon, tou keksoz, parey Onorab Pillay i dir ti an konsiltasyon avek *Leader* Lopoziyon. Parske nou, nou ti anvi war pei bouze, nou pa ti anvi zis *boycott, boycott, boycott!* Me pei ti bouze parske nou ti fer bann rekomandasyon, nou ti fer bann propozisyon nou ti asize lo en latab letan ti'n ler pou nou diskite. Letan ti'n ler pou nou anmenn bann Mosyon bipartizan pou soutenir nou pei an sekirite, nou ti fer parske nou ti en Lopoziyon ki ti serye. E se sa ki nou anvi dan nou pei nou, nou anvi en Lopoziyon ki serye.

Me mwan Mr Speaker mon anvi dir avek *VP* lamannman ki ou pe propoze ozordi, i en senp pti lamannman nesaser. E mon krwar i ava enportan pou nou koriz bann lenzistis. Mon mazine a lavenir ava annan ankor atraver bann *Bill* ki ava vini, pou nou kapab koman en Gouvernman dil avek e asire ki tou keksoz i ava al lo menm paz.

Be mwan mon ti a kontan fini avek sa not Mr Speaker, nou ti annan tou rezon pou nou selebre sa wikenn!

(APPLAUSE)

HON SANDY ARISSOL

E mon anvi dir nou selebrasyon pa ankor fini Mr Speaker, sa i en komannman. Selman la ki nou a fer, nou a poz en pti kou. Nou a kit bann pti laplenn vid pou nou gete lekel ki a kapab ranpli zot osi. Nou, nou annan tou rezon pou nou selebre.

E parey mon'n dir mon ti a kontan profite remersye tou bann Seselwa, tou bann Seselwa ki'n desann, bann osi ki pa'n kapab desann ki'n esper nou o bor semen pou nou selebre nou laviktwar sa 2an depi 2020 ki nou ti la Mr Speaker.

Avek sa detrwa mo mon ti a kontan dir ankor nou annan tou rezon pou nou selebre. Mersi bokou.

(APPLAUSE)

MR SPEAKER

Mersi Onorab. Vis-Prezidan mon ava envit ou pou - Onorab Pillay?

HON SEBASTIEN PILLAY

Non Mr Speaker mon pa pe al *challenge* okenn keksoz ki Onorab in dir, akoz parey mwan mon'n dir-

MR SPEAKER

Be non ou bezwen, en *point of order* kwa?

HON SEBASTIEN PILLAY

Mon krwar petet ou'n konsernen ki mon pe al fer referans non? Zis ki mon ti a kontan ou klarifye pou nou, akoz lo mikro e an piblik ou ti'n dir taler poudir i annan Onorab Aglae e le 2 *Leaders* ki reste pou koze.

Ou'n *obviously* donn mwan laparol avan Onorab Georges. Me apre nou'n vwar Onorab Arissol ki'n par kont in koze in lev son lanmen. Zis pou nou benefis, eski lo nou kote latab osi nou kapab fer menm pratik? Akoz i en presedans ou'n kree, *basically* en *ruling* ki ou'n fer la. Parey nou pa kapab *challenge* ou bann *ruling*.

Si sa i leka mon ti ava tre kontan e apresye. Akoz *then* i ava donn nou en loportinite osi pou nou, si nou'n absante pandan letan ki en deba pe *go on* e pou rezon kelkonk, ler nou vini pou nou kapab osi ganny en sans pou nou partisip dan sa deba.

Si ou pe dir mwan sa i *ok*. Akoz lo rikord, koriz mwan si mon mal Onorab Aglae mon pe sey gete Mr Speaker, ou'n dir nou ti dir nou poudir Onorab Aglae *and then* le 2 *Leaders*. So mon napa problem Onorab in koze mon apresye in koze. Sa i en komanter avek ou, e si ou pe dir nou sa nou a servi sa prensip prezan osi *next time*.

MR SPEAKER

Non, nou'n annan 2 *Leaders* ki'n koze, ou ou'n koze prezan Onorab Arissol in koze, i annord. Onorab Georges silvouple annou pa prolonz sa deba.

HON BERNARD GEORGES

Non, non, Mr Speaker mon krwar ki mon anvi siport sa ki ou'n dir. Ou pa ti dir ki i annan Onorab Pillay ek Onorab Georges ki pou koze, ou'n dir i annan sa 2 *Leaders*.

E parey zot tou zot konnen mwan mon pa ti annan okenn lentansyon koz lo sa Mosyon, parey mon pa pou vot lo sa Mosyon pou bann rezon ki zot konnen. Me, me, dan labsans mon *Chief Whip*, mon ti ava bezwen dir serten keksoz.

Me ler in antre, ou'n konpran Mr Speaker e ou'n donn li laparol. Akoz mwan mon ti'n fer ou konpran ki

mwan mon pa ti pou entervenir lo sa Mosyon pou bann rezon ki zot konnen. Mersi.

MR SPEAKER

Mersi. Vis-Prezidan mon ava envit ou prezan konklir deba lo *Bill* silvouple.

THE VICE-PRESIDENT

AHMED AFIF

Mersi bokou Mr Speaker. Bonn apre midi ankor tou bann Manm. Mon'n asize mon ekout tou bann deliberasyon. Par ler in en pe gou lafason in ale. Par ler mon'n en pe konfize akoz i annan serten Manm ki pa'n lo topik, ditou depi komansman ziska finisyon.

E mon oule zis *remind* bann Manm lo bann gran liny sa Prozedlwa ki devan nou. Sa ki mon'n remarke se ki tou dimoun i realize poudir ti neser pou koriz en lenzistis. Me konfizyon ki mon'n war se, ler ou pe koriz en lenzistis zot in anmenn en lot eleman ki saler zeneralman. E trezyenm mwan in ganny nonmen koman en keksoz ki pa balanse avek sa lamannman ki la.

Mon pa trouv sa largiman i tenir pou la senp rezon ki trezyenm mwan i garanti. Sel keksoz dan trezyenm mwan ki ou bezwen fer pou ou ganny antye ou trezyenm mwan, se

travay dir. E sa Gouvernman akoz nou en Gouvernman responsab, en Gouvernman serye, se sa ki nou met devan pep Seselwa.

Nou dir ek zot Bidze i fer provizyon pou antye trezyenm mwan, antye. Me nou pe demann pep Seselwa akoz nou en Gouvernman serye e responsab, travay e ou pou gannnen. Sa lide, sa propozisyon pou koriz en lenzistis. Dan mon entervansyon lo komansman mon ti dir ki i ti komanse an 2019.

Lide ti ganny propoze an 2019 - 3an pase, kan tou bann Manm ki deza ozordi bann manm CAA, sete zot ki ti anmenn sa propozisyon. Be bann Manm Onorab a rapel byen ki lafen 2019, nou ti antre dan en peryod COVID e 2020 ti en peryod difisil. Mon pa krwar okenn Manm Onorab menm ki sa letan zot ti napa pouvwar, zot ti pou vin demann ek Minis Finans parske i ti pou enplik en kou lo Bidze. Zot ti pou bezwen ganny laprouvasyon Minis Finans menm si zot ti anvi anmenn en *Private Members Bill*.

Napa person ki ti war li lozik dan e peryod difisil kot dimoun ti napa louvraz, dyob ti pe ganny koupe, sibvansyon ti

pe ganny donnen par Gouvernman pou demann Gouvernman, pou alor anmenn en lamannman pou donn en group dimoun en gratwite. Se pour sa rezon ki sa letan i pa ti ganny anmenn par mon mazine tou bann Manm ki ti dan Sizyenm Lasanble.

Me sa Gouvernman ki en Gouvernman responsab, e ler nou vwar sityasyon ekonomik pe amelyore akoz nou'n pran desizyon. E ankor enn fwa en Gouvernman ki pran desizyon, in ouver sa pei in fer dimoun retourn travay. E kan mon tann serten Manm pe dir be dimoun en kantite dimoun pa'n benefisyé.

Be ki mannyer zot kapab dir dimoun pa'n benefisyé, kan dimoun ki ti pe asiz se li pe ganny en pti morso son saler, atraver desizyon ki sa Gouvernman in pran, zot in nobou al travay e i annan ki pe ganny *service charge*, zot saler in double. I annan bann ki pe ganny en kantite larzan ozordi pei ranpli ek touris. I annan dimoun ki pe sey vin vizit nou, ki ganny difikilte ganny en lasanm. Ankor enn fwa Seselwa pe benefisyé.

Ler sa Gouvernman in fer tou sa ki kapab atraver tou sa bann aksyon e kou Dolar ti sorti R22 i vin R15, eski pa anmenn

en ta benefis pou tou Seselwa, ler ou pe redwir kou lavi? i vin parey en logmantasyon saler sa. E tou dimoun pe benefisyé depi dan sekter prive depi dan sekter piblik.

Ler Lopozisyon sa letan, ti pe dir avek Gouvernman pa fer sa bann keksoz ki nou, nou'n fer, zot ti al en pe pli lwen zot ti dir ek Gouvernman pa bezwen fer bann proze kapital. Ki zot, dayer zot ti'n fini arete. Zot ti dir napa larzan, sa avan nou ti vin o pouwar sa, zot ti'n fini arete.

E ler nou, nou vin o pouwar nou, nou'n pran desizyon aköz nou serye e nou responsab. Nou'n pran desizyon re ouver sa pei. Larzan in komans re antre e nou, nou ti pran desizyon pou rekomans fer lakaz, nou ti pran desizyon pou rekomans fer lopital La Digue, nou ti pran desizyon pou fer lasose La Digue.

Nou ti pran desizyon pou refer lasose Baie Sainte Anne Praslin. Nou ti pran en desizyon pou ouver *sewage system* La Digue. Nou ti pran en desizyon, Seselwa pe benefisyé pa zis en kote, tou dimoun pe benefisyé. Prezidan ti anonse resaman e Bidze pe vin devan zot e zot, zot in tandé, kan nou ti dir aköz letan ti difisil, bokou dimoun ki par anba R9mil ti pe ganny

R500. Sa pe kontinyen e i pou mont plis ankor.

Minis in donn lendikasyon e dan Bidze zot ava tandé. Alor sa zafer ki zis en bann ki pou gannyen, en bann pa pou gannyen, mon pa konnen kot i sorti sa largiman. Mon oule dir avek tou bann Manm ki sa *Bill* ki devan zot i senp, i pe zis koriz en lenzistis en group dimoun ki travay dir.

Taler mon ti nonmen ki kantite plis louvraz ki zot pe fer. Ozordi CAA apard lefe ki i bezwen *vet* tou sa bann dimoun, se li ki ozordi i pe *advertise* tou sa bann *vacancies*, dan sa bann lorganizasyon ki mon krwar in plis ki triple kantite lorganizasyon, ki li ki pe swazir dimoun pou propoz ek Prezidan. Li ki pe fer *interview* ek tou sa bann kandida, avan i anvoy en rapor detaye kot Prezidan. Pa ti abitye ariv koumsa.

Ozordi sa CAA ki la, e mon tir mon sapo avek zot, parske zot en CAA ki travay dir aköz nou annan en problem pou dir ki zot merite? E aköz nou pe *mislead* Lepep Seselwa pou fer krwar ki Lepep Seselwa li i pa'n benefisyé? Nou pe fer tou sa ki nou kapab pou fer Lepep Seselwa benefisyé.

E zot in koz lo bann aktivite politik. Mwan mon konvenki ki si nou kontinyen fer bann keksoz ki byen, nou kontinyen pran nou responsabilite, nou kontinyen edik dimoun ki ou bezwen par ler fer en sakrifis. Akoz ler ou fer en sakrifis, demen ou pou rekolte bokou plis ki sa. E sa i evidan pandan sa 2an ki Seselwa in pas en moman tre, tre difisil in fer en kantite sakrifis ozordi nou war rezilta.

Se pa nou ki pe dir, se tou bann Lazans endepandan ki'n fer *rating* lo Sesel, *IMF*, Labank Mondyal;- *Fitch rating* fek sorti sa wikenn e ankor enn fwa Sesel in monte. I annan zis en keksoz ki pe pase, lemonn i vwar, en pei ek en Gouvernman ki pe travay serye pou son pei. E ler i pe travay serye pou son pei se son pep ki pe benefisyé.

E ozordi sa *Bill* ki la devan nou, i pe senpleman pe dir nou annan en lot pti group dimoun enportan dan sa pei, ki ganny mansyonnen dan Konstitisyon. Zot osi zot bezwen ganny rekonné pou zot zefor. Nou pe zis dir donn zot sa. Parske Konstitisyon i deza fer provizyon pou donn zot en Gratwite.

Mr Speaker vwala en pti pe sa *Bill* ki devan nou. Mon remerci tou bann Manm ki'n

konpran mwan. Konpran sa *Bill* e mon konnen zot pou donn sipor ler i ariv ler pou vote. Mersi bokou Mr Speaker.

MR SPEAKER

Mersi Vis-Prezidan. Mon ava apel bann Manm pou vot lo *Bill* pou *Second Reading*. Manm ki an faver lev lanmen silvouple? Mersi. Manm ki kont? Mersi.

Vot lo *general merit Constitutional Appointees Emolument (Amendment) Bill, 2022 - 19* Manm in vot pour, 0 kont e 8 Manm in *abstain*. *Bill* in pase lo *general merit* Madanm Clerk a fer *Second Reading*.

MADAM CLERK

Mersi Mr Speaker. *A Bill for an Act to amend the Constitutional Appointees Emolument's Act: (Cap 256)*. Mersi Mr Speaker.

MR SPEAKER

Mersi. Mon pa'n ganny notis okenn amannman. Eski i annan amannman Onorab Hoareau? Ar nou pa ankor pas dan *Committee Stage*, mon pe zis verifye.

HON JOHN HOAREAU

Mersi Mr Speaker. Mr Speaker i annan zis en pti amannman ki'n ganny agree par *panel*.

Sa se lo *short title* zis avan 2022 pou retir sa mo *Bill* pou met *Act*. Apard sa napa ankor okenn amannman. E anba *Order 97(1)* mon ti ava demann ou pou *suspend Standing Order 70* pou nou *suspend Committee Stage* e bouze pou fer en *Third Reading*. Mersi.

MR SPEAKER

Mersi. Normalman pa ou ki fer sa? Se, i kapab fer? *Any member?* Ki ou largiman Onorab Pillay?

HON SEBASTIEN PILLAY

Mr Speaker be *look*. En pti lamannman en gran lamannman, i en lamannman. So ler *Bill* i *committed to Committee Stage*, we have to go to the *Committee Stage unless* ou ganny en *notice of motion*, ki dir ou nou pa oule al dan *Committee Stage*. So prosedir i se ki nou bezwen al dan *Committee Stage*, akoz pti, gran i en lamannman. I en lamannman Mr Speaker.

MR SPEAKER

Onorab Georges wi, ki ou?

HON BERNARD GEORGES

Mr Speaker, mon pa anv i akiz person ki i pe bat ou latet parey mwan mon ti ganny akize ki mon pe bat ou latet. Me si

nou regard *Order 97*, i kler, “*any member can at any time move a motion to suspend the Standing Orders.*” Set egzaktaman sa ki Onorab Hoareau in fer.

He is a member, he moved a motion to suspend the Standing Orders akfer ki Onorab Pillay sak fwa ki nou fer en keksoz, li i bezwen vin koriz nou?

HON SEBASTIEN PILLAY

(Off-Mic)

MR SPEAKER

Non Onorab Pillay. Onorab Pillay nou pou bezwen termin sa.

HON SEBASTIEN PILLAY

Be Mr Speaker ...

MR SPEAKER

Onorab. Mersi.

HON SEBASTIEN PILLAY

... mon pa konnen ki problem ki i annan av ek lefe ki mon pe zis dir ki- mon pa pe koz lo lefe ki in *move* lamannman mwan, mon pe koz lo lefe ki i annan en lamannman ki'n *move*.

So ou menm ou konn tre byen poudir *Standing Orders* i dir ou kote ki lamannman i ganny fer.

(Off-Mic)

HON SEBASTIEN PILLAY

But he's got an amendment! Ki mannyer ou, ou kapab deside? Ok Mr Speaker i annan zis en dimoun ki konn tre byen fonksyon.

MR SPEAKER

En moman. En moman! Mon konpran ki zot pe koz de diferan keksoz *ok?* Nou pou pas dan Staz Komite. Serzan nou a pas dan Staz Komite. Onorab Hoareau ou a met ou amannman ki ou ti'n mete.

HON JOHN HOAREAU

Amannman i lo *short title*, i lir koumsa; - *"This Act may be cited as the Constitutional Appointees Emoluments (Amendment) Act, 2022.*

MR SPEAKER

Mersi. Lamannman in ganny agree oparavan. Donk, i napa nesosite pou pran en vot lo la. E setou lamannman, alor Staz Komite in terminen. Serzan nou a pas dan Staz Lasanble.

E sa ki pou anmenn Mosyon pou *Third Reading* i ava anmenn Mosyon silvouple. Onorab Georges ou ki ti anmenn Mosyon pou *Second Reading*.

HON BERNARD GEORGES

Mr Speaker anba *Order 76(1)* mon *move* ki *the Constitutional Appointees Emoluments Bill, 2022 as slightly amended* i ganny lir en Trwazyenm Fwa. Mersi.

MR SPEAKER

Mersi. Mon a ganny segonde silvouple? Onorab Arissol.

HON SANDY ARISSOL

Mersi Mr Speaker Mosyon i segonde.

MR SPEAKER

Mersi. Manm i a vot lo Mosyon *Third Reading*. Manm ki an faver lev lanmen silvouple? Mersi. Manm ki kont?

Lo *Formal Third Reading Constitutional Appointees Emoluments (Amendment) Bill, 2022 as amended* - 19 Manm in vot pour, 0 kont e 8 abstansyon. Donk *Bill* in pase par Lasanble. Mersi.

Madanm Clerk a fer *Third Reading*.

MADAM CLERK

Mersi Mr Speaker. *"This Act may be cited as the Constitutional Appointees Emoluments (Amendment) Act, 2022.* Mersi Mr Speaker.

MR SPEAKER

Mersi. Mersi Vis–Prezidan e *Attorney General* pou zot partisipasyon. Mersi bann Manm pou zot kontribisyon lo *Bill*.

Mon a swet zot tou bon sware e Lasanble i a repran demen bomaten 9er. *Adjourn*.

(ADJOURNMENT)